



اكسبي جوزك

الكاتب: عمرو يس

تدقيق لغوي: نسرين يوسف

رقم الإيداع: 2019 / 13749

الترقيم الدولي: 0 - 043 - 844 - 977 - 978

Facebook Page: دار الزيات للنشر والتوزيع

E- mail: bentelzayat1@gmail.com

Website: www.bentelzayat.tk

مجلس الإدارة / د. شاهنדה الزيات

المدير العام / أ. محمود محروس إبراهيم

01066736765 - 01011122429



جميع حقوق الطبع والنشر محفوظة ©

لدار الزيات المشهرة قانوناً بسجل تجاري رقم / 49351



9 789778 440430

اكسبي جوزك

" دليل المرأة إلى قلب وعقل الرجل الشرقي "

الكاتب

عصرو يس

كاتب وروائي ومدرب تنمية بشرية واختصاصي الصحة النفسية
ومستشار العلاقات الأسرية وخبير في علوم الإدارة الحديثة
وباحث في علوم التفكير الإبداعي



مقدمة

هذا الكتيب نواة أولى ومدخل لفهم بعض من جوانب حياتك الزوجية، يأتي إليك ضمن سلسلة طويلة سوف أقوم بإصدارها تبعاً في شكل أجزاء، وقد حرصت على أن يكون كل جزء مفيداً بشكل كامل ولا يفتقر لباقي الأجزاء، كتبته باللغة العامية البسيطة؛ ليتمكن من فهمه والاستمتاع بمحتواه كل أحببنا - ولو لم يكونوا من هواة القراءة - كما أود التنبيه على أمر مهم هو أنني لم أنقل من أي مصدر نقلاً مباشراً أبداً، بل كل المصادر التي اعتمدت عليها في أبحاثي اعتمدت فيها على "الفهم.. والهضم.. ثم إخراج المعلومة" وفق لما وفقت من الفهم، وبما يتماشى مع ما أعتقد من علوم أخرى مكملة لعلم النفس والصحة النفسية (الشريعة و الأدب والفلسفة و و و) ولم ألتجأ إلى النقل المباشر إلا في حالات الاستشهاد وفي نطاق ضيق.



(1)

الذكاء العاطفي

أقدر أقول إن أغلب العلاقات الفاشلة النهردة بيكون بسبب قلة مهارات الذكاء العاطفي، بجانب فهم كثير من الكلمات بشكل خاطئ **مثل:** (الكبرياء- الكرامة- المشاركة- الحب.....)، الذكاء العاطفي هو اللي بيقولك أمتي تتكلم وأمتي تسكت، أمتي تكون الإيجابية معناها المشاركة، وأمتي يكون معناها الانسحاب، وبدل ما نتكلم بشكل عام خليني أركز كلامي عن العلاقة الزوجية، بتجيلي مشاكل كثير بتشتكي فيها الزوجة إن زوجها اتغير ومقاش رومانسي زي أيام الخطوبة، أو إنه اتحول لإنسان فظ جدًا معاها، وإنه بيكون رومانسي ومتحمس جدًا مع الناس، ويبجي معاها وتختفي منه الرومانسية تمامًا، وتبدأ هي تقول لنفسها ده كان بيمثل عليّ أيام الخطوبة، والحقيقة إنه شخص مش رومانسي!

المثال ده بيدل على انعدام مهارات الذكاء العاطفي، ومهارات حل المشكلات، وده أحياناً بيكون بسبب إن أغلب الناس مبتحبش تسمع عيوبها، بتهرب منها وبتضايق جداً من اللي يكلمها فيها، فتدور في الطرف الثاني على أى نقص تقدر تقول من خلاله إن المشكلة عنده هو مش عندى أنا!

وهنا أنا بسأل سؤال: إذا كان هو رومانسي طول فترة الخطوبة، وبعد الجواز فضل رومانسي مع الجميع ما عدا انتي فلماذا لم يتطرق إلى فكرك إن العيب "فيكي انتي"؟

المنطق بيقول إن الحالة دي ملهاش إلا تفسير من اتين: **الأول:** إن العيب عندك، **والثاني:** إن هو بيتعامل معاكى كعدو عاوز يقضي عليه! تقولي هو بيمثل عاوز يظهر للناس بشكل حلو، فاقولها إن دي نقطة لصالحه مش ضده زى ما انتي فاكرة، طيب ليه هو بيحاول يحسن مظهره قدام الناس كلها إلا انتي؟

ليه بيخاف على شكله قدام الناس، ومش بيهتم بشكله قدامك؟

تقولي علشان بقي ضامني، ودي إجابة مستهلكة تدل على عدم تقدير الذات، مين قال إن الراجل والست بعد بالجواز بقوا مضمونين لبعض؟ ومين قال إن الست معندهاش غير الجنس تديه؛ فلما الراجل يخبده خلاص تنتهي رغبته فيها؟!!

الإجابة ببساطة على عدم اهتمامه بيكي إنك خرجتي من دائرة اهتماماته وحساباته، وفي أغلب الأوقات انتى السبب، لأن لو من البداية مكتيش في دائرة اهتماماته وحساباته مكنش اتجوزك!

عاوز أقول لكل ست إن الراجل ديمًا بيتجوز أكثر واحدة حس إنه عاوزها شريكة لحياته، ما دام اتجوزها بإرادة حرة مش إرضاءً لأهله مثلاً، فكل مشكلة تظهر بعد كده نقدر نرجعها للذكاء العاطفي بمنتهى البساطة.

معنى إن الراجل اختارك زوجة ليه إنه سلمك أهم مفتاح عنده، وإنه بيصلك بنظرة مختلفة عن أى ست تانية، وإنه باعلك أكبر مساحة من أرض حياته، دورك إنك تحافظي على المساحة دي، ولو مقدرتيش

تزودها وتستحوذ على الباقي كله؛ فمتضيعيش الجزء الكبير اللي هو
ادهولك بسهولة ومن غير تعب!

وإليك بعض النصائح:

- اقتنعي تماما إنك واحدة ست مش مخبر سري، ولا أمين شرطة،
ولا رئيس مباحث البيت، انتي شريكة حياة مش جهاز الأدلة الجنائية!
- لو اهتميتي بمراقبة جسمك وشكلك وطريقة كلامك ربع
اهتمامك بمراقبة جوزك حياتك هتتغير.

- ابعدي تمامًا عن تعامل الند بالند واعرفي إنك قاروة مش

Strong woman .

- انتي امرأة مهمة في حياة جوزك وتقدرى بذكائك تكوني أهم
امرأة في حياته.

- جوزك مش ملكك ومش بتاعك لوحدك ولا حاجة، وعمره ما
هيكون بتاعك لوحدك لمجرد إنك متقمصيش مثلاً، هيكون ملكك لما
تعرفي تخليه ملكك، غير كده ازعلي طول عمرك، وعيشي حياتك كلها
مقموصة؛ وبردوا مش هيبقى بتاعك.

- الراجل أسهل كائن ممكن تتعاملي معاه، وتخليه خاتم في صباعك، بس ده عمره ما هيحصل بمجرد إنه اتجوزك، ولا علشان انتى بتغسلي هدومه وبتطبخيله وبتربيله عياله، كل ده مش هيخليكي رقم واحد، بس هيخليكي حد مهم في حياته، بس مش رقم واحد.

- أغلب الرجاله عندها أنانية مفرطة وده يخليكي مجبرة على التعامل بذكاء، يعني ممكن تبقى مضايقة ونفسيك تعبانة وهو مش في دماغه، لكن مش ممكن يحصل العكس، طول ما هو تعبان هتبقى انتى كمان تعبان، ريجيه علشان ترتاحى.

- لو اتخطيتى في اختيار بين إنك تمدحيه؛ فيتمرع عليكى ويراعيكى، وبين إنك تعرفيه حجمه الحقيقي ويملك اختارى الاختيار الأول لمصلحتك.



(2)

النجاح وجهود

كل الناس لها حق العيش، لكن مش كلهم يستحقوا الحياة، ومش كل الناس لها حق السعادة أو النجاح أو التميز!

خلوني أوضح حاجة مهمة الأول: أنا مش بتكلم عن المفروض؛ أنا بتكلم عن الواقع، في حاجات كتير من المفروض، لكن لما تنزلوا للواقع مش هتلاقوها!

سهل إنى أقولك انتى مظلومة، والمفروض يحصل ويحصل، لكن في النهاية مفيش حاجة هتحصل، وكأني حكمت عليكى تفضلى مظلومة بقيت عمرك.

السعادة قرار مش هبة، السعادة نجاح والنجاح محتاج مجهود وتعب، وخلينا نتفق إن الحياة أقسى بكثير مما نتخيل، هتطحنك.. وهتفرمك..

وهتخطك في أماكن، وھتجمعك بناس عمرك ما تخيلت في أحلامك
إنك تسلم حتى عليهم؛ ورغم كده هتتفاجئ إنهم بقوا شركاء حياتك!
وبمناسبة الشراكة تعالي نتكلم كلام منطقي، اسأل أي حد أو اسأل
نفسك لو أنا عاوز أفتح مشروع وينجح أعمل أيه؟ الإجابة ببساطة
"اتعلم.. واصبر.. وكافح"، عمرك ما هتكسب منه في الأول، دانت
هتصرف عليه، ونجاحك في الأول هو إنك تقدر تلم بس اللي صرفته!
يبقى ازاي في مشروع الجواز عاوزين تدخلوا تتهنوا فوراً وتحصدوا
فوراً؟!

أسهل حاجة الكسل والنوم والإحباط، لكن في النهاية نتیجته مش
هتعجبك أبداً، ولو كل اثنين تجوزوا نجحوا أصبح مفیش معنى حقيقي
مميز للنجاح.

ومن المعروف إن أول ثلاث سنوات من الجواز هيكونوا مليانين
مشاكل، وده طبيعي وعادی وميخوفكيش نهائي، ومش معناه إن
حياتك الزوجية هتفشل، المعنى الوحيد لمشاكل أول ثلاث سنوات

جواز هو إنكم لسه بتفهموا بعض؛ وبتعرفوا على شخصياتكم الحقيقية، وبتعلموا طرق التعامل مع بعض، فترة الخطوبة فترة جميلة وحاملة، وغالبا كلنا بنخبي فيها عيوبنا، وجوانب كثيرة من شخصيتنا، وده اللي بيبدأ في الظهور التدريجي أول ثلاث سنوات.

وهنا نقول دورك إنك تصرى على النجاح، حتى لو شريكك ميستهلش، حتى لو شريكك مش مساعد؛ لازم تعافرى.

ممكن تكون أول عقبة في طريق نجاح حياتك الزوجية إنك تبصي للشريك وتقولى: بقى ده يستاهل أضحى علشانه؟! يستحق إنى اهتم بيه واراعيه واخاف عليه؟!

خلى الإجابة عن السؤال ده إن انت تستحقى، انت اللي محتاجة تعيشي كويس، انت اللي محتاج حياة سعيدة، محتاجة ترتاحي من الضغوط.

جوزك هو قضية حياتك، وطبعاً مش عيب تخسرى قضية، لكن أكيد الخسارة دى هتلاحقك فترة طويلة لحد ما تقدرى تتخلصي من أثارها،

وممكن أثارها تفضل معاكى للنهاية لو في أطفال، افتكرى إن مش كل
محمى وقف يدافع عن قضيته قدام القاضى كان مقتنع تمامًا ببراءة
موكله!

أنا مش عاوزك تضحى وتتعبى علشان أولادك، ولا علشان جوزك؛
لكن علشان نفسك، تعالي نغير مفهوم التضحية من إنه وجع بتتحمله
ونخليه إنه متعة بتستمتعى بيها!

وقبل ما اطلب منك أى تضحية سببى اطمنك الأول، الحياة مش
نهاية الأمر، كلنا هنموت وهنقف قدام ملك عظيم يحكم بينا، ملك
عادل.. ملك قادر، مهما حسيتى إنى ظلمتك في طلباتى اللي هنصحك
بيها النهاردا أو باقى السلسلة، ومهما ظلمك جوزك أو عيالك أو أهلك،
فكل الظلم ده وقتى هينتهى بانتهاء الحياة وهتخدى حقتك كامل.

جوزك خانك صح؟ وهانك مش كده؟ وقصر معاكى كثير، طيب
ربنا شاف؟ سمع؟ سجل؟ اطمنى.. حقتك محفوظ.

خلى ده مبدئك من النهاردا، إنك هتدى وإن في النهاية هتحصل
تسوية، ومن الأحسن يطلع ليكى رصيد بدل ما يطلع عليكى ديون.

حتى الآن انا لسه مقولتلكيش هتعملى أيه، أنا بس بحاول اطمئنك
علشان عاوز العطاء المرة دي بمفهوم مختلف.

النفس البشرية صعبة جداً ومعقدة، بس لو اتعاملنا بإنصاف
وحيادية؛ هنحل مشاكل كتير لنفسنا، والنهاردا أنا عاوز أكلمك عن
نفسك كتير.

فاكرة زمان لما كنتى في المدرسة وكان عليكى مادة اسمها "الجبر"
كنتى بتكرهها جداً صح؟ طيب عملتي أيه؟ اتقمصتى منها وقطعت
الكتاب، ولا حاولتى تفهميها بكل الطرق علشان تنجحي وتعدى؟
ما دمتي لسه مكرهتيش جوزك يبقى المهمة سهلة، لكن لو كرهتية
اطلقى على البركة وابتدي حياة جديدة.

من حسن حظك إنك أنثى، لأن الرجل عبارة عن كائن سهل
وبسيط، ويمكن حل شفرته بمتتهى البساطة، بل إن أغلب الرجال
شفرتهم متقاربة، لكن الستات كل واحدة منهن حالة مختلفة تماماً عن
التانية، يعنى كل الرجال بتحب الست الضعيفة، المطيعة، الحمولة، اللي
تتباهى بيه، دي نص الشفرة.

بنقول العلم بالتعلم.. والحلم بالتحلم.. والبكاء بالتباكي، مش
عاوزك تكوني ست ضعيفة بالعكس، أنا عاوزك قوية جداً؛ لكن مش
ضروري تعلنى أبداً عن قوتك دي، مش عاوزك تبقي مطيعة لدرجة إن
شخصيتك تتمسح وميقاش ليكي وجود، لكن مش ضرورى تتعاملى
بندية اتعاملى بذكاء، خليه هو يختار اللي انتى عوزاه، فاهمة حاجة؟

زمان كنت في مقابلة شخصية لطلب وظيفة، اللي بيعمل معايا المقابلة
اداني آلة حاسبة كانت قدامه، وقالى خد دي بعهالي ووريني مهارتك،
خدتها حطتها ورا ضهري وقولتله، قولى $375 = 452 \times$ كام؟ قالى
معرفش، قتلته يبقى انت محتاج آلة حاسبة افضل! طبعاً اتعينت فوراً.

أيه المعنى من المثال؟ خليه يحس إنه محتاج يعمل اللي انتى عوزاه،
مش مجبر يعمل اللي انتى عوزاه، على فكرة مع الوقت هتحسنى بمتعة غير
محدودة، وانتى بتمارسى الذكاء ده في حياتك، هتحسنى بقوة عجيبة، إنك
الساحرة الطيبة اللي بتتحكم في إرادة البشر!

لا تكن صلباً فتكسر ولا ليناً فتعصر، ده مبدأ جديد هتضيفيه
لمبادئك، بس قبل ما تعملي كل ده أكيد عاوزة تسألينى أبداً منين؟ صح؟

البداية إنك تذكرى مشروعك كويس، تحددى انتى واقفة فىن،
وعاوزه تروحى فىن، الراجل ده بيحب أيه ويكره أيه، أيه نقاط ضعفه
وأيه نقاط قوته، الراجل ده ينفع شريك مطلع على كل شيء، ولا محتاج
يكون شريك أعمى؟

لما يتكلم انتبهى لكلامه، ولما متفهميش استفسرى، واوعى تنسى أو
تهملي كلامه عن نفسه، تقدرى تستعيني بورقة وقلم، وتكتبي نقاط عن
شخصيته أو تقدرى تعملها فى تسجيلات صوتيه، التزمى بالإنصاف
والحياد جدًّا فى الخطوة دي، تجردى تماما وابتدي قيميه.

تاني خطوة حددي، هل انتى هتعالجه ولا هتستعمليه؟!

يعني هتخليه إنسان كويس، وتدفعيه للنجاح ولا هتستعمليه
كوسيلة للوصول للنجاح؟ طيب عارفة الفرق بينهم؟

أنا أقولك: الحالة الأولى انتى هتكوني نصه الثاني، الحالة الثانية انتى

هتكوني المديره بتعته، حاسة الموضوع صعب؟

طيب تعالى نفترض موقف، أنا وانتى منعرفش بعض وأول مرة
نتقابل، حصل خلاف بينا فى وجهة النظر فانتى زعقتى واحتديتى جدًّا

وتناولتى عليا وشتمتينى! **هنا في حلين: الأول** هرد عليكى وهعرفك

قد أيه انتى إنسانة تافهة ومش متربية، وهختمها بإنى اضربك قلمين!

التانى: إنى هبتسم رغم إنى مش طايقك وهقولك أنا عارف إنك

زعلانه وأكيد عازرك ويتهيل إن أنا استفزتك سامحيني أنا آسف!

احكيلى عن شعورك فى الحالتين، واحكيلى أنا هسكبك لو اخترت

إنى حل من الاتنين؟



(3)

نصك الثاني

اتكلمنا في الفصل اللي فات عن إنك تحددى هل - شريك حياتك -
هتحاولى تخليه نصك الثاني ولا هتختارى تكونى المديرة بتعته؟ وتعالوا
نبدأ من الاختيار الأول؟

نصك الثاني: علشان جوزك يبقى نصك الثاني لازم انتى تشوفيه
كده، يعني لو قسمناكي نصين يبقى هو الجزء الثاني منك، يتعبك اللي
يتعبه ويزعلك اللي يزعله، ويفرحك اللي يفرحه، إذا اشتكى عضو
تداعى له سائر الجسد، وعلشان تقدرى توصلى للدرجة دي، فانتى
محتاجة الأول تخدي مساحة كبيرة من عقله وقلبه، ولازم انبهك إن
العقل أهم من القلب فى أى علاقة؛ لأن الإنسان لو قويم علاقته بحد؛
ولقى إن هى معتمدة بس على إنه بيحبه ده بيحسسه بالمظلومية، وبالتالى
بيقل العطاء، وأغلب الزوجات التعياسات أزوجهن بيحبوهن بس مش
مقتنعين بهن!

ازاي تستحوزي على عقله؟

"لما تفهميه"

أكيد عمر الإنسان ما يقدر يتعامل مع حاجة بمهارة من غير ما يفهمها، وفي نفس الوقت مش من أول محاولة هينجح في الفهم أو التعامل، وعلشان تفهمي إنسان كويس لازم تدوري على مبادئه "وصولي، مجتهد، ملتزم أخلاقياً، منحرف، خاين، جبان، جرىء، شخصية كريمة..بخليه.. متهورة.. متسرعة.. حكيمة، صبورة، اجتماعي، انطوائي" لازم تحدد الملامح الرئيسية في شخصيته، بهدف التعامل معها، مش بهدف الإعجاب بها أو النفور منها.

انظري لجوزك على إنه ابنك، النظرة دي هتخليكي تقدري تستوعبيه وتستمعي باكتشافه، واقنعي نفسك - لأنها الحقيقة - إنك ملكيش أى نوع من أنواع السلطة عليه، مش هتقدري تمنعيه من أي حاجة هو عاوز يعملها، والإنسان بطبيعته بيحاول يزيل أي عقبات في طريق رغباته، يبقى أكيد مش من الحكمة إنك تحلي نفسك عقبة من العقبات، يبقى احنا اتفقنا دلوقتي على حاجتين:

1. إنك مش وصي عليه.

2. إنك متكونيش ضده، وعقبه قدام رغباته.

طيب افرضي رغباته دى سيئة ومش عجاكى؟ وهنا لازم أسألك سؤال يحتاج منك إجابة منطقية، هل انتى تقدرى تهدي حد غضب عنه؟ يعني تقدرى تخلى واحد مدمن يبطل غضب عنه؟ أو تخلى واحد حرامى يبطل سرقة غضب عنه؟ كل القوانين الرادعة والعقاب والعذاب مقدرش يمنع الجريمة، مقدرش يخلي حرامى واحد يتوب، امال اللصوص الي تابوا وبقوا ناس محترمة، ده حصل ازاى؟! حصل بالإرشاد والصبر، افتكري إن النبي-صلى الله عليه وسلم- لم يستطيع هداية عمه أبي طالب لحد ما مات على الكفر.

طيب لما انتى مش وصي عليه، وحتى لو كتى تملكى الوصاية عليه وعقابه مش هتقدرى تهديه غضب عنه، يبقى العقل والحكمة بيقولوا إن دورك فى إصلاح أى شيء فيه بينحصر فقط فى الدلالة والإرشاد والدعاء له، يبقى متدخلش أى معركة أنا بقولك من دلوقتى إنها خسارانه، هتخسر ك وقتك ومجهودك وكرامتك وممكن بيتك كان.

تعالى كما نقول إن الدعوة مش أي إنسان يصلح لها ومش أي واحدة عندها الملكة والأدوات التي تقدر من خلالها تدعى حد لطريق سليم، يعنى تخيل لو أنا جيت وقت الصلاة مثلا وقولتلك انتى مقمتيش تصلي ليه، انتى كافرة؟ انتى ازاي مسلمة؟ دانتى عايزة الحرق! تفتكرى إن الطريقة دي هتغيرك وتخليكي تبقي أحسن؟ أكيد لأ، وممكن تكون الطريقة لينة، وفي نفس الوقت مش مقنعة فبرضوا مبتوصلناش لأي نتيجة!

اتعلمى تكرهى الفعل ومتكرهيش الفاعل، اكرهى الغضب لكن متكرهيش شريك حياتك، اضيقى من عدم حكمته لكن متضيقيش منه هو، افصلى الفعل عن الفاعل؛ علشان تقدرى تكلمي حياتك بهدوء، وطريقة نصحك ووقتها وأسلوب الكلام، والكلام نفسه لازم تختار به عناية، واعرفى إن الرجال دائماً بيعميهم الكبر عن قبول النصيحة من المرأة أو الطفل!

يبقى انتى مش لازم تحسسيه إنك بتنصحيه، ويستحسن تأجلي محاولاتك في إصلاحه لمرحلة بعد ما تبني معاه علاقة منسجة الأول.

تقدري تبني علاقة منسجمة من خلال اهتمامك باهتمامه، وما دام
انتي قررتي يكون نصك الثاني يبقى مفيش أي مانع من إنك تذوي فيه،
اقرري واتعلمي واسمعي واسألني عن الحاجة اللي هو بيحبها، سواء كانت
القراءة أو السياسة أو الكورة أو الخيال أو حتى البلايستشن، وابتدي
شاركه، وواعي تنسي إن أي حاجة في أولها بتكون صعب، لكن لو
صبرنا هنوصل، حاوي تضيفي له معلومة جديدة عن الحاجة اللي هو
بيحبها، ده هيخليه يهتم بكلامك بعد كده، بس اتاكدي الأول من
المعلومة اللي بتضيفيها؛ علشان لو طلعت غلط النتيجة هتكون إنك
بعدي خطوة بدل ما تقربي خطوة، وما دمتي اتأكدتي يبقى ضفيها بثقة
وبوضوح، بثقة مش بتحدى، ولو هو رفضها اصبري لحد ما يتأكد
بنفسه مش تصري على إنها صح وتزعلي وتحولى الموضوع لمشادة؛ تخليه
ينفر منك اكرر !

ادلعي.. ادلعي على قد ما تقدرني، ادلعي في مشيتك وطريقة كلامك
وقعدتك وحتى في زعلك، خليكي ست دلوعة مش ست نصها راجل

ونصها ست، اهتمي إن ايديك ورجلك دايمًا يكونوا ناعمين، اهتمي إنه
يشوف ديمًا ضعفك الجسدي، يعنى قوليله تعالى ارفعلي دي، افتحلي
دي، مش تلاقيه هو مش عارف يفتح حاجة تقوليله عنك ... ويا
عدوي!



(4)

زوجى خاين

عاوزك تركزي كده معايا وتوسعى خلقك؛ علشان أنا جاى أقولك
كلام مستفز جدًا.. وعجيب.. وهيحرق دمك... بس هو كلام حقيقى
وواقعي، وفيه حل نهائي للمشكلة دي وبداية سعادتك.... واوعى
تنسي لحظة إن المنشور ده كله عبارة عن محاولة للحفاظ عليكى، وعلى
كرامتك وعلى قلبك وسعادتك... ولأذهب أنا وباقي الرجال إلى
الجحيم!

كم هى مؤلمة وموجعة الخيانة؟!

والخيانة لها أكثر من شكل، خيانة الحلم، خيانة الأمانة، الخيانة
بالنظرة، خيانة المشورة.....

والخيانة ممكن تحصل بوسائل كثيرة، بالفكر... بالفعل... بالنظر..
بالسكوت... بالصدفة!

بس موضوع الساعة عن خيانة الرجل زوجته مع امرأة أخرى، وهنا لازم نحلل الموضوع بشكل سليم؛ علشان نقدر نوصل لإجابة وحل صح.

الرجل المتجوز لما بيعرف واحدة غير مراته، أو بيكون في علاقة، أو علاقات هو كده بيخون مين؟ ممكن يكون بيخون نفسه، أو أخلاقه، أو ربه، أو مبادئه، أو أي حد إلا "مراته!".

تسكعات زوجك مش خيانة ليكي، ومش غلط في حقك، ومش حاجة تعيبك، إلا في حالة "إنك تكونى انتي اللي دفعته يعرف واحدة تانية ويديها أكثر من اللي بيد هولك" في الحالة دي الأمر يعيبك جدًا جدًا ويحط من قدرك وقدر أنوثتك، غير كده فانتى ملكيش أى دعوة أو علاقة بالموضوع ده!

جوزك يقدر يتجوز عليكي أى وقت، ويقدر كذلك يطلقك أى وقت، علاقته بفلانته ممكن تكون فترة خطوبة هيتم بعدها الجواز، وممكن

تكون مراته بالفعل، وعموما أي أن كان شكل علاقته دي فهي متخصصكيش في الواقع!

س- هو لو وقع في الغلط وندم وحب يتوب يتوجه ليكي انتي علشان يتوب ولا يتوجه لربنا بس؟
ج- أكيد لربنا بس.

س- يستسمحك انتي ولا كفاية إنه يستغفر ربنا؟
ج- كفاية إنه يستغفر ربنا.

س- لو انتي ساحتية يبقى ربنا هيسامحه؟

ج- أكيد مساحتك ليه ملهاش أي موقع من الإعراب في الموضوع ده؛ لأنك مش صاحبة المظلمة، لأنه ذنب بين العبد وربيه، زي الصلاة أو الصوم أو الذنوب غير المرتبطة بحقوق العباد، يعنى لو زوجك ده سرق منك مبلغ من المال فلا تقبل توبته قبل ما يرجع اللي سرقه أو إنك تسامحيه، هل علاقته بغيرك أمر خاضع لمسألة مساحتك دي؟ سبيني أقولك لا ... لا ... لا، ربنا هيقبل توبته سواء ساحتية أو لأ، وهيغذبه

لو متبش سواء ساحتيه أو لأ، يبقى زي ما قولنا في أول الموضوع إنك ملكيش أى دخل في الأمره.

ممكن تكوني إنسانة كويسة جداً ومخلصه جداً وبتقدمي لجوزك كل اللي هو بيحتاجه، ورغم كده يعرف عليكى واحده واتنين، لمجرد فراغة العين، أو الفتنة وانتي أكيد بتشوفي الستات عاملة ازاي دلوقتي، أو ممكن حب التجربة والمغامرة، وممكن قلة أخلاق، وأكيد قلة دين، علشان كده مش أول نصيحة هقدمالك مع زوجك متعدد العلاقات إنى أقولك روجي البسى واتغيري وادلعي، لأ هقولك اتأكدي الأول إنك مش طرف أو سبب في علاقاته المتعددة دي، علشان ممكن تكوني بتخدئ معاه ذنب زي اللي بيصد عن السبيل.

سبينا نرجع كام خطوة للخلف، هو انتى ازاي عرفتى إن هو في علاقة؟ ولاحظى إنى ديبا بقولك علاقة مش بقولك خيانة، احنا منعرفش يمكن تكون مراته، وممكن تكون مراته وأم عياله كمان، يمكن خطيبته، أو يمكن زوجة محتملة، وممكن عشيقه، وممكن صديقه وممكن زميلة، في ألف ممكن في الموضوع ده، يلا جاوبى انتى ازاي عرفتى؟

راقبتى؟ التجسستى؟ سمحتى لنفسك تنزلى بأخلاقك لمستوى المنحطين اللى بيقبلوا فى الحاجات اللى متخصصهمش؟ كتنى متطفلة على ما لا يعينكى؟ اخس ... ألف اخس عليكى. قد كده انتى إنسانة مش كويسة!

طب بتلوميه على أيه؟ ما انتوا الاتنين وحشين أهو! انتى شيفاه خاين؟ رغم إن ممكن تكون الست اللى معاه دى مراته؟ لكن الحقيقة إن انتى جاسوسة، ومتطفلة، وخاينة للأمانة، والمفروض إن مفيش حد يأمّن لك لأنك بتسمحى لنفسك بالتفتيش فى حاجات متخصصكيش، والاطلاع على أسرار غيرك!

انتى لازم تتغيرى، علشان انتى إنسانة كويسة، التجسس ده مش صفة تليق بيكى أبدًا، انتى محترمة مش منحطة لدرجة إنك تقفى ورا الباب تسمعى، أو تراقبى المهمات، تعالى معايا كده نقف فى منطقة عالية ونبص عليكى، **والهشهد كالتالى:**

رجل فى حجرة ممسك بهاتفه ويتحدث إلى امرأة لا نيتين هويتها " زوجة - عشيقة - صديقة - حديث عمل - ... ألف احتمال)، وقد

أحكم غلق الباب عليه، وخلف الباب تقف "انتي" وتنظرين من ثقب الباب كاللصوص، وتتسمعين وتتجسسين في محاولة لسماع ما يدور في هذه المكالمة، فإذا شعرتى بأي حركة تسرعين بالهرب كالفأر الجزع قبل أن يراه أحد، انظري إليك جيداً، ما أبشع وأقبح وأقذر هذا المنظر؟! تخيلي أن تفعل اختك هذا لتسمع ما يدور بينك وبين خطيبك من أحاديث غرامية، تخيلي أن يفعل معك زوجك هذا لسمع ما يدور بينك وبين قريناتك من أحاديث نسائية، ما رأيك؟ لا بد أنه شيء يشعرك بالغثاثة، أما لو شايفة إنه حاجة عادية فانتي متعرفيش أي حاجة عن معنى الخصوصية ومحتاجة تتعلمي.

لو عرفتي بالطريقة دي - التجسس - يبقى احنا مش محتاجين نتكلم في أى حلول، اهتمى بنفسك وصلحى منها علشان انتى مشكلتك كبيرة ومحتاجة علاج، التصنت والتلصص والتجسس صفة سيئة وبشعة اتخلصي منها.

تعالى بقى نبص من جهة تانية، انتى دلوقتى مش أنثى ولا حاجة، انتى مخبر ماسك جرنال عامل فيه خرم وقاعد يراقب، ورئيس مباحث

البيت، وجهاز جمع الأدلة الجنائية، وأمين شرطة، والشاويش عطية،
وصلتى لأيه؟ وصلتى إنك هنتى نفسك أبلغ وأقوى إهانة في الدنيا،
ونزلتى كرامتك لأقل مكان ممكن تكون فيه، يعنى جوزك الخاين كتر
ألف ألف خيره هو وعشقتة احترموكى وراحوا يعصوا ربنا بعيد عن
عينك وودنك - ربنا يكرمهم يا رب - وحاولوا يحافظوا على كرامتك
ومشاعرك بكل الطرق، بحيث إنك متحشيش بأي حاجة، لكن انتي
أصريتى إنك تعرفي، وكمان روحتى علشان تقفي تتفرجى عليهم وهما
بيارسوا الحب، وحاولتى بكل الطرق إنك تقوليله أنا عارفة متفتكرش
إنى مغفلة... حاشا لله أنا قرطاس!! يا للعجب!

هو انتي تقدرى تعملى أى حاجة بعد ما تعرفى إنه يعرف واحدة
عليكى؟ تقدرى تمنعيه من الخروج مثلا؟ تمنعيه إنه يكلم حد أو يزور
حد؟ إنه حتى يبطل يكلمها تانى؟ انتي تقدرى تعملى أى حاجة؟ لأ
متقدريش تعملى غير إنك تزعلي وتتعبى وتبدلى وتكرهى حياتك،
وتشغلى بالك وتحسي بعدم الأمان، وتفضلى تموتى في الدقيقة ألف مرة.

طيب ليه بتعرضى نفسك للموقف ده؟ إنك تشوفى جوزك فى حضن
غيرك؟ وتسمعيه وهو بيقولها بحبك والحياة من غيرك لا تطاق؟ وإنك
تشوفيه عريان معاها أو تشوفيه عريانه معاها؟ هو انتى ازاي مهزقة
كده؟!

مسكتى التليفون وشوفتية وهو باعتلها بوسة؟ وبيقولها معرفتش أنام
طول الليل علشان بفكر فيكى؟ ابعيتلى صورة بالقميص الأحمر اللي
بحبه علشان وحشتيني؟ مش قادر أنسى آخر مرة لما كنا مع بعض،
وكنت بأكلك بأيدي؟ شوفتى الحاجات دى؟ أيه رأيك مبسوفة؟؟؟
حاسة إن لسه عندك كرامة تستاهل إنك تدافعى عنها؟ طيب هتعرفى
تنسى الصورة اللي شوفتيا ليهم وهما فى حضن بعض؟ هتعرفى تتقبلى
الراجل ده تانى وتكلمى معاها حياتك؟ كده يبقى مفيش حل غير
الطلاق.... اتطلقى، هتقولى مينفعش علشان عندى أولاد، أو لأنى
مليش مصدر دخل، أو علشان لسه بحبه، أو علشان كلام الناس، أو أو
أو ... طيب ليه عملتى كده؟ ليه طفيتى النور؟ ليه محافظتيش على
نفسك؟

كلامى مستنفر جداً جداً، طيب خيلنى أهلك استراحة بهثال:

س- لو في مكان أو شارع مشهور بوجود قطاع الطرق فيه، هتمشى

منه؟

ج- أكيد لأ هتدورى على سكة تانية حتى لو أبعد.

س- لو في مكان فيه ناس مش بتحبك وبتستهزأ بيكي ديماء،

هتروحي المكان ده وتعدى فيه رغم إنك عارفة إنك هتتهزقى وتبقى

مسخرة القعدة؟

ج- أكيد لأ هتتجنبى التواجد في المكان ده.

س- لو انتى عارفة إن السلك العريان ده هيكهربك هتمسكيه؟ لو

عارفة إن في الطريق ده حفرة هتمشى وتقى فيها وتعرضى رقبتك

المسممة دى للكسر؟ لو حتى لابسة فستان جديد وقدامك كرسى

طالع منه مسمار ممكن يقطع فستانك هتعدى ولا هتفضلى واقفة رغم

إنك تعبانة؟

ج- أكبيد لأ

طب ما تحترمى نفسك بقى.. احترمى نفسك علشان الناس

تحترمك.

أيه ده هي دى دعوة للخيانة ولا أيه؟ لأ دى دعوة لاحترام الذات
وعدم التدخل فيها لا يعنيكى.

- انت كأنك عاوزنى أروح لجوزى أقوله: برحتك يا حبيبي لو عاوز
تعرف عليا ألف واحدة؟! لأ أنا اللي عاوز أقوله قولته بوضوح فياريت
متجوديش، أنا قلت احترمى نفسك علشان هو يحترمك، سبيه خايف
منك، متجرئيهوش عليكى، سبيه متدارى بدل ما يبقى بجح ويدوس
عليكى، سبيه يراعيكى بدل ما تبقى ولا حاجة عنده، لأنه عرف ديتك..
متدخليش قضية خسرانه علشان الموضوع ده ملهوش غير حل واحد
"الدين".

أغلب الرجاله عندها زايغة، طبيعة الرجاله غير طبيعة الست، الرجاله
قلبه يقدر يحب كتير وجسمه يقدر يتعامل مع أكثر من واحدة، أما المرأة
فسيولوجياً متقدرش تكون إلا مع راجل واحد ولراجل واحد، قلبها
ميعرفش يشيل اتنين، يبقى متقسيس نفسك عليه، متقوليش اشمعنى أنا
أخلص وهو لأ؟ زى الزوجة اللي بتقارن نفسها بنتها الصغيرة، وتقولك

ما أنا بعمل شغل البيت، وبربي أربع عيال، بتتى مش عارفة تطبخ طبخة
ليه؟!

وعلى أى حال انتى بتخلصى علشان انتى محترمة ومؤدبه وهتدخلى
الجنة، وهو مش مخلص يبقى قليل الأدب وربنا مش هيسيبه.

ولازم تعرفى وتتأكدى وتقتنعى تمامًا إن مفيش حاجة تمنع الراجل
عن النساء إلا حاجة واحدة بس ملهاش تانى أبدًا: "الدين"؛ لأن
الراجل يقدر يبص للست من غير ما حد يلاحظ، يقدر يتفرس في
جمالها، أو يشوف صوارها على النت أو يتخيلها حتى وهو معاكى، طيب
مين اللي يقدر يراقبه، ويعرف في كل الحالات دى؟ مفيش غير الإله
العظيم المطلع.

واطمنى زى ما قولنا إنك ملكيش أى دخل في القصة دى، الذنب ده
كله في حق ربنا، وربنا مش محتاج حد يدافع عنه أو يحكمله عباده، الله
مطلع ويعلم وقادر وعادل، فلو قبض روحه وكان على ذنب، اطمنى...
هيحرقه، ويعذبه، ويجلده ويدخله نار مخصوصة، اتبسطتى ولا لسه مش

كفاية؟ طب اتفضلى، وهيعلقه في جهنم وهيفضحه على رؤوس
الأشهاد، وهيشربه من ردة الخبال وهيفحمه في النار، ها اتبسطنى
واطمتنى عليه ولا لسه؟ طب اتفضلى كمان هيخليه @%#^*
بيتهيئلى كفاية عليه كده، اتبسطنى واهدي بقى.

طيب ما أنا خايفة إن زوجى يعمل حاجة غلط تترد فيه أو في بناتى
ودقة بدقة ولو زدت لزد السقا، سببى أقولك حاشا لله وتعالى عن ذلك
علواً كبيراً، حاشا أن يظلم أو أن يتهم بالظلم (لَا تَزِرُ وَازِرَةٌ وِزْرَ
أُخْرَى) (كُلُّ نَفْسٍ بِمَا كَسَبَتْ رَهِينَةٌ) ، الله أقدر على أن يقتص
ويستوفى العقاب من المخطئ، ربنا إله قادر عظيم، مش واحد زينا إذا
حد غلط في حقه يروح ينتقم من أهله، شيلوا الفكرة دى من دماغكم
تماماً، إن حد يعمل ذنب وربنا يعاقب أخوه أو أمه بداله أو معاه ده كلام
فارغ، إلا إذا كان ليهم دخل في ارتكابه الذنب ده، علشان كده قولتلك
في أول المنشور "اتأكدي الأول إنك مش طرف أو سبب في العلاقة دي،
علشان ممكن تكونى بتخدى معاه ذنب زى اللي بيصد عن السبيل "يعنى
الخلاصة أكيد ربنا مش هيفسدك علشان يعاقب جوزك الفاسد، يبقى

اللي يقولك دقة بدقة قوليله أبوك السقا، وبالمناسبة " كما تدين تدان" مش شرط يكون في الدنيا؛ لأن الدنيا مجرد دار اختبار مش دار حساب، يعنى ربنا ممكن يأجل حسابه تماما للأخرة، وممكن يعاقبه عقاب يستحقه لكن مش من نفس نوع الذنب، يعنى يخدع ويكذب فربنا يضيع منه هدفه ومراده ويعاقبه بالحرمان منه، مش لازم يعاقبه بانه يتخدع أو بيعتله اللي يكذب عليه، بس لحظتوا إنها تدان مش يدان أهلك؟ فالجزاء من جنس العمل ليست قاعدة مطردة في كل شيء ولكن في الغالب، ومش ديبا معجلة في الدنيا لكن في الغالب.

س- طيب ازاى ممكن أكون أنا سبب في إنه يبقى متعدد العلاقات؟!
ج- بأنك تخليه ديبا تأيه مش لاقى نفسه معاكى، مش لاقى راحة عندك، مش لاقى رغباته فيكى، يعنى واحدة نكدية وغبية وكسولة ومهملة، ومش نظيفة، وأنانية وجاهلة، وزعلانه إنه عرف غيرها؟!!

طيب لو انتى مفتشتيش ومتجسسيتيش ومراقبتيش ورغم كل ده عرفتى بالصدفة البحتة - وده نادر الحدوث - يبقى أيه التصرف السليم؟ إنك أول حاجة تتأكدى إنك مش طرف أو سبب في العلاقة

دي، لو لقيتني إنك انتي الي دفعته ليها يبقى لازم تصلحي غلطك حتى لو بعد ما صلحتيها هي فضلوا مع بعض، امال بتصلحيها ليه؟ خوف علي نفسك من عقاب الله ومعذرة إلى ربكم، ممكن تكوني انتي الي جبتها لحد البيت وعرفته عليها، وممكن تكوني انتي الي سمحتي بالملاطفة والصدقة بينهم علشان هي زى اختك ومتربيين مع بعض، ممكن تكوني انتي الي حلتها في عينه من كتر كلامك، ووصفك ليها بالصفات الجميلة الي حتى مش فيكي، وكنت بتسمحيلها تقعد معاه في غيابك، متحركتيش بجديّة أول ما حسيتي بالخطر وافكرتني إن ده من حسن الظن!

ممكن يكون كثير قالك عاوزك حنينه وفضلتي قاسية، عاوزك مثقفة وفضلتي جاهلة، محتاج اتناقش معاكى وفضلتي فاضية، محتاج أحس بقوتي معاكى وفضلتي متسلطة وعنيدة، محتاج اهتمامك بيا وفضلتي مهملة وغيبية، عاوز أحس إنك محتجالي وحسسته إنه نكرة والحياة عمرها ما هتقف عليه!

أوقات بييجلي استشارة وبتحكيلى عن جوزها الخاين الملعب بتاع الستات، ومن خلال مناقشة بسيطة معاها بعرف ليه عمل كده وبقول

والله عنده حق، مش بس إنه يعرف حد عليكي لأ إنه يديكي علقه؛
وبعدين يطلقك؛ وبعدين يعرف واحدة عليكي، وأحيانا بسمع منها
ازاى الست دى خطفت جوزها؛ فبقولها إن عشيقه جوزك دى ست
تستحق الإعجاب منك شخصيا!

تخلى هعايا وتعالى نحسب نقاط قوتك:

1. انتى مراته.
2. أم عياله.
3. شريكته في المنزل.
4. شريكته في الفراش.
5. حاله.
6. لو رضاكى وأحسن ليكي هياخذ حسنات وربنا هيرضى عنه.
7. تقدرى تتكلمى عنه قدام أى حد من غير خجل أو خوف إن سمعتك تتأثر.
8. تعرفى أهله ويعرفوكى وتقدرى تزورهم.

9. يعرف أهلك ويعرفوه ويقدرُوا يزروه.
10. لو خرجت معاه مش بتبصي حوليكي.
11. بتختاري أكله وبتهندي لبسه، وانتى عينه طول ما هو غايب.
12. القايمه طويله جدًا فوق ما نقدر نحصرها، وكل اللي أنا كتبتة ده موجود دون أى مجهود أو تخطيط منك، يعنى لو خططتى تكوني أكثر هتكوني أكثر، زي مستشاره وأمانه وصديقه ونصه التاني، وحاجات كتير "ما أكثر نقاط قوتك".

طيب عشيقته؟

معندهاش حاجة من كل ده، ورغم المقارنة والظروف الظالمة الجائرة دى، قدرت تخطفه منك وانتى نايمه، و قدرت تاخذ منه يمكن أكثر ما انتى خدتى أو هتخدى، و قدرت تغير فيه وتطوره وتدفعه لقدام أكثر منك، قدرت تحسن من شخصيته وتسيطر عليه أكثر منك، طيب بالله عليكى الست دى متستحقش الإعجاب؟ أنا عن نفسي معجب بيها جدًا، قدرت تغزل برجل حمار..

تعالوا بقى نلم الموضوع في نقاط وأسبيكم انتوا تجمعوها لو حدكم:

- جوزك مش ملكك ولا هيبقى ملكك إلا لو انتى عرفتى تملكه.
- جوزك مش عدوك ومش حد مطلوب منك منافسته ولا مجال للتعامل الند بالند.
- علاقته المتعددة لا تسيء ليكي أو لكرامتك ولا تعنى إنك زوجة فاشلة أو حتى مقصرة.
- لا تتجسبي حفاظاً على كرامتك.
- لا تملكى أي أداة حقيقية لمعاقبته أو ردعه أو تغييره (إلا النصح بالطرق اللي هتتكلم عليها فيما بعد).
- لازم تتأكدى إنك مش سبب في علاقته المتعددة علشان متخديش ذنب معاه.
- لازم تقتنعى إنك مش مخاطبة بموضوع علاقته ده أبداً وملكيش أى رأى فيه.
- لا تتجسبي حفاظاً على سعادتك.
- اوعى تعرفيه أو تحسسيه أبداً إنك عرفتي، ولا حتى بالنظرة؛ علشان يفضل يحترمك ويخاف من زعلك، وميعرفش ديتك، وفي النهاية لو حسسته كل اللي هيعمله إنه هيزداد كذب وممكن يبقى بجح أكثر .

- حتى في حساباتك إن ممكن الست دى تخده منك وتخليه ينسأكى انتى وبيتته ووعيله كمان، يعنى اشتغلى على نفسك علشان منوصلش لكده؛ ولو وصلنا تبقى عملتى كل اللي عليكى قدام ربنا وقدام عيالك، وأكيد ربنا مش هيسيبك هو خير سند.
- ممكن يكون لسه معاكى حتى الآن وصابر عليكى بسبب وجود الست دى في حياته، ولو سبها هيحس بمدى النقص اللي في حياته ويطلقك.
- مفيش أى مانع إنك تعجبي بالست اللي خطفت جوزك وخلتك ملكيش أى قيمة أو معنى في حياته، اعجبي بيها وحاولى تتعلمى منها وترجعى تخطفيه "لو كان الأمر يهملك".
- لا تتجسبي حفاظا على راحة بالك.
- طبيعة الراجل غير طبيعة الست ومينفعش تقارنى بينهم.
- تعدد علاقاته مش معناه إنك مغفلة، معناه إنه هو اللي عنده مشكلة وغالباً مشكلة دينية.

- الحاجة الوحيدة اللي تبطل الراجل الستات هي الدين.
- لا تتجسسي حفاظاً على صورتك أمام نفسك.
- انتى أنتى مش الشاويش عطية.
- مش معنى إن جوزك ضاع منه حته إنك تضيعيه كله، بلاش كبر وعناد انتى مش قده.
- من مصلحتك إنه يرتاح عندك.
- لا تتجسسي حتى لا يراك الله على تلك الهیئة البشعة.
- خلى كل حاجة تعملها مقصود بيها وجه الله علشان متحسبش إنك بتضيعي عمرك هدر مع ناس متستاهلش.
- كل الرجالة بيحبوا الستات، والراجل اللي مش بيحب الستات مريض وعنده مشاكل ومحتاج يتعالج، ورغم إن الكل بيحب الستات إلا إن في راجل عنده دين ييمنع أو اخلاق بتردع أو وضع اجتماعى مش بيسمح، بس كلنا لصوص يا صديقى.
- سهل إنك تهدمى بيتك لكن صعب إنك تبنيه، بس الهد سهل علشان تبعاته كلها سيئة والبناء صعب علشان تبعاته كلها حسنة فاختارى بحكمه.

• مفيش نار من غير دخان، وما دمتى شوفتى أو شميتى الدخان فده وقت مناسب إنك تطفيها قبل ما الحريق يأكل كل حاجة.

• لا تتجسسي كى لا تجلبى لنفسك الألم.

• أغلب الرجاله متعددى العلاقات مبيكنش السبب جنسي؛

بيكون نفسي.. عقلى، يعنى مش لاقى نفسه معاكى، دورك تخلقى مساحات مشتركة.

• متسمعيش لنصيحة أى وحدة ست فى الموضوع ده وخصوصاً

الست والدتك، ولو عاوزة نصيحة يبقى خديها من عالم دين ثقة أو اختصاصي نفسي راجل.

• قيمتك وكرامتك مؤشرها هو مقدار اكتفاء بيتك بيكى، ومدى

أهميتك فى حياة أولادك وزوجك، واثاكدى واقتنعى تماماً إن كل

strong independent woman (بمعنى الاستقلال التام عن وجود رجل)

هى ستات خدت على دماغها لحد ما شبعت، وكانت بتتمنى تعيش

ضعيفة مع راجل يراعيها، لكنها فشلت وفقدت ثقتها فى كل شيء

فاتجهت لك **strong independent woman**، هي في النهاية مريضة ثقة
وضحية خذلان تستحق الشفقة والرعاية والإحساس بالأمان، مش
قدوة تقولنا تجربتها في الحياة وخبرتها.

• لا تتجسبي علسان حرام.

• افتكرى ديبا إن الراجل لما بيخون بيكون الطرف التانى وحدة
ست، مش بيخون مع الهوا أو مع واحد زميله، يعنى متقوليش كل
الرجالة خاينة؛ لأن بعدد الرجالة الخاينة في عدد في الكفة الثانية من
الطرف التانى أنثى.

• من الحقائق الصادمة إن الراجل ممكن يعدد علاقاته رغم إنه
معاه ست بيحبها ويحترمها، ومش مخلياه محتاج حاجة.

• معرفتك إن جوزك يعرف واحدة أو اتنين أو عشرة مش نهاية
الطريق؛ بالعكس دى بداية إنك تفوقى وتعرفي إن في حاجة ممكن تكون
غلط أو محتاجة منك رعاية.

- معرفتك إن جوزك يعرف ستات كثير عليكى مش معناه إنه
- مش يبحبك أو إنه مش يبحترمك؛ فخلى بالك أوعى توصليه لكده إلا
- لو ناوية تتطلقى، ساعتها مش فارقة وجهة نظره فيكى.
- لا تتجسبي.. لا تتجسبي.. لا تتجسبي.
- لو عرفتى بطريق الصدفة أوعى واحذرى تماما إنك تتوسعى في
- المعرفة أو المتابعة، ممكن توصلى لحاجات تقتلك في الحال، ابعدى عن
- الشر علشان خاطر ك انتى.
- وأخيرًا الراجل متعدد العلاقات رجل سهل السيطرة عليه لو
- فهمتيه.

وإيكم اختصار الموضوع بالكاهل:

* قال رسول الله صلى الله عليه وسلم (من تتبع عورة أخيه تتبع الله عورته، ومن تتبع الله عورته، يفضحه ولو في جوف بيته).

*يقول ابن القيم رحمه الله ((ومنها أن يعامل العبد بني جنسه في إساءاتهم إليه وزلاتهم معه بما يجب أن يعامله الله به في إساءاته وزلاته وذنوبه، فإن الجزء من جنس العمل، فمن عفا عفا الله عنه، ومن سامح أخاه في إساءته إليه سامحه الله في سيئاته، ومن أغضى وتجاوز تجاوز الله عنه ومن استقصى استقصى عليه)).

أنا لسه هكتب تانى عن الزوج الخاين وهتكلم عن طريقة تفكيره ومبرراته وسيكولوجيته وطرق جيدة لجذبه .



(5)

احسني لنفسك

السلام عليكم ورحمة الله وبركاته

مالك زعلانة ليه؟ أنا ملاحظ إن من ساعة ما ربنا كرمك وهداكي

وتاب عليكي من التجسس وانتي مش في الفرمة، يا ترى أيه السبب؟

الطاقة الي كانت بتضيع في الفعل السيء ده احنا عاوزين نعيد

توجيها بحيث تكون مفيدة، مش عاوزين نطفيها.

وزى ما اتعودنا كل يوم بتفهمني حاجة جديدة وبتغيري من نفسك،

النهاردا عاوزك تفهمني حاجة في غاية الأهمية: إن انتي أهم شخص في

بيت الزوجية، انتي مركز البيت وسبب التوازن يعني باختصار رمانة

الميزان!

ولاحظي الفرق بين إنك مهمة وبين إنك أهم، ولما تفهمني إنك أهم

واحدة في بيتك؛ لازم تتعاملى مع أهميتك دى بطريقة صحيحة علشان

البيت يقدر يكمل بشكل سليم، لازم تهتمى بنفسك يعنى (صحتك الجسدية - وصحتك النفسية).

صحتك الجسدية :

*لازم ييقالك مواعيد نوم واستيقاظ، يفضل إنك تنامى بدرى وتصحى بدرى، أفضل حاجة إنك تقومى الفجر تصلى ومتناميش تانى، ولو عاوزة عملي غفوة يبقى قيلولة بعد الظهر لمدة ساعة، متناميش في أى وقت تانى من اليوم مهما كنتى مرهقة؛ لأنه هياثر بالسلب على باقى يومك، ونامى الساعة عشرة بالليل على الأكثر، ده الجدول المثالي لو مقدرتش تطبقه بالظبط حاولى تكونى قربه منه .

ملحوظة : المواعيد دى الأفضل لكن لو مش مناسبة ليكي لأسباب تتعلق بعمل جوزك، زى إنه بيرجع متأخر يبقى انتى محتاجة جدول مخصوص، وده ممكن اعمله معاكى وأساعدك فيه من خلال حجز استشارة.

تنظيم مواعيد النوم والاستيقاظ دى 30% من نجاح الإنسان في العموم والنسبة دى ممكن تزيد في حالات معينة؛ لإن حياة الإنسان

عبارة عن وقت، ولو منتظم مش هيلاقى حياته، وأكد علشان تنظمى مواعيد نومك لازم تنظمى مواعيد نوم ولادك؛ لأنك مش هينفع تنامى وتسبيهم صاحيين، وأفضل وقت لنومهم يبقى الساعة، تسعة علشان تبقى مطمئنهم إنهم ناموا واستقروا في نومهم قبلك بساعة، والحيل كتيرة علشان تعرفى تثبتى معاد النوم ده عندهم، أبسط الحيل دى إنك تصحيحهم وتطبقى معاهم لحد معاد النوم، أو تصحيحهم بدرى في الميعاد المطلوب ومتسمحيش بالنوم أبدا أثناء النهار، واخدة بالك إنك شخصية حقيقية بتاخذ قرار وبتصر على تنفيذه؟ مش تقوليل أصل مش بيردوا يناموا! نيمهم يا سعاد ... اعملى خطة وصرى على تنفيذها، وأنا عملتها كتير وونجحت كتيرررر... نيمى العيال يا سعاد .

*لازم تلعبى رياضة يومية، وخصوصا تمارين البطن والقطنية، ويغنيكى عن كل التمارين تمرين واحدة اسمه الاسكوات، دورى على جوجل هتلاقى صورته وطريقة تنفيذه، وبعد شهرين من المواظبة على الاسكوات ادعيل ، تمارين البطن متبتدش فيها بعنف، كويس جدا تبدئى بخمس أو عشر عدات وكل يوم تزودى اتنين، المهم أن يومك

ميخلاش من الرياضة، وهى مش محتاجة أكثر من عشر دقائق في اليوم،
اعملهم أول ما تصحى .

*لازم تفطرى... دى أهم وجبة في اليوم، افطرى ومتاكلش تانى
طول اليوم لو حبيتى، لكن مينفعش تفوتى وجبة الفطار أبدا، انتى لسه
صاحية والماكينة عاوزة بنزين علشان تشتغل، ولو مفطرتيش هتخدى
من مخزون صحتك، وتبتدى رحلة الأمراض... ربنا يحفظكم جميعا،
العشاء يبقى قبل النوم بساعة على الأقل.

مراجعة سريعة: يبقى صحيتى بدري ولعبتى الرياضة بتاعتك
وفطرتى ثم (حاجات كتيررر) وبعدين نمى في معادك الثابت .

الصحة النفسية :

*اول ما تسمعى نفسية افتكرى ربنا علطول، مفيش صحة نفسية
من غير طاعة؛ لإن عدم العبادة غربة، والغربة وحشة والوحشة صعبة .
والعبادة لها أشكال كتير جدًا تقدرى تختارى منها اللي يخليكي في
دائرة العبادة بشكل مستمر (الصلاة أساسى - الصوم - الذكر - قراءة

القرآن - الأمر بالمعروف والنهي عن المنكر - الصدقة - بر الوالدين -
إطعام الطعام - صلة الأرحام - إصلاح ذات البين - تعليم القرآن
للأطفال...)

أغلب الأعمال دى سهلة ومش محتاجة تفرغ ، تقدرى تذكرى الله
وانتى بتطبخى أو بتغسلى المواعين، تقدرى تعملى بر وصلة رحم بمكالمة
تليفون مدتها خمس إلى عشر دقائق، تقدرى تعملى إصلاح ذات بين
بمجرد إنك تقولى خير لما تسمعى مشكلة اختك مع جوزها، تقدرى
تحتسبى نية صالحة وانتى بتطبخى إنها إطعام طعام، تقدرى تقرأ قرآن
من حفظك أثناء الأعمال اللي مش محتاجة تركيز، اللي بتعملها بشكل
ميكانيكى، ممكن تصومى يوم اتنين أو خميس مرة واحدة فى الشهر،
تقدرى تأمرى أولادك بالمعروف وتنهى عن المنكر، يعنى بدل ما تقولى
عيب قولى حرام فيما يتعلق بالأمور الدينية زى الكذب والفتنة والغش
وخلافه، حفظى أولادك قرآن وأحاديث من حفظك ده عمل صالح
ونهر حسناتك جارى.... العبادات دى هتفرق فى نفسيتك جدًا لإنها
عبارة عن مغسلة للروح بالمعنى الحرفى.

- لازم ييقالك وقت فاضى لنفسك، الوقت ده على الأقل يكون 45 دقيقة، تعملى فيهم حاجة بتحببها (ارسمى ... لوني ... غنى ... ارقصي ... اقرى ... اعملى جلسة تأمل) متعمليش أى حاجة خالص حتى، بس لازم ييقالك وقت لنفسك، اختارى الوقت ده حسب جدول يومك، وحسب طبيعة شغل جوزك ومذاكرة أولادك هاتيلك شيكولاته أو اعمليلك مج نسكافية أو فنجان قهوة واقعدى استرخى وحسى بالانطلاق .

- نمى مواهبك واتعلمى مهارات جديدة وزودى ثقتك فى نفسك (هقولك طرق كتير فى الموضوع ده) نمى اللغة الي انتى بتحببها أو اتعلمى لغة جديدة، اتعلمى أعمال يديوية مفيدة، طورى طريقة طبخك، اتعلمى حاجات جديدة فى فن التريبة الي مبيتهيش، واللى هفضل طول عمرنا نتعلم فيه ومنجيش آخره، قوى ثقافتك الدينية والعامه، حاولى تدى لنفسك فرصة للابتكار والإبداع، كل ده هيفرق فى نفسيتك جدًا، الإنسان الفاضى أو المشغول فى لا شيء ديبا مكتئب، والإنسان المنتج هو أقرب الناس للصحة النفسية.

- مركزيش في كل حاجة، أحياناً السلبية بتكون هي عين الإيجابية،
يعنى مش ضرورى كل غلط من أولادك يقابلها توجيه منك، لازم
تسبيلهم أحياناً حرية الخطأ والاختيار وتدى نفسك فرصة السلام
النفسي، احنا اتفقنا إنك أنثى وأم وزوجة، الشاويش عطية خلاص طلع
منك .

- اقرى ديبا في السيرة النبوية وسير الصالحين؛ علشان هتحسسك
بالأمان والأمل وهتوصلك لسلام نفسي واطمئنان عجيب، هتلاقى في
قصصهم إن الدنيا لسه فيها خير، وإن ربنا رءوف بعباده، وإن الحياة
مش نهاية المطاف، وإن في لذة في التضحية والصبر أكبر من لذة الأخذ،
هتحسي بهوان الدنيا فمش هتتعلقى قوى بيها، ومش هتتصدمى قوى
فيها، هتشوفى المواقف الصعبة اللي اتعرضوها فهتعرفى إنك في نعيم
ولسه ممرتيش بابتلاً حقيقى فتقدرى تشكرى ربنا بقناعة .

- لو بتشتغلى علشان تحققي ذاتك ، وتشعري بكيانك، ويبقى
معاكى فلوس تقدرى تعتمدى عليها - لما إن شاء الله ربنا يكرمك
وتطلقى - اقعدى فوراً وحققي الكلام ده في بيتك؛ لأنه ذاتك الحقيقية؛

ولأن الشغل يبسحب عمرك، لأن الأم والزوجة الناجحة أهم وأفضل وأعظيم من خمسين عالمة وخبيرة، أما لو كنتى بتشتغلى علشان تحسنى دخل الأسرة وتشتروا حاجات وتساعدى جوزك فى تكاليف الحياة الغالية الصعبة، فاقعدى برضوا من الشغل فوراً علشان دى مش شغلتك ولا مسؤوليتك ولا مطلوب منك تصرفى على حد طالما فى عصمة راجل، أما إذا كان العمل ضرورة شرعية فهنا نقول ربنا يعينك ويحافظ عليكى وعلى قلبك وصحتك ونفسيك، الست اتخلقت علشان تطيع راجل واحد، الشغل بيعرضها إن يتحكم فيها أكثر من راجل: المدير والمشرف والمسؤول إضافة للزوج، الكلام ده بيعملها نوع من الكمون والثورة، فبتثور فى أوقات غير مناسبة فى أماكن غير مناسبة مع الشخص غير المناسب، عمل المرأة بيضيع حياة المرأة، ويظلمها فى المقام الأول، وافتكرى إن أولادك مش محتاجين يدخلوا مدارس لغات قد ما محتاجين لما يرجعوا يلاقوكى منتظرهم وانتي بكامل صحتك النفسية، ومش محتاجين يلبسوا حلوق قد ما محتاجينك تحتوى مشاعرهم وتوجهيهم، يعنى متشتغليش إلا فى حالة الضرورة القصوى فقط، أما

موضوع إنك بتأمنى نفسك من غدر الزمن والزوج فكلام فارغ تماما، الرزق بيد الله وحده ولا يحتاج إلا للسعي، مهما غدر بيكي الزمان مجرد ما تسعى ربنا يتكفل بإيصال رزقك ليكى كامل، وافتكرى إن الرزق مش كله فلوس، الستر والصحة والأمان والحب وراحة البال كل ده جزء من الرزق، وخلي إيمانك ديبا بنص الحديث ده: "أَنَّ مَا أَصَابَكَ لَمْ يُكُنْ لِيُخْطِئَكَ، وَأَنَّ مَا أَخْطَأَكَ لَمْ يَكُنْ لِيُصِيبِكَ"

الشغل ممكن الإنسان يترفد منه في لحظة، ممكن يعمل حادثة ويستغنوا عنه، ممكن يحصل أزمة اقتصادية ويصفوه، مفيش حاجة اسمها تأمنى نفسك بالشغل، في ألف طريقة تأمنى بيها نفسك، يعنى انتى لو عاوزة تأمنى أولادك تسييلهم فلوس ولا تربيهم كويس؟ ابنى ابنك ومتبنلوش .

أغلب النساء بتشتكى إن معندهاش وقت؛ لكن في الحقيقة هى عندها وقت كتير بس عندها سوء في التنظيم والأولويات، حاولى تستعملى التركيز على المهام، بمعنى إنك بتذكرى للأولاد يبقى تقعدى

تذكيرهم ومتعمليش حاجة تانية مع مذاكرتهم، مش تقولى للابن اكتب ألف وتقومى تبصى على الحلة، وتقوليله حل الجمع وتقومى تشطفى الغسيل، في مهام محتاجة تفرغ علشان تنجزى في وقت قصير وفي نفس الوقت تحدى نتيجة رائعة، الواجب هتكتبوه في ساعتين لو مش مركزة، ومش هيفهمه، وهتخلصوه في تلت ساعة بالتركيز وهيطلع فاهم ومستفيد، اتعلمى طرق جديدة في التدريس لأولادك هتساعدك إنهم يجبوا المذاكرة... حولي المذكرة لعملية ممتعة .



(6)

الجنس

من رأيي هذه أهم حلقات السلسلة
موضوع مكمل لفصل "الرجل متعدد العلاقات"

تهديد:

كثير أو معظم وأغلب المشكلات الزوجية سببها الجنس، والمشكلة
دى من الطرفين، الجهل الجنسي من جهة الزوجات والجهل أو العجز أو
الضعف الجنسي من جهة الأزواج، أصبح من الأمراض المنتشرة بكثرة،
بجانب قلة جودة المنتجات الزراعية والعادات السيئة في الأكل، فالأكل
بقى مبيوصلش الدم للأطراف، زمان كانت حزمة جرجير كافية لإقامة
ليلة سعيدة، دلوقتى الموضوع بقى محتاج تقريباً نص فدان جرجير!

ملحوظة هامة: علشان نمنع سوء التفاهم ونقطع الطريق على
المتصيدين، المشكلة دى فى الطرفين الراجل والست، وأنا هتكلم من

ناحية الست؛ لأن السلسلة دى الهدف منها في المقام الأول توعية الست، أى حد يحس إن في كلام محتاج يتوجه للرجال ياريت يتفضل مشكور ويوجهه بنفسه للرجال وينزل بيه كتاب، ويقوله اللي هو عاوزة، أنا بوجه نصايح في الكتيب ده للستات.

نسبة الضعف الجنسي عند الرجالة لو قابلها نسبة مساوية أو متقاربة من الضعف الجنسي عند الستات؛ المشكلة مش هتتفاقم، وهتفضل في نطاق السيطرة، لكن الواقع إن الستات معندهاش ضعف جنسي ولا حاجة، بل بالعكس ربما يكون عندها طاقة جنسية زائدة، ورغم طاقتها دى عندها جهل جنسي مضاف إليه غباء عاطفى ومن هنا الدنيا بتبوظ خالص.

في حقائق صادمة كتير هتقابلكم أثناء قراءة الفصل ده، حاولوا تفهموا، أو استفسروا؛ لإن الاستهزاء أو الإنكار أو الاستسلام للأوهام مش هيزود المشكلات إلا تتفاقم، ومن أمثلة الحقائق الصادمة إن الرجال العاجز جنسياً أو الضعيف جنسياً، بردوا عينه زايغة وبتاع ستات!

احنا عندنا مشكلات ثقافية كثيرة جدًا جدًا جدًا في مجتمعاتنا العربية، ومن ضمنها إن العجز الجنسي في حق الرجل هو عار وشنار ويستحق المعايير والاختباء! لذلك الرجل اللي بيعانى من المشكلة دى بتلاقوا إن من الصعب أو من المستحيل إنه يعترف بيها، وتلاقوه بيحاول بكل جهده يرميها على الطرف التانى، يقولك هى اللي مش حلوة، أو مبتعرفش تثيرنى، أو هى باردة أو ... **وده يخلينا نروح لطريقيين:**

الأول: إنه مش بيتعالج، ما هو هيتعالج ليه ما هو زى البمب والعيب فيها!

التانى: إنها بتشك في نفسها وبتفقد ثقتها في شكلها وجسمها وطريقتها وتكره العلاقة الحميمة وبناء عليه تكره الدنيا كلها.

وبما إننا ديما بنقول الست كتلة مشاعر، يبقى الطبيعى والبديهي إن الجنس - اللي هو كله مشاعر - يكون عند الست له مذاق خاص وتأثير كبير على حياتها بشكل عام، يعنى استمتاع المرأة واحتياجها للجنس أكبر من الرجل، لكن ووفق الحلقة الفسيولوجية - طبيعة الجسد - المرأة

بتقدر تستحمل فترات أطول من عدم الممارسة، لكن لما يحصل؛ بتبقي
عاوزه جنس نموذجي مثالي يشبع كل رغباتها ويعوضها عن طول فترة
الغياب.

الكلام اللي فات ده يخلينا نفهم إن مش عيب الست تحتاج للجنس،
مش معناه إنها مش متربية وعديمة الأخلاق وبجحة، الست اللي
بتحتاج للجنس بشدة هي ست متفجرة الأنوثة والنعومة والإحساس،
مش إنها واحدة مش متربية! بقولك الكلام ده وهعيدهولك كثير كثير
كثير جدا، علشان ده عمود من أعمدة ثققتك بنفسك، لإن الزوج
الخجول أو عديم الخبرة الجنسية أو اللي عنده مشكلة في الجنس غالبًا
يهرب بالطريقة دي، هيقولك هو انتي مبتتكسفيش؟ انتي متربتيش؟
ازاي تتكلمي في الحاجات دي؟!

طول ما انتي بتطلبي الجنس بطريقة شرعية محدش ليه عندك حاجة،
واللي يتهمك بإي اتهام اعرفي إنه جاهل غبي عديم الفهم والدين كمان،
زي اللي تبصلك كده وتقولك مالك مستعجلة على الجواز كده ليه! وهي
تقصد تقولك مالك هو انتي عاوزه جنس زي البنات اللي متربوش!

أنا في السلسلة دى بنى ثقافتك وذكائك وثقتك بنفسك، عاوزك تطلعى منها إنسانة جديدة، عندها رؤية، وحكمة، وفهم للواقع ومعاها طرق كتيرة للتعامل معاه، يعنى مش عاوزة تستعجلي، ولا عاوزك تبقى ملهوفة أقولك حلول؛ لاني لو قلتلك حلول من غير ما ابني ثقافتك مش هتقدرى تنفذى الحلول بشكل سليم ومش هتثمر معاكى أى ثمرة، وهتفضلى تسألنى وعمرك ما هتوصلى لإجابة تجيب نتيجة، بلاش تختارى الطريق السهل اللي مش هيوصل لنتيجة، اصبرى واتعلمى وافهمى واسألنى لحد ما نكون ثقافتك، وبعدها انتى هتعرفى الحلول لوحدك، بس أنا برضوا مش هسيبك أنا هقولك الحلول.

أنا هشرحلك الراجل تشريح وافى، بس الأول عاوز اطمئن على أدواتك، علشان أنا هشرحه وبعدين هتيجي تقفى مكانى وتلميه انتى تانى، فلازم أكون مطمئن إنك هتعرفى تلميه بعد ما أنا ابعتره، مش هنسيبه متبعتر كده ونمشى احنا الاتنين!

تعالى نعمل مراجعة سريعة:

• الجنس عند الست أهم من الراجل، لكن هى عندها القدرة إنها تقعد فترات طويلة من غير ممارسة وهو لاء.

أهميته عندها أهمية نفسية بيولوجية، وعند الرجل هي عملية بيولوجية في المقام الأول.

• العلاقة الحميمة هي تفرغ مريح للرجل لكنها حياة كاملة للمرأة.

• الست اللي بتحب الجنس ست طبيعية، الست اللي بتحصل على الجنس هي ست مستقرة نفسياً أكثر من التي لا تحصل عليه، الجنس عند الست مجموعة من الأمور (مشاعر واحتكاك وأمل وأمان وهروب ونشوة وشعور بالأهمية و و و و).

• الجنس عند الرجل في مقامة الأول الاحتكاك حتى التفرغ.
• الجنس عند الاتنين مش عيب في حق الاتنين؛ لأنه نابع من طبيعتهم الخلقية اللي هما ملهمش أي دخل أو يد فيها.

• في راجل بيرتقى بمستواه فيوصل لتذوق الجنس من جميع الجهات.

• من حقتك تحصل على الجنس، مش عيب إنك بتحتاجي الجنس.

• لو مش بتحتاجى الجنس أو مش مهم نهائى عندك زى ما بتدعى، فانتى مريضة وعندك مشكلة، ولازم تراجعى طبيبة نسا ثم طبيبة نفسية للوقوف على أسباب الخلل، دى حاجة عيب فى حقك كامرأة مش حاجة تمشى تفتخرى بيها!

لما الست بتبص لرجال خائن أو راجل متعدد العلاقات بتسأل سؤال منطقى غاية فى السذاجة والطيبة، تقول: طب ما هو متجوز! طب ما هو عنده مراته! طب ما هو عنده الحلال! ليه يسييه ويروح للحرام! السؤال ده مجنن الستات، لذلك أنا هجاوب عليه بمنتهى الصراحة والوضوح و- الفجاجة - عارفين ليه بختار معاكم الفجاجة؟ علشان مينفعش نبقى فى القاع ومنصرخش علشان حد يطلعنا، لازم نصرخ، لو اتكلمنا بهدوء فى القاع محدش هيسمعنا، القاع عميق ومظلم.

محمد فوزى بيقولك حاكم الزهور زى الستات لكل نوع "معنى ومغنى"، هل انتى بتعيشى طول عمرك بلبس واحد؟ أو بتاكلى نوع واحد من الطعام؟ طيب ليه بتنوعى؟ علشان بتزهقى .. صح؟

تنبيه: اوعوا تنسوا إن السلسلة موجهة للستات ها، مش عاوز السؤال بتاع طب ما هي كمان عاوزة تنوع واشمعنى هو لو تعباه يروح لغيرها وهي لأ والكلام الفارغ ده، لما أكلم الرجل - ده لو كلمته - هبقى أقوله كل حاجة إن شاء الله، أنا بكلم الستات دلوقتي.

يبقى بما إنك شايقة الستات زهور، يبقى صدقي إن لكل نوع منهم - معني - يعني طعم، ومعني: يعني طريقة في الاستحواز عليها. ربنا لا يأمر إلا بما يُستطاع، تفتكرى أنا هأمرك بما لا يُستطاع؟! ابقى مش عاوز أفيدك لو طلبت منك المستحيل.

أى حاجة نقولها في النصايح افهمى انتى اتوماتيك إن المقصود - في حدود استطاعتك - يعني مش مطلوب منك تموتى نفسك يعني، وخذى القاعدة دي اكتبها في ورقة وعلقها في رقبتك: عمرك ما هتقدرى تكفى راجل عينه زايغه وبتاع ستات أبداً أبداً أبداً.

لكن تقدرى تعملى الي عليكى، تقدرى تمتعى نفسك معاه، تقدرى متشركيش معاه في الغلط، تقدرى تبقى الملكة عنده والأولى في حياته، تقدرى تكونى رمانه الميزان ومسك البداية والختام.

يعنى مش عاوزك تستغري ليه ساب مراته وراح لغيرها، ليه ساب
الحلال وبص للحرام، ليه ساب الجنس الأمان وراح لجنس ممكن يعرضه
مش بس للأمراض لكن للمصايب كمان.

انتى متقدريش تكونى كل الستات، لكن تقدرى تكونى ست جميلة،
انتى ربنا خلقك جميلة زى ما ربنا خلقه جميل وهو ضيع جماله، مش
هتقدرى تكونى كل النساء لكن تقدرى تكونى من أفضل النساء.

الراجل زى ما بيحب يكون طالب بيحب يكون مطلوب، وبها إن
الجنس من حقك، وإنه مش عيب لو احتجتيه، يبقى اطلبى، اطلبى يا
سعاد، اطلبى لما تكونى محتاجة، علشان يعرف إنه مالي عينك، علشان
يتأكد إنه وحشك، علشان يشوفك بالصورة اللي بتعجبه وتجننه، ده مش
ضد الحياء أو على الأقل مش عيب في حقك ولا إساءة ليكى، طلبك
للجنس بيخليه فرحان وحاسس إنه ديك البرابر.

أحيانا اطلبى باللبس أو بالنظرات، وأحيانا برضوا لازم تطلبى
بشكل مباشر، ده مش ضد كبريائك لكن ضد غبائك.

أکید مع مشاغل الحياة وظروف الشغل القاسية ودوشة الأطفال كلنا
معندناش طاقة إننا نبقى ممتازين كل وقت، مش ديما عندنا طاقة إننا
نعمل الحاجة على وجهها الأكمل، واحنا اتفقنا إن الجنس عند الراجل
في المقام الأول تفریغ وللأنثى مشاعر وحاجات تانية كتیر، یبقى هو
سهل ديما یوصل لهدفه وانتي مش ديما هتقدری توصلی لهدفك، وهن!
عاوز أقول شوية حاجات مهمة:

• لما يكون متخاصم معاكى ومش بيكلمك ويتعامل بطريقة
وحشة، ويجيلك بس علشان محتاج منك جنس، دى حاجة كويسة وفى
صالحك، ومن مصلحتك إنك تلييها حتى لو هترجعوا بعدها متخانقين
تانى؛ لأن ده معناه إنه مش قدامه غيرك، أو مش عاوز يروح لغيرك، أو
إنك مكفياها، يبقى انتى متدفعيهوش للغلط .

• **ثانيا:** ده مش عيب فى حقك، مش زى بتوع الشعارات ما
يقولوا انا مش حيوانه ويجيل وقت مزاجه بس!

هتبقى أقل من حيوانه لو طلبك ومستجبتيش؛ لأنه إما هيغصبك
ويغصبك تقريباً وياخذ غرضه غصب عنك بمنتهى الحيوانية؛ وأکید

دفاعك مش هيكون قوى لدرجة إنك تخرمى عينه مثلاً؛ لأنه مش واحد غريب من الشارع بيعتصبك، أو إنه هيروح يدور برة بضمير مرتاح، ومش ممكن يحس بتأنيب ضمير وهو بيعمل كده، أو هو راجل صاحب دين، هيسكت ونظرته ليكي هتختلف، مش هيشوف إنك الأمان بتاعه، وخلينا نضرب مثل: يعنى لو طفل عمل حاجة غلط وأبوه عاقبه وخاصمه والطفل ده اتعرض لمشكلة بعدها، أول حد هيفكر فيه مين؟ أكيد أبوه رغم إنه ضربه أو في بينهم خصام، طيب لما يروح لأبوه المفروض ينقذه ولا يتخلي عنه ويقوله مليش دعوة علشان أنت مبتسمعش الكلام؟

• ده يخلينا نقول إن لازم نظرتك لحياتك الزوجية تختلف، انتوا مش أعداء ومش أنداد ومش أجزاء متشاكسة، انتوا كيان واحد اسمه علاقة زوجية، ممكن ووارد جداً وطبيعى يحصل مشاكل، لكن في النهاية انتوا جسد واحد إذا اشتكى منه عضو تداعى له سائر الجسد.

• وطالما في عضو عنده اشتكى وبها إنكم جسد واحد يبقى لازم يهتم له باقى الجسد.

• **هعيد تانى:** لو طلبك وانتوا زعلانين ومتخانقين أو لو صالحك بس لمجرد إنه محتاج منك جنس ... اديله.

• اديله بس من غير مزاج، اديله بس أقل ما بتديله في الأيام العادية، اديله وحسسيه إنك زعلانه، بس في كل الحالات اديله.

• امتناعك عنه هيزود المشكلة مش هيحلها، هيخليه عصبي أكثر، مشتت أكثر، هيتلكك أكثر، وخلي بالك إن المشكلات لازم تتحل بعقلانية مش بالخواطر، يعنى لو انتى امتنعتى علشان يصالحك، وهو بالفعل استجاب وصالحك علشان ياخذ غرضه يبقى في النهاية المشكلة متحلش، هو بس نصب عليكى! ولو كان زعلان هو لسه زعلان بس بيهادك علشان ياخذ غرضه، فانتى علشان ذكية وعلشان عندك كرامة وفهم، اديله دون شرط، أما المشكلة فنقعد زى الناس المحترمة نتكلم ونتناقش فيها لحد ما نوصل لحل، وخلينا اضربلك مثال تفهميه كويس: لو هو قتل المصروف علشان يخليكي تعملى حاجة انتى مش مقتنعة بيها هتعملى أيه؟ هتعملها بس برضوا وانتى مش مقتنعة صح؟ وهتتهزى

أى وقت يغفل فيه وتعملها صح؟ يبقى المشكلات لا تحل بالضغط فقط، لكن في بعض المشكلات بتحتاج للضغط علشان تتحل، ودي هتيجي وسط السلسلة الزوجية وهنقولها.

شعورك بإنك ست جميلة ده شعور كافي إنه يرفع ثقتك بنفسك لمستوى كبير جدًا، يبقى وانتي بتحاولى تكونى جميلة، كونى جميلة لنفسك في المقام الأول، اهتمى بنظافتك الشخصية علشان دى ألف باء جمال، اهتمى بأنوثتك وكونى دلوعة ولو مش عارفة اتعلمى، رقصي صوتك، مثلى، مثلى لحد ما تتعلمى مش عيب، صاحبي البنات الدلوعة واتعلمى منها مش تترىقي عليهم! اتعلمى الدلع في الكلام وطريقة مشيتك في البيت، اتعلمى الدلع في الزعل وفي العصبية، ومارسي ده كله وانتي لوحدك مش لازم قدامه، ما احنا قلنا لنفسك في المقام الأول، وعلى فكرة مش عيب، مش عيب تبقى مش عارفة وتتعلمى، مش عيب تبقى ناقصة وتكملى، مش عيب تبقى جاهلة وتتعلمى، والله ما عيب، الكبر مانع من الجنة ومانع من الحياة.

لو قلنا مفيش دلوعة عنيدة فأنا بقول مفيش أنثى عنيدة، أول ما تعندى تفقدى أنوثتك فورًا وبعدها تفقدى كل شيء، تبقى عبد الجبار صاحبه، العنيد هو أسوأ شخص ممكن نتعامل معاه؛ لانه شخص بعيد تمامًا عن المنطقية، وهو الشخص الوحيد اللي يفقد كل شيء ويبضيع منه كل شيء، الغبى بيخسر كتير لكن العنيد بيخسر (كل شيء)، العنيد ممكن يكون بيعند علشان كرامته، أو علشان يتصالح أو علشان يمشى كلامه، فيخسر كرامته ويبدبوحها ومحدش بيعبره ولا بيصالحه ومحدش بيمشى كلامه، أنا عن نفسي لما بعرف إن اللي قدامى عنيد بستمع إنى أكسره، إياكى تكونى عنيدة.

والعند صفة ذكورية في المقام الأول، إذا تخيلنا إن العند ده إنسان فهو واحد أشعث الشعر، محمر العينين، متسخ الأقدام يرغى فهمه ويزبد، رائحته منفرة، هل يمكن أن ينطبق هذا التصور مع أى نوع من أنواع الإناث؟!

وهل كفار مكة منعهم عن الإيمان بالله وصحبة الرسول والامتثال له ودخول الجنة غير الكبر والعناد؟ (قَدْ نَعَلْنَا أَنَّهُ لِيَحْزُنَكَ الَّذِي يَقُولُونَ فَإِنَّهُمْ لَا يُكَذِّبُونَكَ وَلَكِنَّ الظَّالِمِينَ بِآيَاتِ اللَّهِ يَجْحَدُونَ)

يبقى أنا عاوزك النهاردا تطلعي من الفصل ده بشوية حاجات:

1. إن أنا موجه السلسلة دي للحديث مع المرأة مش الرجل.

2. الرجل العاجز جنسياً أو الضعيف جنسياً، بردوا عينه زايغة

وبتاع ستات، أو بيحاول يظهر كده علشان يغطى على نقص عنده
بيعتبره المجتمع جريمة في حقه.

3. نظرة المجتمع الخاطئة للرجال الضعيف جنسياً أو العاجز

جنسياً هي أقوى الموانع من العلاج، يعني هو مبيعترفش ومش بيتعالج
علشان الناس متكلش وشه، علشان فاهم إن لو حد عرف هيتعاير بقية
عمره، والناس هتشوفه مش راجل، وهيطمعوا في مراته، وهيصولها إن
جوزها مش مكفيها فهيحاولوا يتطوعوا هما ويكفوها.

4. الرجل الضعيف جنسياً غالباً مش هيعترف، وهيلجأ لحيلة

إنه يرمى العيب على الطرف التاني؛ لأن من وجهة نظر المجتمع عادى
إن الست تكون باردة أو محبب كمان ودليل عفة! لكن عيب وحرام
وجريمة لو الرجل هو اللي ضعيف ودليل قلة أو عدم رجولة، يعني

برضوا هو باصص إنه عامل معاها جميل إنه بيتهما بالبرود بدل ما يعترف بضعفه!

5. كوني منطقية علشان تعرفي تصلحي حياتك، يعني لما يتهمك بالضعف وهو ضعيف افهمي النقاط اللي فاتت واعذريه، وهنتكلم بعدين ازاي تحلى المشكلة دى، ومفيش مانع تسأل نفسك بمتتهى الحياء، هل أنا فعلا باردة جنسيا؟ طيب لو طلع إن انتى فعلا باردة، روحى اتعالجى علشان الجنس مهم جداً لحياتك وهيغيرها لما تحصى عليه، طيب لو طلع إن انتى مش باردة؟ يبقى اوعى تتهزثقتك في نفسك مهما حصل ومهما سمعتى، على فكرة أنا كعمرو يس جالى 200 تعليق يقولى أنت فاشل وبينصحونى أبطل أتكلم عن الحياة الزوجية وأبطل أنصح المرأة.

6. بالمناسبة أنا رديت على ال200 تعليق وكملت في طريقي وبكتبك دلوقتي الفصل رقم 6 وبوعدكم بمزيد من الفصول.

7. اوعى ثقتك في نفسك تتهز لمجرد الكلام السلبي، علشان كده ديمًا بقولك اعرفي حجمك، أو سبيني أعرفك حجمك، علشان لما

تعرفى حجمك كويس عمر ما حد هيقدر يهز ثقتك في نفسك وهتكونى واقفة على أرض صلبة.

8. لكل ست معني: طعام، ومعنى: طريقة.

9. الستات مش واحد أبدًا، والعلاقة معاهم عمرها ما هتكون واحد أبدًا في العصر المنيل اللي احنا فيه، عمرها ما هتبقى واحد والستات ماشية في الشوارع بتعرض مفاتها ومواهبها، هو الرجالة عرفت مينين؟ مش الستات هى اللي نزلت الشارع فرجته على مواهبها؟!

10. مذاق الجنس عند المرأة مختلف عن مذاقة عند الرجل، الرجل بيدوقه بشكل بسيط متدرج، أوله التفريغ، المرأة بتذوقه بشكل معقد لا متدرج تحتاج فيه كل شيء لتشعر بالرضى الكامل (مشاعر - اهتمام - لهفة - احتكاك سيطرة - خبرة بأماكن إثارتها وخبرة بطريقة مداعبة الأماكن دي و و و و و)

11. الرجل غالبًا هيتبسط بمجرد التفريغ، الست لأ.

12. سلسلة الحياة الزوجية اللي أنا بقدمها، مهمة إنها تبني ثقافتك وذكائك وثقتك بنفسك، عاوزك تطلعى منها إنسانة جديدة، عندها رؤية، وحكمة، وفهم للواقع ومعها طرق كثيرة للتعامل معاه، يعنى مش عاوزك تستعجلى ولا عاوزك تبقى ملهوفة أقولك حلول، أنا بعلمك الصيد مش بديكى سمكة.

13. أنا هشرحلك الراجل وهسيبك تتعاملى معاه وعينى عليكى برضوا، أوجهك وأعلمك، وتغلطى وأقولك الصح وترجعى تجربى تانى وتالت وألف؛ لحد ما تنجحى أو تموتى وانتى بتحاولى.

14. من حقاك تحصلى على الجنس، الست الطبيعية بتحتاج جنس، ومن حقاك لما تحتاجيه تطلبه وبمتهى المباشرة والوضوح.

15. مش مطلوب منك تبقى كل النساء ولا أجمل النساء، لكن مطلوب منك تكونى جميلة.

16. لازم ترضى جوزك، لازم تهتمى إنك تكونى الحاجة اللي هو عاوزها، كل ده - فى حدود استطاعتك -.

17. الراجل مش جاهز ديبا يديكى جنس ممتع، لكن ممكن يكون جاهز كل وقت إنه ياخذ منك جنس ممتع - جنس التفريغ -.

18. لما تديله الجنس وانتى مش عاوزة أو وانتوا زعلانين مع بعض ده مش معناه إنك حيوانه، أو إنه بيعاملك كأنك حيوانه، لكن ده معناه إنك ذكية وبتحاولى تكسبي حتى فى أصعب الظروف، وفى النهاية انتى بتطيعى أمر ربنا اللي نهاكى عن الامتناع.

19. انتوا مش أعداء ولا أنداد ولا اتنين صحاب، انتوا كيان واحد ومشروع واحد وبتكملوا بعض، ولو كان هو طرف مقصر مش ضرورى تكونى انتى كمان وحشة زيه، خليكى أحسن منه لنفسك، ماهو لو كلب عضك مش هتعضيه.

20. مفيش أنثى عنيدة، العنيد هو الشخص الوحيد المؤهل لخسارة كل شيء فى الحياة.

21. إياك والعناد.

22. ربنا خلقتك جميلة لا تنحدرى.

23. أنا معاكى ومنحاز جدًا جدًا ليكي، وبكنلك كل احترام وتقدير، بس أنا لا أملك عصا سحرية لتغير الرجال و الواقع، لكن أملك بعض النصائح كفيلة لو فهمتها ونفذتها أنها تغير واقعك وتحليه أجمل.

24. جرئتكم على طرح الأسئلة عليا في الموضوع ده هيظمني إنكم اقتنعتوا إن الجنس مش قلة أدب وإن من حقكم الحصول عليه بطريقة صحيحة ومشبعة.

25. أكيد عمرنا ما هنخلص الكلام في الموضوع في فصل واحد، وأنا مش عاوز أثقلك بالمعلومات وخلاص، عاوزك تحدى على قد ما تقدرى تستوعبى ونتوقف، وبعدها نرجع نكمل لحد ما نخلص الموضوع ونلم كل جوانبه، احنا بتتكلم عن الحياة الواقعية مش عن حياة ميكى ماوس، يبقى لازم طريقة عرض السلسلة ومحتواها يكون واقعى.



" استراحة محارب "

حتى دينا في دماغك النقط دى وانتى بتقرى هذا الكتيب:

- أنا مش جوزك.
- ومعرفش جوزك.
- ومليش أى مصلحة إنى اظبط جوزك وأخليه يدور على مزاجه.
- أنا مش الراجل اللي خانك وعذبك وضيع مستقبلك وضربك وأهانك و و و والله ما أنا، بلاش تستحضرى صورته وتصبي غضبك على.
- مفيش بينى وبينك أى عداة مسبق.
- فكرتى عنك أو اعتقادى فيكى أو فى المرأة عموما مش هيفضرك؛ لأنى أحب أفكرك إنى "مش جوزك" ولما اطلب أيدك ابقى ارفضى!
- أسهل حاجة فى الدنيا إنى أقولك نصيحة واطلع أجرى، أسهل حاجة أقولك اطلقى، بصى سهلة ازاي "اطلقى" "اطلقى يا سعاد" وارتاح ومتكلمش معاكى ساعة، هى كلمة واحدة "اطلقى" .

لكن أنا مش بكلم الست دى أصلاً، الست اللي هتطلق دى عارفة طريقها ومصممة عليه، أنا اهتامي بالتانية اللي عاوزة تكمل، اللي حابة تكمل، اللي مصره تكمل، اللي مضطرة تكمل، تكمل تكمل تكمل، وبالمناسبة من الأمانة إنى لما أشوف إن مش من مصلحتها أبداً تكمل بقولها اطلقى، ولو رفضت بحاول معاها الإصلاح أو اثبتلها بالتجربة استحالة الإصلاح وأقولها تقبلى وكملى ما دام انتى عاوزة.

لو حد فيكم فاهم إن السلسلة دى عشر حلقات وأقولكم انطلقوا، فأنا بقول إنها طويلة وحلقاتها كتيرة، يعنى متستعجلوش، متسبقونيش، اهتموا بفهم ومناقشة محتوى الكتيب، مش تسيبوا الطرح وتسالوا في اللي بعده!

ما احنا هنيجي للى بعده، بس خلونا في اللي احنا فيه الأول، أنا عاوزك فاهمة مش حافظة، عاوزة مشاركة مش متفرجة، عاوز أنصحك ولما أخلص منك واطمن عليكى تكملى المسيرة، أنا بديكى منهج تتعليمه؛ وبعدين تعلميه لبتك واختك وجارتك وصاحبك وزميلتك، أنا عاوزك إنسانة حقيقية.

لو عاوز أخلص الحياة الزوجية كلها في نصيحة واحدة بس هقول
لست: افهميه واحسنى التعامل معاه وخلى ربنا بين عنيكى. شايفة
سهلة ازاي؟ دى تتشرح في حلقات كثيرة طويلة.

ولو عاوز أوجهها للراجل هقوله: اتقى الله فيها فإنك مسؤول عنها.
بصى الاختصار جميل ازاي. بس حد فهم حاجة؟

يعنى فهمتى ازاي تفهميه؟ دى لوحدها قصة طويلة، المقصود إنى
أقولك أرجوكى متسر عيش.

وعلى أى حال أنا رسالة من ربنا ليك، إما رسالة علشان تصلحي
حياتك وفق النصائح اللى بقدمها لك، أو رسالة إنك تشكر ربنا إنه لم
يبتلحك بجنون واحد زيي، يعنى تقول الحمد لله الذي عافنا، ابقى فدتك
برضوا.

افتكري ديبا إنى بعلمك الصيد، أما السمك فهناك في سوق السمك.

فوائد في الطريق:

أنواع الشخصيات كثيرة جدًا، نرجسي، سيكوباتى، شخصية إيجابية،
شخصية سلبية، انطوائية، حساسة، عصبية، ملوخية ومهلبية، في أنواع
كثيرة.

مينفعش نحكم على إن فلان شخصية كذا من مجرد إنه عمل حاجة أو كام حاجة من صفات الشخصية دى، عاوز أقولك إن دى معضلة علم النفس، وإن دى هى الحد الفاصل بين المعالج الناجح والفاشل اللي تابع الناس معاه.

علشان نوصل لنوع الشخصية هناخد وقت ومجهود وتركيز؛ لإن دى أهم خطوة، اللي هى التشخيص، بعد التشخيص كل حاجة سهلة بإذن الله، وسهلة جدًا كمان جدًا جدًا، يعنى الشخصية السكوباتية، دى تقدر تحول الحياة لنار موقدة، وتعدمها كل معنى ليها، طب أيه حلها البسيط؟ أبعد، مفيش إصلاح ومتحاولش ولو حاولت أنا مش مسؤؤل.

التشخيص هو أهم جزء فى عملية العلاج، شخّصنا صح هنعالج صح، طيب احنا بنشخص أصعب نوع من الأمراض والمشاكل على الإطلاق، وصعوبتها ناتجة عن إننا لا نملك أداة حقيقية تديني نتيجة حقيقية لا يختلف فيها اثنان وبدرجة محددة.

يعنى مفيش تحليل (دم ، بول ، براز ، لعاب ، عفريت أزرق، رنين مغناطيسي) يقولنا إن الراجل ده مريض بفقدان الأمل بدرجة 50 زبطوط مثلا، لكن عندنا أعراض وملاحظة يخلونا نقدر نوصل "لاستتاج" حقيقى أو أقرب للحقيقة، احنا بتعامل مع أصعب حاجة في الوجود (النفس البشرية) اللي العلم لا عارف يحدد مكانها ولا حجمها ولا وزنها ولا حتى ماهيتها!

يعنى طول ما هى بتبات نار تصبح رماد العلم لازم يتجنن، النفسية بيحصل فيها طفرات أصعب من إننا نفسرها، كل المعلومات اللي عندنا إنها حصلت بسبب أو بأسباب، لكن أيه هو السبب تحديداً أو أيه هى الأسباب فده في علم الغيب واحنا علينا نستنتج بالأدوات الضعيفة القاصرة اللي نملكها (التحليل والمنطق و و و و) ، والمتميز بيقدر يوصل للسبب أسرع من غيره اللي ساعات ميوصلش خالص .

لو قلنا عشرين صفة من صفات الشخصية النرجسية مثلا، مينفعش تحكم إن اللي قدامك حامل الشخصية النرجسية بمجرد توافر صفة أو

اتنين أو خمسة فيه، خصوصا إنك مش متخصص، يعنى مش بتدى أهمية أصلا لدقة الأوصاف، وبناء عليه في أفعال نرجسية بتطلع من شخص غير نرجسي وأفعال سيكوباتية بتطلع من شخص غير سيكوباتي، وهكذا لذلك قولنا نكره الفعل ولا نكره الفاعل، لو فهمنا القاعدة دي حياتنا هتختلف.

سببني بقى اطمئنك في نهاية الاستراحة دي، إن خلاصة البحث اللي بقدمه لكم دي نتيجة دراسة ومراقبة استمرت لسنوات، عايشت فيها مئات الحالات واطلعت فيها على الآلاف من المشكلات، وقرأت عدد ضخم من الكتب والأبحاث لأقدم لكم خلاصة كل ذلك.



(7)

اعرفي حجومك

(اعرف حقك .. واجبك .. حجمك) فصل محتاج فنجان قهوة وتركيز.

السلام عليكم ورحمة الله وبركاته، ازيكم يا حقيين... اتمنى تكونوا بخير

اعرف حقك .. واجبك .. حجمك، التلت حاجات دول هما أضلاع مثلث التميز، حجمك هو قاعدة المثلث اللي من غيرها مش هيثبت ولا يقف في مكان، وحقك وواجبك هما ضلعين المثلث متساوي الساقين، والخلل في ضلع فيهم بيأثر على شكل المثلث، هقولك حقوق ممكن يكون عمر ما حد قالك عليهم وكذلك هقولك على واجبات يمكن عمرك ما خدتي بالك منها، الهدف من الاتنين إنك توصلي للقاعدة بنفسك وتعرفي حجمك وتتعاملي بناءً عليها.

وفي البداية لازم نتفق الأول على معاني بعض المصطلحات، علشان في ناس لما بتسمع كلمة حجمك بيجلها جنون رغم إنهم في الحقيقة أقزام، وفي الغالب لا يساوون أوزانهم تراب، بس برضوا أول ما تقوله اعرف حجمك يتجنن! ويحس إنك بتهينه وتقصد تقلل منه.

1. لما تكون راجل كبير وواقف تتخاتق مع طفل وهو يشتمك وانت ترد عليه ويحدفك بطوبة وانت تحدفوا بطوبة، نقولك: اعرف حجمك، ومعناها هنا "انت كبير، انت أكبر من إنك تعمل عقلك بعقل طفل" انت أكبر من المكان ده.

2. ولما نلاقى واحد مهندس لا يفقه شيء في الطب وفاتح بطن إنسان بيعمله عمليه جراحية، بنقوله: اعرف حجمك: ومعناها هنا "انت مختلف عن المكان ده".

3. لما نلاقى واحد تافه مستهتر ورايح يتجوز بنقوله: اعرف حجمك: ومعناها هنا "انت أقل من المكان ده"، الحاجة المتشابهة في المواقف دى إنهم مش في مكانهم الصحيح، الأول في مكان أقل مما

يستحق، والثاني في مكان مختلف عما يستحق، والثالث في مكان أعلى مما يستحق، وكلهم خاسرون ساقطون في النهاية!

يبقى لما أقولك اعرف حجمك أنا اكيد مقصدش أوجهلك أى نوع من الإهانة، أقصد أقولك حط نفسك في مكانك المناسب، قديما قالوا لا تضع الندى موضع الحرب، ولا تضع الحرب موضع الندى، فلا تنقص نفسك قدرها فيزدريك الناس ولا تبالغ في ثمنها فيردك الله إلى أصلك.

عن أبي ذر قال قلت يا رسول الله ألا تستعملني، قال فضرب بيده على منكبي ثم قال: يا أبا ذر إنك ضعيف، وإنها أمانة وإنها يوم القيامة خزي وندامة إلا من أخذها بحقها، وأدى الذي عليه فيها . من أبي ذر؟

انه أبو ذر الغفاري صحابى جليل، قال عنه الإمام الذهبي رحمه الله :

" أحد السابقين الأولين، من نجباء أصحاب محمد — صلى الله عليه وسلم — قيل: كان خامس خمسة في الإسلام، لازم النبي — صلى الله عليه وسلم — وجاهد مع، وكان يفتي في خلافة أبي بكر عمر وعثمان ،

وكان رأسا في الزهد والصدق والعلم والعمل، قوالا بالحق، لا تأخذه في الله لومة لائم، وقد شهد فتح بيت المقدس مع عمر. "سير أعلام النبلاء" (3/ 367368)

انظر كيف يرد النبي صلى الله عليه وسلم الناس إلى أماكنهم الصحيحة ودون موارد!

تاني وأهم مصطلح لازم نتفق عليه هو "المفروض والواقع" المفروض كل الناس تحب الخير لبعض، الواقع إن في كثير بيكرهوا الخير لبعض ودون سبب، المفروض كل الناس تعبد ربنا، الواقع أكثر الناس كفار بالله، المفروض يوقر الصغير الكبير، الواقع مش ديبا بيوقر الصغير الكبير، المفروض يرحم الكبير الصغير، الواقع مش ديبا ، هل فهتم الفرق؟

أوضح اكثر: المفروض إن كل الأمهات تعلم بناتها ازاى تتعامل مع جوزها، الواقع "أجب انت هل هذا ما يحدث في الواقع؟" المفروض كل أب يكون مسؤول عن مراته وعياله، الواقع "أجب انت هل هذا ما يحدث في الواقع؟"

طيب أنا بتعامل في سلسلة #الحياة_الزوجية مع المفروض ولا
الواقع؟ "مع ال--واق"

أنا بتعامل مع الواقع وبقدم حلول ذكية واقعية تصلح للتعامل مع
الواقع، مش جاي اتكلم عن المفروض! أنا أقول المفروض وانتي تقولى
المفروض ونقوم نحتفل بالانتصار العظيم اللي احنا وصلنا له إن
المفروض إن العالم يعمه الأمن والعدل والرحمة والسلام!!

أنا اتكلم عن الواقع الذى نعيش فيه، فمن لا زال لا يدرك اللحظة
الفارقة، ولا زال يعيش في مجلة ميكي ماوس فليبق هناك بعيد على الرف
وليدعنا نمضى!

تعالوا ندخل أعمق شوية ، في فرق بين "ما يحتاجه الواقع، وما
يحتمله الواقع" ، يعنى الواقع يحتاج منك أن تعمل 24 ساعة في اليوم
لكن الواقع لا يحتمل أن تعمل لهذه المدة، الواقع يحتاج أن تغير سكنك
أو تهاجر أرضك ولكن الواقع لا يحتمل ذلك نظرا لكذا وكذا، الواقع
يحتاج أن تحقق الدرجات النهائية في جميع المواد، ولكن الواقع لا يحتمل

إلا أن تحصل على الدرجة النهائية في مادة واحدة أو مادتين، هل اتضح الأمر؟

أنا أقدم "ما يحتمله الواقع" لا ما يحتاجه، بل ما يحتمله فقط، أتمنى إدراك الفارق.

كل الكلام الي فات ده جزء من موضوع الفصل ده يعنى لو كتى مركزتيش فيه كويس ارجعى واقريه تانى، علشان ده من أهم المبادئ الي لازم تتعلميها في حياتك، الفرق بين المفروض والواقع، الفرق بين ما يحتاجه الواقع وما يحتمله الواقع، لو فهمتى الحاجات دى هتعرفى أمتى تعاتبى وأمتى متعاتبيش، أمتى تسامحى وأمتى تنتقمى، أمتى تتشبى برأيك وأمتى تنزلى عنه دون قيد أو شرط!

أنا دلوقتى هتكلم عن -بعض- حقوقك و -بعض- واجباتك وهديكى واجب عمليه، والوجب هو إنك تستنتجى "حجمك".

مش عاوزك تتكلمى أو تطلبى الحقوق دى لحد ما أقولك تطلبيها وتخديها ازاي علشان متطلقيش بعد الحلقة وتخانقى مع الأهل

والأقارب، اعرفى حَقك بس، دى الخطوة الأولى، وبعدين هتكلم ازاي
تحصلى عليه سواء بالطلب واللين أو بالقوة والاجبار، ما هو مش كل
الحقوق بتطلب، في حقوق يجب أن تُحطَف زى حق الحياة مثلاً!

وكذلك واجباتك اعرفيها وخليكي ماشيه زى ما انتى، لحد ما اتكلم
ازاي تقدمى واجباتك بمنتهى النبل والدقة، وطبعاً انتى ست وفاهمة
كويس الفرق بين طبق الأكل المكسور وطبق الأكل المتذوق، وعارفة
الفرق بين المية الساقعة المشبرة والمية اللي من الحنفيه، الاتنين بيقتضوا
الغرض، بس في واحدة توقف العطش والتانية ترد الروح.

ولما تعرفى حجمك قيميه، هل حجمك قليل ولا كبير؟ طيب هل
انتى راضيه عن الحجم ده ولا عاوزة تغيريه؟ تغيريه بإنك تكبرى أكثر
ولا تصغري أكثر؟ خلى بالك احنا بتكلم برة الصندوق، بتكلم عن
ناس متميزة وهيبقوا حقيقيين، يعنى سيك من الأكلشيهات بتاعت مين
مش عاوز يبقى كويس ومين ميحبش يبقى أحسن، سيك من الكلام
المحفوظ اللي عمره ما هيوصل لحاجة، وبالمناسبة ناس كتير مش عاوزة

تبقى كويسة، ومش حابة تبقى أحسن ولا تقدر ولا حتى بتحاول. عاوز
أضفلك كمان اختيار ممكن جدًا تختاريه بصفتك إنسانة مميزة وحقيقية،
هل عاوزة تغيرى مكانك كله؟ يعنى انتى مديرة وشايفه إن مكانك
الصحيح هو إنك ترجعى موظفة أصغر تحت قيادة مديرة؟ على فكرة أنا
شخصيا عملت ده.

وبها إننا قولنا إن السلسلة دى لكل الناس، يبقى أول حق من
حقوقك هو:

• إنك تتربي وتتعلمى العقيدة الصحيحة، وفقه النساء، وفقه
العبادات لو مسلمة، فقه الأسرة وهكذا، وبالمناسبة كل ده فرض عين
يأثم تاركه!

• من حقتك إنك تتجوزى.

• من حقتك تتجوزى واحد يلىق بيكي، يعنى راجل لو انتى أنشى،
ندل لو انتى زعيمة الأندال، يبقى بالمفهوم، مسؤول لو انتى مسؤولة،
متعلم لو انتى متعلمة وهكذا، وده اللي ديبا بنشير ليه بالتوازن والتكافؤ.

• من حَقِّكَ إنَّ أَهْلَكَ يَسَاعِدُوكِي فِي حَسَنِ اخْتِيَارِ شَرِيكَ حَيَاتِكَ.

• لَوْ اتَّجَوَزْتِي بَقِيَّ مِنْ حَقِّكَ إِنَّهُ يَصْرَفُ عَلَيَّكَ وَعَلَى عِيَالِكَ، وَإِنَّهُ يَدَافِعُ عَنْكَ فِي حُضُورِكَ وَفِي غِيَابِكَ، إِنَّهُ يَحْمِيكِي مِنْ كُلِّ النَّاسِ وَأَوْلَهُمْ نَفْسَهُ وَأَهْلَهُ، إِنَّهُ يَرْتَقِي بِيكِي يَدْعَمُكَ وَيَعْلَمُكَ وَيَفْهَمُكَ وَيَأْدُبُكَ - وَكُلُّ دَهٍ فِي حُدُودِ قُدْرَاتِهِ وَفَهْمِهِ - خَلَى بِأَلِّكَ مِمَّا بَيْنَ الْاقْوَاسِ عِلْشَانَ مَهْمٍ.

• مِنْ حَقِّكَ عَلَيَّ جُوزُكَ إِنَّكَ لَوْ خَافِقَةٌ لِأَيِّ سَبَبٍ أَوْ بَدُونِ سَبَبٍ إِنَّهُ - يَحَاوِلُ - يَطْمَنُّكَ، إِنَّهُ يَحَاوِلُ يَشْجَعُكَ، إِنَّهُ يَحَاوِلُ يَسَاعِدُكَ عَلَيَّ الْإِنْدِمَاجِ فِيهِ وَالْإِنْمِزَاجِ مَعَهُ.

• مِنْ حَقِّكَ يَكُونُ لَكَ وَقْتُ لِنَفْسِكَ، وَقْتُ تَمَارِسِي فِيهِ هَوَايَاتِكَ، أَوْ وَقْتُ فِرَاقٍ.

• مِنْ حَقِّكَ يَكُونُ لِيكِي خُصُوصِيَّةٌ لَا يَعْتَدِي عَلَيْهَا أَحَدٌ.

• مِنْ حَقِّكَ إِنَّكَ مَتَشْتَغِلِيشُ بَرَّةَ الْبَيْتِ، وَلَا يَطَالِبُكَ أَحَدٌ بِالْعَمَلِ أَوْ الْإِنْفَاقِ.

- من حَقِّكَ إنَّكَ لو بتشتغلي يكون مرتبكَ بالكامل ليكي لا تُسألِي عن طريقة حفظه أو إنفاقه - ما لم تنفقا على خلاف ذلك، وما لم تطرأ ضرورة تستدعي الكشف عن النفقات وأوجه الصرف -
- من حَقِّكَ إنَّكَ تخدى فرصة كاملة تشرحي فيها وجهة نظرك وقصدك في كل موقف عملتيه واتفهم غلط.
- حقوقك أكثر من أن نحصرها؛ لذلك قلت في البداية سوف أقول بعض حقوقك وأرى أنها من أهم حقوقك، يمكنك السؤال عن أى شيء يلتبس عليك، هل هو داخل في حقوقك أم في المطالبة بالأكثر من حقوقك.

بعض واجبات:

- واجب عليك أن تكوني امرأة حقيقة.
- واجب عليك أن تكوني أنثى ناعمة وطرية.
- واجب عليك أن تكوني زوجة أمينة.
- واجب عليك أن تكوني أم رحيمة.

- انتى تصنعين المجتمع فيجب عليك أن تتقنى عملك.
- أحيانا بعض الحقوق بتتحول لواجبات! لمجرد إن واحد قصر في دوره، تعالى أضربك مثال:
- من حقتك إن أبوكى يأدبك، طيب لو هو مقمش بالدور ده واتجوزتى؟ بقي واجب عليكى تتأدي!
- من حقتك إن أهلك يساعدوكى في حسن اختيار شريك حياتك، طيب لو أهملوا الدور ده؟ واجب عليكى تحسنى التعامل مع هذا الشريك وهذا الاختيار الخاطيء.

أتمنى تكونى فهمتى النقطة دى كويس (الى مفهمش يسأل).

أحيانا بعض الواجبات مش هتقدرى تقومى بيها، يبقى لو هنقصر ميقاش كل التقصير، وطالما قصرنا نعتذر، نعتذر حتى لو عندنا سبب أو أسباب للتقصير ده، ودى أهم نقطة في درس النهاردا، ازاي تعتذرى؟

إنسان العصر الحديث لا يميل للتسامح، لكن بيحب يتتقم أو يعذب، مش الكل لكن الأكثر، والاعتذار مش كلمة، لكنه ثقافة ومهارة

في المقام الأول، في ناس كثير بتكون عاوزة تعتذر بس مش بيعرفوا ينقوا
(الوقت المناسب - المكان المناسب - الكلمة المناسبة - الأسلوب
المناسب - الصبر المناسب) وعلشان تقدر تعرف الخمس حاجات دول،
لازم يكون عندك ثقافة ومهارة الاعتذار.

تعالى نقول إن كل خطأ في الدنيا لازم يكون ليه مبرر، مهما كان، حتى
الكفر والاشراك بالله، طبيعة الإنسان كده، والطبيعة دي لما فهمها العلم
قدر يعالج مشكلات كثيرة، بمجرد إن العلم اتأكد إن كل فعل وراه
مبرر أو نية أو نية إيجابية عند البعض قدر يعالج مشكلات كثيرة، لكن
مفيش أبداً فعل بيصدر من الإنسان دون مبرر أو سبب.

لاحظ هنا إن أنا أخلط بين المبرر والسبب؛ لأن معنى الكلمتين دول

في الخطأ (ليه؟)

ليه عملت كده؟

ليه عملت كده في فلان؟

ليه عملت كده في فلان في الوقت ده بالذات؟

هتلاقوا مبرر لقتل الاطفال وبيع أعضائهم، وخيانة الأمانة، والكفر بالله، هتلاقوا مبرر لكل خطأ، دى قاعدة في الحياة لازم تؤمنوا بيها لو بتؤمنوا بالإنسان.

لكن هل كل المبررات مقبولة؟؟

الإجابة: طبعاً لا.

يبقى كل فعل ليه سبب ومبرر، لكن فيه مبرر مقبول ومبرر غير مقبول، مبرر منطقي ومبرر غير منطقي، مبرر حقيقي ومبرر وهمي وهكذا.

المبرر المقبول مش شرط يكون مقبول من جميع الجهات، ولا منطقي من جميع الجهات، ولا حقيقي من جميع الجهات، يعنى ممكن يكون مقبول عقلاً مرفوض شرعاً، مقبول شرعاً مرفوض اجتماعياً! عيدوا قراءة الجزء ده أكثر من مرة، واسألوا لحد ما توصلوا لفهم كامل في النقطة دى، لو عاوزين يكون عندكم مهارة وفن الحياة اللي جزء منها مهارة وفن الاعتذار.

تهديد:

في حالة كسوف الشمس، المفروض إن الشمس طالعة لكن عينينا بتؤكد غير كدة، والكسوف ممكن يكون في مصر ومش في أمريكا، والشمس تتحجب عن مكان ومكان تانى لأ، ومن هنا نفهم حاجة مهمة اسمها زاوية التناول "ودى ليها فصل منفرد" بس في الفصل ده عاوزين نقول إن ممكن تتعدد وجهات النظر وتكون كلها صحيحة، لكنها صحيحة في موقع ما فقط، يعنى اللي في أمريكا شايف هو وأصحابه الشمس ساطعة وبيرفض إنها تكون في حالة كسوف صح، صح طول ما هو في موقعه في أمريكا، لكن لو ركب البرق وجه مصر هيتغير رأيه فوراً، وفي الحالة دى غالباً لو اتصل بالتليفون وقال لأصدقائه رؤيته الجديدة هتلاقوهم اتقلبوا ضده! هيتهموه بالجهل وبقصر النظر، وإن العلماء في مصر رشوه وغير ضميره ونسي الواجب المهني و و و، كل ده وكل العداء ده بصدق، مش أصدقائه بيتصيدوا ليه؛ لأ هما شايفين الشمس قدمهم وهو كمان كان شايفها ازاي يغير رأيه

كده؟!!! نسوا يحطوا في الحسابات أنه غير موقعه، موقع الرؤية " زاوية التناول".

يعنى احنا ممكن نختلف وتتعدد وجهات نظرنا في الشيء الواحد، ونكون كلنا صح بسبب "زاوية التناول" أو الموقع، لكن أنا صح في موقعى وانت صح في موقعك.

مش هقدر أصدق أو أشوفك صح من غير ما أغير موقعى، يبقى هنا نقدر نقول إن الصح نسبي، عارفين العلماء لو كانوا مشيوا وار الحقيقة دى في كل حاجة كان حصل أيه؟ كان انتهى العلم!

لأن مش هيبقى في أى ثوابت في أى حاجة، انتى شيفها ضرورة عاجلة وأنا شايفها حاجة مش مهمة خالص، انتى شيفها أبيض ناصع وأنا شايفها أسود، لذلك كان لازم العلم يعتمد على أساس ثابت حتى لو كان الأساس ده مفترض!

يعنى يفترض ثبوته ويبنى لحين ما يتبين إنه خطأ، وده السبب المنطقى الجوهري في تغير العلم كل يوم، وما كان صحيح علمى بالأمس فهو خيال وخرافة يرفضها العلم اليوم!

الدين هنا يبحل المشكلة، كل مشكلة هنلاقي الدين جه بالخبر اليقين.

لأن الدين مش بيتكلم عن الآراء ووجهات النظر. بيتكلم عن الحقيقة، والحقيقة في المثال بتعنا إن الشمس جزء محدد منها في حالة كسوف، وجزء محدد منها خارج عملية الكسوف! ويمكن حساب الجزء ده بمنتهى الدقة لو توفرت الأدوات، ومش ديا هتتوفر الأدوات؛ خصوصًا في الامور المعنوية.

نتيجة مهمة: التعميم مرفوض.

إن كانت الآراء بتتعدد، وبتختلف وبتكون كلها صحيحة، لكن الحقيقة واحدة لا تتعدد أبدًا.

يعنى انتى إنسان أو حيوان، مفيش تعدد ووجهات نظر هنا، انتى عايشة او ميتة، ده ابنك أو مش ابنك، دى اسمها حقايق، لا تخضع لوجهات النظر، لذلك إذا تعددت وجهات النظر في الحقيقة افهمى فورًا إنها من باب الفلسفة.

وبالمناسبة الفلسفة حاجة عظيمة مش زى ما أغلب الناس بيقلوها
على الكلام اللي ملهوش معني، بالعكس الفلسفة عظيمة وبننت
حضارات وكان ليها قيادة العالم فترة طويلة، لكن مشكلة الفلسفة لما
بتصطدم مع الحقيقة ومبتقدرش تهضمها، أو لما بتحاول توصل لنهاية
البير رغم عمقه وظلامه، الفلسفة بتصعب الدنيا، لا تكونوا فلاسفة.
فاكرين كنا بتكلم عن أيه؟؟ الاعتذار .

ملخص:

كل اللي فات ده يفهمك، إنك هتغلط، وهيكون في سبب لغلطك،
وإن ممكن يكون السبب ده خارج إرادتك، وممكن يكون منطقي
بالنسبالك، وغير منطقي للطرف اللي انت غلطت في حقه، عارف ليه أنا
ضربت المثل ببلدين (مصر وأمريكا) مش بشخصين؟ علشان أقولك إن
هيبقى في ناس كتير شايفة نفس اللي انت شايفه - ما هو كل أهل مصر
شايفين الكسوف -، ويقولو لك إنك صح.

ملحوظة: لو التمهيد الي فات مفهمتش منه الملخص ده قبل ما

تقرئيه يبقى اقرى التمهيد تانى.

خلينى أقولك إن ثقافة الاعتذار بتقول إنك هتعتذر سواء كان سبب

غلطك مقبول أو غير مقبول، منطقي أو غير منطقي.



(8)

الهدف

خلى ديمآ عينك على هدفك علشان ممكن تنسى انتى كنتى عاوزة أيه، أكيد فى حاجات بنتظرها من الطرف التانى، وأحيانآ الحاجات دى لو طلبناها بتفقد كثير من معناها، لكن فى النهاية ده مش مبرر إننا منحصلش عليها، وفى حاجات ممكن منقدرش نخذها بطريقة مباشرة، فمفيش أى مانع اننا نلف حوليها بذكاء، يعنى انتى محتاجة اهتمام، وزى ما يقولوا الاهتمام ميطلبش، انتى ليه خايقة تطلبى اهتمام؟ علشان مش هيقاله طعم صح؟

طيب فكرتى فى طعم الإهمال؟ أكيد انتى معايا إن الإهمال طعمة أصعب، وانتى كأنتى ذكية مينفعش تسيبى نفسك للإهمال ولا تسيبى جوزك ينسأكى.

المشكلة غالبآ بتكون فى الطريقة والوقت المناسب، طيب أول حاجة حاولى متخالفيش طبيعته، يعنى انتى التجوزتى واحد مش رومانسي وكنت عارفة كده قبل الجواز، يبقى انتى متفاجئه لبيبييه؟

لكن ممكن كان رومانسي قبل الجواز وبعد كده اتغير، الشخص
الرومانسي مش بيتغير في الغالب تغير جذري، ومش تغير مفاجئ،
بياخد وقت يفضل الضوء فيه.. يقل.. يقل.. يقل لحد ما يطفى تمامًا،
أول ما تلحظي إن الشعاع قل لازم تدخل فوراً وتطلبى الرومانسية
والاهتمام.

ديما نقول ابذل من جنس الشيء يرجعلك، يعنى عاوزة الناس
تضحك في وشك اضحكى في وشهم، عاوزة فلوسك تكثر طلعي
صدقة، وهكذا، يبقى أول حاجة لازم تعملها هو إنك تهتمى، طيب
أغلب الستات مهتمة بالفعل لكن عندها مشكلة خطيرة، إنها مش
بتعرف تعرض اهتمامها ده.

يعنى انتى عملتى حاجات كتير قوى علشان خاطره، بس هو
معرفش، فالنتيجة بالنسباله إنك معملتيش!

طيب هل ده معناه إنك تتحول لإنسانة منانة معندهاش حاجة تقولها
غير المن كل ما تشوفه؟ اكيد لأ

لكن اتعلمى توصلى اهتمامك بشكل واضح، وأول حاجة في الاهتمام بالشخص هو الاهتمام بما يهتم، الاهتمام مش كله عبارة عن "وصلت الشغل يا حبيبي، خد الدوا علشان انت تعبان، " لأخلي اهتمامك حقيقي وفي مكانه المطلوب.

ملحوظة هاهة جدا: اللي جوزها شغال في مجال المبيعات والتسويق لازم تفهم إن ليه طريقة ومعاملة خاصة، أولا الله يكون في عونك؛ لأنه بيتعرض لضغط نفسي شنيع، بيتعامل مع كل الناس وهو في مكان ميسمحلهوش يرد الإهانة لو اتعرضلها، مطلوب منه يكون مبتسم حتى لو حالته النفسية في الحضيض، بيرغى طول ما هو في الشغل لدرجة بتخليه مش عاوز يتكلم ولا يسمع أى حاجة لحد تانى يوم، بيقابل عاهات كفيلة إنها تقفله يومين ورا بعض، حتى كل ده في حسابك وربنا يعينك ويساعدك.

أغلب الرجالة بيحبوا حاجتين:

1. الأكل.

2. الجنس.

3. في رجالة تالته بتتهم بحاجات تانية، دورك إنك تكتشفى

اهتماماته الأولى؛ علشان تقدرى تهتمى بيه صح.

الأكل: بيقلوا أقرب طريق للرجل معدته، المقولة دى فيها شيء من

الصحة، الإنسان لما يسيطر عليه الجوع بيتحول لإنسان عصبى، ومش

مركز، اهتمى إنك تقري عن الأكل وتسأل عن آخر الوصفات الجديدة،

اهتمى وانتي بتقدمى الأكل واهتمى بطريقة تقديمك، اعتبريها هدية

يومية، مش مجرد سد خاثة، مش واجب بتقومى بيه، لأنه اهتمام ومتعة

انتي بتقدميهم.

بطلوا سؤال بتاع اطبخ أيه بكره، هو جوزك ماله هتطبخي أيه

بكره؟!

هو لو عاوز حاجة معينة هيقل، ممكن تسأل السؤال ده لأصحابك

لاخواتك أو في جروب بنات العيلة على الواتس، عاوزينه دينا يسأل

نفسه يا ترى طبخالى أيه النهاردا، غالباً الست اللي مبتسألش السؤال ده

كثير، بتكون صاحبة قرار، وتعرف تقنع الناس باختيارها.

اهتمى بيه وهو على السفرة، واسأليه ديما انت محتاج حاجة؟ حتى لو متأكدة إنه مش محتاج، اسأليه عاوز تشرب؟ الأكل عجبك؟ أيه رأيك في المكرونة؟ أيه رأيك في الطريقة الجديدة دي؟ علشان هو ياخذ باله ويتعلم إن في وحدة منتظرة رأى أو كلمة تقدير، أو حتى تعقيب عام بإنها تقلل الملح تزود الفلفل أى حاجة، ماهو المشاركة بتتخلق من أول الحاجات الصغيرة.

الجنس: يا بختك لو هو بيحب الجنس، هيكون سهل جداً، ده اسمه الراجل المريح، بس أنا عاوزك تنسي تماماً إن آخر حاجة مهمة في الجنس هي العلاقة نفسها! أو بالاحرى الإيلاج نفسه.

الجنس ده عالم متكامل، والمرأة هي أجدر من يستطيع فهم هذا العالم، في الجنس بتشتغل الحواس الخمسة، النظر، السمع، التذوق، اللمس، الشم، كل الحواس بتشتغل وبتتفاعل بقدر إثارته، وطبيعي لو أنا حبيت أثير حاسة الشم عندك بعطر، هقربه عند الأنف مش عند الرجل مثلاً!
يعنى مطلوب منك تعرفي أن الحواس كلها بتشتغل في العملية دي، ومطلوب منك تعرفي أيه هي أعضاء الحواس دي، علشان تعرفي

هتحتطى فين العطر المثير، يعنى شعرك وخلف الأذن مكان مناسب للعطر في العلاقة الحميمة، لكن نحطه على الهدوم وبعدين نقلعها! نحط في أماكن خاصة بحاسة التذوق!

1- **النظر:** وده مسؤول عنه العين، انتى أغلب تفكيرك بيصب في إنك ازاي تخلي العين دى تشوفك حلوة! الكلام ده صح في الحياة اليومية العادية مش في لحظة العلاقة الحميمة، في اللحظة دى لازم تركزي ازاي تخلي العين تشوفك مثيرة، يعنى مش مطلوب اللانجيري يكون حلوة، مطلوب يكون مثير، علشان كده مش لازم ديا يكون عريان ومفتوح، ممكن يكون مغطى ومقفول، ممكن يكون طويل، وفي كل الحالات هو أداة واحدة من أدوات كثير!

النظرات وكلام العين، التمايل والغنج والدلع شوية مياصة يا شيخخة، تسريحة الشعر، حركات شفايفك وانتى بتتكلمي، اللهفة، كل دى أدوات الإثارة.

2- **السمع** مكانه الأذن، يعنى لما تيجي تهمسي، خليكي قريبة من ودنه، علشان يسمع ويقدر يتفاعل ويتأثر؛ لأن كلمة "بتقولى أيه... أيه..

أيه" أكيد في الوقت ده مش مناسبة! لو الأذن بعيدة يبقى لازم نعلّي الصوت، وافتكري إنها علاقة حميمة مش علاقة تقييم أخلاق!

مش لازم صوتك في العلاقة يكون رقيق وواطى على طول الخط، أحياناً لازم يكون ضعيف وأحياناً لازم يكون على أو شرس، تخيلي النغمة الموسيقية لو متنوعتش بين صعود وهبوط، يعنى دو دو دو دو دو أو رى رى رى رى.... هتبقى مجرد وش من درجة واحدة.

قولى كلام مثير يعبر عن استمتاعك واحتياجك في نفس الوقت، اوصفي شعورك، استخدمى كلمات خادشة للحياء إذا تطلب الأمر! الأهات في الوقت ده بتاخذ دور المرشد أو الدليل، اللي بيعرف الراجل هو ماشى في طريق صح ولا غلط، إنه في المكان المناسب ولا في مكان تانى أكثر مناسبة، الأهات سحر مفعوله مضمون.

3- **التذوق:** التذوق معنوى ومادى، المادى بيبقى باللسان، ده يخلينا نهتم إن الفم ميكنش ليه رائحة كريهة، وإلا هنلاقى هروب من القبلات أو تأديتها بطريقة الواجب مش اللهفة، ممكن نغسل الأسنان، أو ناخذ حاجة من مطهرات الفم بالنعناع، اهتمى إنك تستنشقى الماء لحد ما

تحسي بحرقان في أعلى الأنف علشان غسل و تنظيف و ترطيب مجرى الأنف، وده بينفع في أغلب حالات رائحة الفم الكريهة، لو سنانك تعبانة متهمليش فيها روحى للدكتور وعالجيهها، حافظى على المعجون بعد الأكل مباشرة مش بس الصبح أول ما نصحي وقبل النوم، الطريقة الصحيحة لغسل الأسنان هى بعد تناول الطعام مباشرة ، لو كلتى عشر مرات اغسلى ورا العشر مرات مباشرة؛ علشان تمنعى تخمر الأكل في سنانك، بس في الحالة دى خلى بالك من اللثة واستعملى فرشاة ناعمة، اهتمى إنك تروحي تنضفى سنانك مرة واحدة كل سنة حتى .

في التذوق المادى عاوز أنه على معرفة أماكن وضع العطر علشان مش لطيف خالص إنه يلاقى على لسانه أعلى أنواع العطور الفرنسية! بيدخل في التذوق واللمس سخونة النفس وقوته ومكانه، مثير جدًا النفس السخن القوى على الأيد، لكن أيه رأيك لو كان في الوجه؟ أكيد منفر بعض الشيء، إلا إذا كان في وقت صحيح.

مش عاوز اتكلم عن التذوق المعنوى في الفصل ده، لكن هقول فيه حاجة مهمة جدًا، التذوق عند الراجل بيتحرك بناءً على طريقة تذوق

الست، يعنى لما يحس بتفاعلك مع كل لمسة بيتدى يحاول يعرف تأثير كل لمسة وأوجه الاختلاف بين اللسات، كذلك طريقتك في التذوق بتفتح نفسه إنه كمان يتذوق، زى بالظبط لما بتشوفى حد بيأكل قدامك بشهية ريقك بيجرى.

4- **اللمس**: بالجلد، أكيد في أماكن بتتأثر باللمس أكثر من أماكن تانية، لكن كل الجلد بيتأثر باللمس، والإثارة باللمس من أروع أنواع الإثارة، لو عرفنا طريقة إثارة كل مكان، النعومة جزء أساسى من الإثارة باللمس، أمتى يحصل اللمس وازاى، أيه قبل أيه، مدة اللمس علشان الجزء ده يستجيب.

5- **الشم**: العضو المسؤول عنه الأنف، يبقى زى ما قولنا نحط العطر في مكان يستهدف الأنف وفي نفس الوقت ميزعجش أعضاء تانية، والشم مش بس ريحة حلوة، لا كمان عدم وجود ريحة منفرة، يعنى في أماكن من الأفضل ريحتها تكون حيادية، مش حلوة ولا وحشة، تخيلي لو حاولتى تشربى شاي بعد أكل مسكر جدًا، هتلاقى طعمه أيه؟ مر.. ومهما حاولتى تزودى السكر هيفضل مر وهكذا، بيدخل في الشم ريحة النفس، السواك الطري في تنقية النفس رائع.

في حواس لازم تشتغل مع بعض في نفس الوقت، اللمس مع نظرات العين، السمع مع التذوق وهكذا... كما يمكن الإبداع في هذا الأمر بإشراك أكثر من حاسة مع الأخرى ومراقبة التأثير.

(الجنس عملية ممتعة جدًا لو حصلت بفهم وحب واشتياق).

لازم تتعلمي وتقرى كثير في الجنس، معلوماتك الفطرية عن الجنس مبعثش كافية، في أماكن وطرق وحركات عمرك ما هتعرفيها بفطرتك، أغلب الرجال متعرفش الجى سبوت ولا أيه دورها ولا فين مكانها، ومش هيعرفها إلا لما يقرأ، يبقى انتى كذلك محتاجة تقرى وتتعلمي، ومامتك هي آخر واحدة تسألها في الموضوع ده، خصوصًا لو هي مش قارئة، اعتمدى في المقام الأول على كتب الثقافة الجنسية.

متحاوليش تتعلمي أى حاجة في الجنس عن طريق الأفلام الإباحية؛ لأن- كل- المعلومات الي فيها مغلوطة، حتى الأوضاع الي فيها محتاجة فترات تدريب طويلة، وغالبا مش ممتعة زى ما بيحاولوا يصوروا في الأفلام دى، هي للإثارة الذهنية فقط، يعنى فيلم مش حقيقة، واللقطة

الواحدة ممكن تتصور في ساعتين، في الآخر هي صناعة مش علاقة حميمة.

س- يعني أنا محتاجة كتالوج وأنا بهارس الجنس مع جوزي؟!

ج- لأ أنت محتاجة تتعلمى ومع الوقت والتكرار هيبقى بديهي و هتعملى من غير ما تفكرى.

س- طب أنا بحب اتعامل باحساسي بس، وانطلق ده ينفع؟

ج- لواحده لأ مينفعش، نفترض واحد يمتلك بالفطرة سرعة رهيبه في الجري، لو مبصش للطريق هيخبط في الحيطه وغالبا هيتكسر.

س- أخاف أعمل كده يقول عليا قليلة الأدب؟!

ج- طالما انتى مراته متخافيش، انتى بتستمتعى وبتعلقى جوزك

بالجنس معاكى، بس ديا اختبرى ذوقه الجنسي، يعنى متهجميش مرة

واحدة... Step by step



(9)

ها كُسر في أعوام لن يجبر في يوم واحد

اللي اتكسر يتصلح واللي "غير قابل للإصلاح" يستبدل، بس مفيش حاجة بتتكسر في سنين وبعدين تتصلح في لحظة واحدة أو يوم واحد، أغلب متابعين سلسلة #الحياة الزوجية متجوزين من فترة طويلة، مروا فيها بأخطاء كثيرة، واحنا النهاردا بنصلحها، فكان لازم أنه إن اللي قعدنا نبوظ فيه أربع أو خمس أو عشر سنين محتاجين وقت علشان نوصل للهدف المطلوب، يعنى لما أقولك إنك محتاجة تغيري نفسك وطريقة تفكيرك في سنة ده يعتبر وقت قليل.

يبقى نطلع من الكلام ده بحاجتين:

1. إن في أمل حتى لو مر على حياتك الزوجية عشرة أو عشرين

سنة.

2. إن الفترة الطويلة التي ضاعت محتاجة فترة علشان تشوفي نتيجة لكل اللي بتحاولي تصلحيه.

يبقى الناس المنتظرة إنها مجرد ما تتغير هتلاقي الطرف الثاني اتغير وخذها بالأحضان محتاجين يراجعوا تفكيرهم، ويعرفوا إن لازم يمر وقت طويل وهما بيتغيروا وثابتين على التغيير ده، وخلينى أحطك انتى نفسك في الموقف، لو انتى تعرفى واحدة قعدت تكذب عليكى عشر سنين، وبعدين جت فجأة قالت حاجة صدق، هتصدقها فوراً؟! أكيد هتشكى إن صدقها ده كذب، طب لو اتأكدتى من صدقها؛ هل هتبقى نموذج صادق قدامك لأ هتقولى هى قالت الصدق علشان في وراه غرض، أو علشان مش في مصلحتها تكذب، وهتفضلى برضوا على حرصك الأول منها، طيب اتأكدتى بعد فترة إنها قالت الصدق، وكانت تقدر تكذب، هتبتدى تستغربي، طيب قالت الصدق تانى؟ هتشكى في نيتها وتقولى أكيد ورا الصدق ده حاجة، طيب قالت الصدق تالت، هتبتدى تقري بس بحذر، طب رابع وخامس وعاشر، هتبتدى تقيمي

كلامها، بعد ما كتتي الأول مبتفكريش حتى فيه، ومجرد ما تتكلم بتقولى
دى كدابة، طب استمرت على الصدق؟ هتقولى لأ فلانة ابتدت تتغير
وهكذا...

يبقى تغيرك مع جوزك مش هيجيب ثمرة في أول يوم ولا أول
أسبوع وسيني أقولك ولا حتى أول شهر!

السر في الاستمرارية، يعنى بقالك عشر سنين بتتعامل بطريفة
خاطئة، وصلتيه فيها ألف معنى خاطئ وسىء عنك، اصبرى قدامهم
سنة على الأقل علشان يقدر يتقبلك ويرجع بالصورة اللي انتى عوزاها،
لكن لو انتى فاهمة إنك هتخدى نصيحة وتعملها فهو يقوم فوراً يحدك
بالحضن ويقولك يلا البسي هنروح ناكل برة ويحدك يفسحك، يبقى
انتى لسه عايشة في عالم ميكي ماوس.

لكن ده ميمنعش إنك هشوفى تغيرات تصبرك على الطريق، بس مش
من أول مرة ولا من أول موقف، كأنك بتطبخى رز، شوفتى ازاي
بتصبري وتراقبى النضج؟ هو كذلك.

وعلشان الفترة ممكن تطول، علشان تغيرك يبقى حقيقي مش مجرد تجربة، خليه تغيير ممتع، استمتعي وانتي بتفهمي الحياة من جديد، وبتشوفي أخطائك وبتعالجها، خليها لحظات بتسعدك مش واجب بتقومي بيه، عاوزك تحسي بالسعادة دي وانتي بتتغيري وبتعدلى طريقة تفكيرك، علشان لو سقف الطموح على من غير خطة مناسبة تشمل مدة تنفيذ الخطة هتتصدمي وهتحسي بملل ويأس وإن مفيش أمل، وهتقفي وترجعي من مكان ما بدأتى... الصفر.

الست الي قعدت سنين تضيع في سعادتها الزوجية وهدمت مساحات شاسعة في العلاقة، وبعد ما تسمع نصيحة تروح تطبقها وعاوزة نتيجة فورية، بنسميها الست الموكوسة، عارفينها؟ فلا تكوني "موكوسة".

أغلب النصايح في الحياة الزوجية فعالة ونتيجتها ساحرة، أمال مش بتجيب نتيجة ليه؟ علشان الاستعجال، وسببني أقولك إن من مصلحتك إنها متجيش نتيجة بسرعة!

لو البيت كله مبهدل ومكركب وجالك ضيف عوزه يشوفوك بشكل لائق، هتحتاجي أيه قبل ما تستقبلهم؟ هل مجرد إنك تشيل الفوطة اللي وقعه في الأرض يكفي؟ أكيد هتحتاج "وقت" علشان ترتبي كل شيء على أفضل ما يكون.

يعنى لو هو بمجرد ما انتى اتغيرتى صدقك ده مش في مصلحتك؛ لأنه هيجي بسقف طموح على انتى مش جاهزة ليه، وهيبقى فاكر إنك خلاص اتغيرتى مع إن الحقيقة إنك لسه بتبتدى، وهيبقى فاكر إنك اتغيرتى في كل الجهات، والحقيقة إنك اتغيرتى في جهة واحدة... فلا تتعجلى يا امرأة.

البلح من أهم الثمار اللي بتحتوى على عناصر غذائية مهمة ومفيدة، بل إن ممكن الإنسان يكتفى بأكل التمر ويحصل منه على أغلب العناصر اللي الجسم محتاجها، ثمرة رائعة صح؟ طيب النخلة بتكبر وتثمر بعد كام سنة؟



(10)

بتاع مصلحته

الجملة دى ناس كتير بتقولها على سبيل الدم، مع إنها جملة من أفضل
جمل المدح الي ممكن الإنسان يقولها في حق نفسه، أنا بتاع مصلحتي،
أتمنى أقدر أعلمكم تكونوا بتوع مصلحتكم، بس الأول نفك المصطلح
ده؛ علشان تاغب ناس كتير.

بتاع مصلحته مش ندل ولا مستغل، ده واحد عارف قيمة وقته
وعارف ومحدد هدفه كويس، لما نقولك احرص على ما ينفعك معناها
خليك بتاع مصلحتك، وأى حاجة أو أى حد مش يبصب في مصلحتك
ملهوش لازمة يكون موجود في حياتك وحاجز مساحة من وقتك.

هو الناس لو مبقوش بتوع مصلحتهم يبقوا بتوع أيه؟ بتوع
مصلحتك انت؟ ده في مقابل أيه يعني؟!

يعنى لما حد يقعد معاك علشان يستفيد منك؛ ماهو قاعد علشان
مصلحته، وانتي بتحاولي تتعلمي ازاي تتعامل مع جوزك علشان

مصلحتك، وبتروحي تخدى كورس انجليزى علشان مصلحتك،
وبتتعلمى كمبيوتر علشان مصلحتك، طيب يبقى لماذا الهراء؟!
بنصلى علشان ناخد حسنات "مصلحة"، بنصوم علشان ندخل اللجنة
"مصلحة"، مش بنغلط علشان مندخلش النار "مصلحة"، هو انتوا
بتنكروا أيه وبتتحدوا أيه؟!

المصلحة هى اللي بتجمع الشعوب وهى اللي بتصنع العلاقات، هو
انتى لما حبيتى جوزك مش حبتيه علشان فيه حاجات انتى عوزاها؟ ولا
حبتيه مجاملة مثلا؟ حبتيه علشان مصلحتك، وهو اتجوزك ومرضيش
يتجوز بنت خالته علشان مصلحته معاكى مش مع بنت خالته، وانتى
فضلتيه على زميلك علشان مصلحتك معاه مش مع زميلك، حتى لو
كان هو أفقر من زميلك بس بيقدملك مصلحة أهم من المال اللي هى
"فيه الصفات اللي انتى عوزاها"، يبقى حياتنا مبنيه على أيه؟ شاطورة...
مبنية على المصلحة.

مش عاوزك تقولى تانى أصل فلان ده بتاع مصلحته، إلا لو كنتى
تقصدى تمدحيه، علشان دى جملة للمدح تدل على إنه إنسان عارف هو
عاوز أيه ويحاول يحققه.

أما لو كنتى تقصدى بيها إنه انتهازى أو استغلالى فده حاجة مختلفة
ملهاش علاقة بالمصلحة، وجوزك لما يبقى رقيق معاكى علشان عاوز
حاجة منك ده مش استغلال أو انتهازية، ده الطبيعي، يعنى اكيد انتى لما
بتكلمينى على الخاص علشان تستشيرينى فى حاجة "مصلحة" بتقولى
إنك واثقة فى آرائى وإنك معجبة بكتاباتى و و و و وبتكلمى بطريقة
رقيقة وشيك علشان توصلى للمساعدة اللي هى "مصلحتك".

لازم تغيري نظرتك، الحياة مبنية على المصلحة، واحنا بنكلم بعض
وبتعامل مع بعض علشان المصلحة، أرقى العلاقات الاجتماعية سببها
المصلحة وإلا تبقى علاقة عشية، وأى مكان أو علاقة فى حياتك مش
علشان المصلحة تخلص منها فوراً وانتهى لمصلحتك.

ده مش عكس الشهامة ولا الجدعة والطيبة، بالعكس... هو انتى
عاوذة تتحلّى بالصفات دى ليه؟ علشان هى صفات نبيلة؟ طيب دى
اسمها مصلحة.

س(يعنى ممكن اصبر على حد مش طايقه علشان المصلحة؛ من غير
ما أفقد احترامى حتى لنفسى؟!

ج) أه ممكن جدآ؁ امال بتستحملوا المدام تهانى فى المصالح الحكومىة لىه؟ بتضحكوا فى وشها رغم إنكم عاوزين تولعوا فىها لىه؟ علشان مصلحتكم فى اىديها صح؟

بقى اللى جايلك علشان مصلحته وبيكلمك علشان مصلحته؁ وبيتعامل معاكى علشان مصلحته ده مش شخص انتهازى ولا مستغل و لا حاجة؁ ده شخص طبعى جدآ؁ ويستحق الاحترام إنه عارف مصلحته وبيسعى وراءها؁ وياريت لو نتعلم منه كلنا ونكون "بتوع مصلحتنا".



(11)

اتعلمي الطبخ

ست مبتعرفش تطبخ، زى عربية مبتعرفش تمشي، لمبة مش بتنور،
ولحاف مش بيدفي، ومية مش بتروى، ست مبتعرفش تطبخ هي ست
ناقصها ست، الطبخ مش نافلة من القول ولا سنة يثاب فاعلها، لكنها
جزء رئيسي من أهمية المرأة، تخيلي راجل طويل عريض شنبه حوالي متر
ونص مترين، ويعرف يجعر ويزعق بس مبيصرفش على بيته!

الأكل نوع من أنواع الفن الراقى، مش احنا قولنا إن في نوع من
الرجالة مفتاحه معدته؟ طيب خلينا نقول إن حتى لو جوزك مش من
النوع ده فهو في النهاية من نوعية البشر، اللي هي بتحتاج تاكل علشان
تعيش، بتحتاج بنزين يا لينا، يعنى خلى بالك قبل ما تطبخي من اللي
تحت الحوض!

عاوزك فنانة، استلهمي روح الفنان وانتي بتطبخي، عاوزك تحسي
إنك بتعزفي مقطوعة لبتهوفن وانتي بتطبخي السبانخ، أو إنك بترسمي

لوحة من لوحات دافنشي وانتي بتقطعي السلطة وترصي الاطباق،
عاوزك تتخيل نفسك بيكاسو وعمار الشريعى ونجيب محفوظ، عاوزك
تبدعى بالأصابع الماسية أجمل وأشهى الطعام.

بالمناسبة الموضوع ده مش محتاج "كلف يا سيدي" ولا حاجة، أنا
أكلت ملوخية مطبوخة على مية عمرى ما كلت زيها، شوف ستات
بتعرف تعمل من الفسيخ شربات، و من طبق الرز وجبة مفتخرة، ومن
قطع الدجاج المجمدة أعظم المنحوتات والقصائد الشعرية!

الست الماهرة في الطبخ بتعرف ازاى تعمل للمعدة كلمة سر ومفتاح
يبقى في ايديها، بتشفرها بشفرتها، والأكل الحلو بيغير النفسية ويخليها
حلوة، والأكل الوحش بيغيرها ويخليها وحشة، في ست بتطبخ تخليكي
تحتارى هي طبخت باديها ولا برجليها! وهل هي كانت طابخة الأكل ده
لآدمى ولا للفراخ اللي هي مربياها! في نوع من الطبخ تقدر تفهم منه قد
أيه الست دى بتقولك إنك ملكش أى أهمية ولا قيمة عندها، وقد أیه
هي مهملة وفاشلة، وتخليك تحتار ازاى تكافئها وتشكرها على وقفها في

المطبخ؛ هل تقطعها ايديها من لغالغها، ولا تحرقها على نفس العين اللي طبخت عليها؟!

انتى دلوقتى رايحة تعملى الأكل يبقى انتى رايحة معتكفك، واللى قدامك ده مش فراخ ورز وسبانخ دى حروف السلم الموسيقى، دى الألوان اللي هتلونى بيها اللوحة، والقلم المبرى اللي هترسمي بيه، انتى دلوقتى فنانة مش "ستوتة"، انتى بتقومى بعمل عظيم محتاج مهارة ودقة وقوة ملاحظة، الطبخ عبارة عن خلطة لها مقادير لو زادت حاجة بسيطة أو قلت حاجة بسيطة الطبخة فشلت، لو اتعملت بشكل روتينى وعلى طريقة العلف مش هتطلع غير علف، وخلينى أصارحك بسر مهم، إن كل الطباخين والطباخات مش سحره، ومش معاهم جن بيرشدهم، هما مجرد ناس زيك حبوا الموضوع؛ وركزوا فيه وادوله اهتمام يليق بيه فوصلوا للنجاح.

قطعى السلطة قطع صغيرة قد عقلة الصباع، مش قد راس الضفضع، اسألنى صحباتك المشهورين بطبخهم الحلو، مش تغيرى

وتتقمصي وتحقدي، وتتعاملى بعجرفة وتفضلى فاشلة، اديهم وضعهم
وانتى بتسألهم مش كأنك عارفة وبتفتكرى بس المعلومة، اشترى كتب
طبخ توصيكي بيها طباحة مش تشتري على ذوقك انتى! اتفرجى على
برامج الطبخ بعناية وتركيز؛ واكتبى وراهم كل خطوة ونفذيها زى ما
قالوها بالطبط، من غير ما تحطى التاتش المنيل بتاعك، ارشحك علاء
ابن الشيف الشربيني رائع، وأحسن من أبوه كمان.

لما تاكلى حاجة حلوة عند حد متتكسفيش تسألى اتعملت ازاى، في
بعض الستات بتخبي ومش بتصرح بطريقتها لكن مش كلهم، في بتقول
عادى، في الطبخ حاجة كل الناس بتحكى عنها اسمها "النفس" النفس
ده يا ستى بعد بحث طويل طلع إنه هو الروح، الروح اللي انتى بتطبخى
بيها، يعنى بتطبخى وانتى قرفانة وعاوزة الرز يستوى بسرعة علشان
تلحقى تشوفى رسايل الواتس وإشعارات الفيس؛ هيطلع الأكل زيرو،
ولو هتطبخى وانتى عمالة تتأملى في جمال الرزاية ومستغربة إن مفيش

ريجة نفاذة لأكلك وتعدى تدورى عن السبب وتعملى أبحاث،
هتوصلى لطبخة رائعة.

من أكثر الحاجات اللي سمعتها من الستات اللي بتعرف تطبخ عن سر
جمال أكلهم، إنهم يبسبحوا وينشغلوا بالذكر طول ما هما شغالين، من
أول التقطيع لحد ما الأكل يستوي خالص، يعنى بتخدى ثواب
وبتحسنى نفسك.

اتعاملى مع الموضوع ده باهتمام بالغ، هتلاقى إنه بطل ياكل برة
البيت، وإنه بقى يحكى عن أكلك لأهله، وإنه بقى يفضل أكلك على أكل
الحاجة أمه، وهتلاقى اخواته نفسهم بقوا يتصلوا بيكى علشان يعرفوا
سر طبيخك المميز.

في ستات سرهم الحبهان وستات سرهم مرقة الدجاج، وستات
سرهم جوزة الطيب، وستات سرهم الوقت المناسب!
تخيلى إن أمتى تحطى كذا مع كذا الطعم بيختلف تماما! أمتى الكبدة
تنزل الطاسة وأمتى تتحط الخلطة فوقها بتفرق 1000 درجة مئوية في
الطعم.

حجم مكعبات الفلفل وطريقة تقطيع الطماطم بتفرق ألف درجة في
الطعم، أمتى تحطى الكرفس وأمتى تزودى المية، كلها حاجات بسيطة
لكنها بتخلي واحدة طبخة شاطرة ووحدة طبخة عاوزة طبخة.

انتى ليه متمسكة بطريقتك الفاشلة رغم كل الكلام المقرف اللي
سمعتيه عنها وبسببها؟!!

انتى حاسة إن طعها حلو علشان انتى تعبتى وانتى بتعمليلها؛ بس
الحقيقة هى اللي قالها الناس اللي داقت، قالولك إنها زفت، ليه مصره؟
ليه حاسة إن إصرارك على الطريقة الفاشلة اللي بتطبخى بيها أكل زى
الزفت هى جزء من احترامك لذاتك؟!!

اعرف واحدة جوزها بيحب يأكل مسبك وهى بتطبخ سوتيه من
سينن، هو ميعرفش إنه بيحب الأكل المسبك لكن عارف إنه مبيحبش
طريقتها فى الطبخ، قالها كتير أكلك وحش، فكانت بتدوق قدامه الأكل
بمنتهى البلاهة وتقوله: والله طعمه جميل أهو! بلاهة.

مش مهم كل الناس تشكر في أكلك، المهم إن جوزك هو اللي يستمتع
بيه، الحكم عليكى مش تذوقك انتى، لكن تذوق اللي هياكل من إيديك،
ومتصدقيش ديمًا آراء صحباتك في طبيخك علشان غالبًا بيجاملوكى
وبيحاولوا يرفعوا من روجك المعدنية.

من العجب إن ستات كتير فاكرين إن الطبخ ده حاجة عادية، وإنه
مش مشكلة ومش عيب يبقى طبخها وحش ومقرف، مع إننا كلنا
متفقين إن الإنسان لازم يأكل! وإن الجعان غبى وعصبي لحد ما يشبع.



(12)

اعرفى لنفسك خاطر

مهم جدًا في علاقاتك عمومًا وفي علاقة الزوجية خصوصًا إنك
تعمليلك خاطر، المشكلة إن كثير من الستات فاهمة الموضوع ده غلط،
فكراه كتر خصام ووقوف على الواحدة، وعدم قبول الصلح، الموضوع
عكس كده تماما، وخلينا نتكلم من البداية، عاوزة تعمليلك خاطر يبقى
متزعليش!

متزعليش كثير، مش كل شوية تتقمصى وتخدى جيب، كتر القمص
بيخله عادى، كتر الزعل بيخله مألوف ومتعايش معاه، وابقى
بخدعك لو قلتلك إن في راجل جاهز إنه يصالحك كل شوية، الرجالة
بتزهق أسرع مما تتخيلى، حتى لو كان بيحبك وشارى خاطر، فانت
مش كل شوية تزعلى وعلى أقل حاجة تتقمصى، بتفقدى الموضوع قوته،
بتخله حاجة اعتاد عليها منك، يعنى مش شايف إن انتى في حالة غير
عادية؛ لإنك على طول ضاربة بوز وزعلانه!

خلى لزعلك ضجة، احنا لما بندخل البيت ونشغل النور مش بنهتم
إن المفتاح استجاب والنور نور، ولا بنقف نتأمل ونتغزل في الضوء
المنبعث من اللبة، بتعامل عادى؛ لأنه شيء مألوف، لكن أمتى نقف
ونتفاجئ وندور؟ لما نضغط الزرار والنور يفضل مطفى، هنا بنعرف إن
في حاجة غير عادية حصلت، شيء غير مألوف، كذلك زعلك كل شوية
ومع كل غلط وفي كل الأوقات المناسب منها والى مش مناسب حاجة
تثير الاستياء، وتستدعى الإهمال من الراجل حتى لو كنتى على حق؛
لأنه مش هيحس إنك في وضع غير طبيعى، علشان كده الست بتبقى
مقموصة وجوزها شايفها ويتعامل عادى وبمنتهى اللامبالاة!

مش كل شوية تبكى، مش على أصغر حاجة تبكى، امسكى نفسك،
خلى لدموعك هيبة، خليها لما تنزل يعرف إن هو أخطأ خطأ بشع وشنيع
ولازم يعتذر، ويشيل هم الدموع دى، ويجاهد إنه يوقفها، متخليش
صورتك عنده إنك البكائة اللي دمعتها مبتنشفش، مش كل ما يقول
كلمتين تعيطي وتنزلى بحر دموع، خلى دموعك لما تنزل تقسم قلبه
نصين، قللى العرض علشان ترفعى الثمن!

تخيلي واحدة صحبتك كل شوية تزعل، كل كلمة منك ساعة عصبية غير مقصودة تفضل تبكى، وكل ما تعملى حركة تتقمص، مش حاجة مملة وتضايق؟ طيب الراجل أسرع ملل منك في الموضوع ده، وفي نفس الوقت بيتعود على شكلك الزعلان، أغلب الرجال بيتأقلموا على الوضع، وده يفسر برضوا ليه مش ديا الراجل يمدح زوجته، اللي علطول لابسه ومتشيكة وجميلة، كلمة السر الاعتياد!

يعنى ممكن يغلط وتعدى، وممكن تبقى زعلانه ومتخديش موقف، ولما تزعلى ويحي يصلحك تستجيبى بسرعة، في العموم - سواء راجل أو ست - اللي صلحه صعب بيجبر الناس إنها تطنشه، يعنى طالما الموضوع بسيط مش لازم تكبريه، بلاش تحذك الجلالة!

أصحاب الدمعة العزيزة دمعتهم ليها هيبة وتمن، لما يشوفها يحس إن الكون بيتقلب حوليه، تقدرى تحسسي الراجل ضعفك بطرق تانية كتير - هتكلم عليها - مش ضرورى كل شوية تبكى وتقوليله إنك بتبكى ويحي في أى وقت يلاقيكي بتبكى، طب ما دى عاداتها البكى بقي!

وما دام عرفتي تكوني متوازنة، ومتحسسيهوش بزعلك إلا لما يكون الموضوع مستاهل، فإنتي محتاجة تزعلي في وقت مناسب!

س- هو الزعل كمان ليه وقت؟

ج- طبعا.

طالما هتزعلي خلى زعلك واضح ومباشر، ازعلي بجهد، ازعلي بكل ما فيكي قدامه، مش ضرورى تكوني زعلانه بنفس الشكل اللي بتوصليله، لكن وانتي بتوصليله لازم توصليله إنك زعلانه مش تسبيه يستنتج، خلى نبرة صوتك ومشيتك وكلامك كلهم يقولوا في سيمفونية واحدة (أنا زعلانه)، ازعلي زعل لا يختلط ولا يختلف فيه اتنين، مش تزعلي وانتي قدامه وبعدين تتكلمى مع اختك في التلفون وتضحكى!

وما دام نويتى تزعلي، لازم تختارى أمتى هتزعلى، بمعنى أمتى هتبيينى إنك زعلانه، لازم تبينى ده في وقت يكون هو جاهز فيه يصالحك، يعنى متزعليش وهو داخل ينام! بلاش حماقة هيسيبك وينام برضوا، ولو سابك هيعتاد، ولو اعتاد مش هتلاقى حد يصالحك!

متزعليش وهو داخل من برة متعصب وقرفان، متزعليش وهو متخانق مع صديق عمره، ولا وهو عنده حالة وفاة، ولا وهو بيعانى من مشكلة مادية، متزعليش وهو مش جاهز!

وما دام قررتى تزعلى واخترتى الوقت المناسب وهتزعلى بشكل واضح، خلى سبب زعلك برضوا واضح، يعنى متقوليش: انت يعنى مش عارف عملت أيه؟ مش عارف زعلانه ليه؟ مش عارف معرفش أيه؟

خلى سبب زعلك واضح، ولو هو استعبط وسألك رغم وضوح السبب قوليه بمنتهى الوضوح، زعلت إنك معملتش كذا، اتضايقت إنك قولت كذا، وهكذا.

الرجالة مش نبيهة قوى زى ما انتى فاكرة، الراجل غالبًا وهو بيتعشى بيكون نسي اتغدا أيه، وأحيانًا دماغه بتروح لأبعد من السبب اللي مزعلك، فتلاقيه بيعالج حاجة ملهأش أى علاقة بالموضوع!

لما يحاول يصلحك ياريت تساعديه وتدليه كمان على الطريق، وافهمى لغته فى الصلح، فى راجل يجب يصلحك فيروح يغسلك

المواعين من غير ما تطلبى، يجي يلصق فيكي في المطبخ ويعرض مساعدته، يغازلك ويحاول يعمل معاكى علاقة حميمة، يوعدك من غير سبب إنه يفكر يجبلك حاجة، في راجل يجي يعتذر فيقعد يكلمك على نفسه وقد آيه هو بيقاسي في الشغل واتعذب وهو صغير!

افهمى لغته علشان ترتاحى، مش مطلوب إن كل الرجالة تكون مميزة وذكية ولماحة وحكيمة! مطلوب إنه يحترمك ويراعى زعلك، وانتى علميه بتتصالحى ازاي، يعنى لما يغسل المواعين ويقف بيتسملك، قوليله تسلم ايديك بس أنا بردوا زعلانة علشان انت معملتش كذا، شاوريله على الطريق متتكسفيش، اديله فرصه يراعىكى ويهتم إنه يصالحك ويعمل اللي انتى عوزاه، أغلب اللي بتقول أنا كرمتى بالدنيا ممسوح بكرامتها الأرض، وبتزعل ومبعبرهاش، وبتنام ودمعتها على خدها، ومش عارف ازاي رغم كل ده لسه فاهمة إنها عندها كرامة أو حتى بقايا كرامة!

وأخيرا عاوز أقولك حاجة مهمة جداً جداً: لو عملتى كل اللي فات ده واللوح محسش ولا خد باله إنك زعلانة، يبقى خلاص انتى

معرفتيش تزعلي بوضوح ولازم تنقلني للخطة (ب) بتاعت أنا زعلانه يا
صلاح!

يعنى روجي قوليله أنا زعلانه منك، خلاص وقت المقدمات انتهى،
الراجل ده مش هيحس! وطالما مش هيحس متخليش وقت الخصام
يطول.

تعالى نراجع على السريع:

1. متزعلش عمال على بطال.
2. مش كل شوية تتقمصي.
3. خلى دمعتك عزيزة.
4. خلى زعلك زلزال واضح يحس بيه من غير ما يحتاج يفكر كثير.
5. خلى سبب زعلك واضح.
6. اختارى الوقت المناسب اللي تزعلي فيه.
7. افهمي لغته وطريقته في الصلح.
8. اقبلي منه صلحه حتى لو دون المستوى، وعمليه طريقك
المختصر في الصلح.

9. دليه على الطريق اللي انتى عوزاه ومع الوقت هيتعلم يقرأكى .

10. متخليش وقت الخصام يطول ساعديه على المبادرة.

11. أسوأ طريقة تعرّف فيه بيها إنك زعلانة هى استعمال الوسائل

الالكترونية، زى طريقة التلقيح في الحالة والصورة الخزينة على الواتس،

والبت اللي بتبكى في منشورك على الفيس، والبوست بتاع أنا هفضل

طول عمرى لوحدى، وكل سنة وانتى طيبة يا أنا ، والحاجات الهزلية

الفيك دى بتاعت الناس الفيك، خليكى حقيقية.



بقى مرمى على السرير، ولما يقع قلبك مبقاش يقف، بقيتي ممكن تتخضى شوية، وممكن عادى!

بقيتي كمان مسمياه الزفت! بعد ما كنتى بتقولى موبايل حبيبي بقى الزفت! فين الزفت؟ الزفت بيرن! اعمل الزفت ده صامت! وهكذا.

التملك عمل عماليله، قدر يمسح هالة الضوء ويحطها في حجمها المناسب، بقى تليفون مش حلم حياتك، ولا حاجة، وبقى حاجة عادية مش محتاجة تحرسها في ايدك 24 ساعة، مبقاش مصدر فخر ولا حاجة تتكلمى عنها كل شوية لأصدقائك وتطلعيه تجيبي الرنات، التملك خبير ماهر قادر على وضع الثمن المناسب أمام الأشياء!

بس خلينا نلاحظ إنك في النهاية متخلصتيش من التليفون ده في سلة الزباله، مرمتهوش من الشباك، وحتى لما بتنسه في مكان بترجعى بمنتهى الحنق تدورى عليه، تدورى نسيته الزفت ده فين، حتى لو هتأخرى بتدورى عليه!

هنا تيجي المصلحة علشان تساعد التملك وتبقى كفة الميزان الثانية، علشان الحكم على الأشياء يكون عادل، ما بين الافراط في المبالغة

والتفريط في حقها، يعنى علشان متغاليش فيها التمييز يفوقك، وعلشان متبخسيهاش تمناها وحقها تيجي المصلحة تفوقك.
علشان كدة كل شوية هقولك اعرفى حجمك.

نستنتج أيه من اللي فات ده؟

إن الإنسان بطابعه مبالغ، وإن الأشياء بتكون في أعلى درجات التميز طول ما هي بعيدة عننا، وإنها بمجرد التملك بتفقد بريقها لحد ما تاخد وضعها الطبيعة ومكانتها الحقيقية، التليفون مبقاش الروح بقى تليفون، والشنطة مبقتش حلم الحياة بقت شنطة تحطى فيها حاجتك، وإن الأشياء بعد ما يزول الضوء عنها وتتخط في مكانها الصحيح، بتبدأ تاخذ درجة تقييم جديدة في حياتك، بتحكمها المصلحة، فبتخلى التليفون مش مجرد تليفون، تليفون وكاميرا بتساعدك في شغلك، ومنبه بيصحيك، وجدول مواعيد، وأجندة تليفونات ومذكرات، وأداة تواصل مع الناس، وكل ما إماكنيات التليفون زادت، اترفعت درجة اهميته من جديد.

يعنى لو فضل نوكيا بكشاف، هيفضل تليفون ولبه، لو مقدرش يدخل على النت ويصور، غصب عنك هتبتدى تعيدي تقييمه وفق- قانون المصلحة اللي عمرو يس قالكم عليه- وهتضطرى تبحتى عن بديل للتليفون ده، وبمجرد ما هتمسكى البديل - الاندرويد - اللي بيعمل نفس مهام التليفون القديم وزيادة عليه الحاجات الجديدة اللي انتى محتاجاها، هتلاقى نفسك بتتخلصى من النوكيا بمنتهى راحة الضمير!

مش هيردعك هنا إنه استحملك أيام فقرك لما اشترتيه بربع جنيه، مش هتحيى بتأنيب ضمير وانتي بترميه في الباسكت علشان كان السبب في إنه نجدك لما اتصلتى باختك وخذتى نصيحتها، مش هيشفعله كل مميزاته اللي فاتت دى، رغم إنك لازلتى محتفظة بصورة قديمة مهترأة على الحائط لوالدك المتوفى من عشر سنين! وبعض القصاصات الورقية المكتوبة بخط ايد أحمد اخوكى اللي سافر، والوردة البلاستيك اللي اهدتها ليكي صحبتك شياء لما كنتوا في الابتدائية!

التملك والمصلحة، قرينان يعملان معا، بدون إرادة واعية منا،
يعملان وفق منطق ومنهجية، يعيدان للحياة طبيعتها، ويردان للأشياء
قيمتها، ويذكران كل ما كان غالبا في ثمنه وأصله، بثمره الحقيقي
وأصله!

أنا وانتى وبنى آدم والبشر والناس كلنا شيء من الأشياء، قد نكون
أغلى قيمة من الهاتف، ولكننا في النهاية نخضع لنفس الميزان-المصلحة
والتملك- ويعاد تقييما مئات الآلاف من المرات في حياة كل شخص
جديد بنعرفه.

أنا عمرو يس، كنت بالأمس مجرد صديق لديك على الفيس بوك،
مجرد أكونت لشخصية مجهولة، مع الوقت ضعت بين مئات الأصدقاء
عندك، حتى إنك لم تعودى تتذكرى متى ولم أرسلتى لى طلب صداقة!
تحركت أنا وتكلمت فعرفتى إنى كاتب روائى، ربما استحسنتى هذا
الأمر أن يكون بين أصدقائك من يكتب، وربما أخذك الشغف فبحسنى
عن أعمالى، فوجدتى رائعة العذاب؛ فأخذت عقلك وأعجبتك جدًا،
فأصبحت أكثر أهمية عندك، رغم أن لاشيء يربطنا!

صار اهتمامك بصفحتي أكبر من ذي قبل، وحين تصفحتي البروفایل وجدتي لى منشورًا عن الحياة الزوجية، أعجبتك فلما طبقتيه عاد عليكى بالنفع؛ فلم تتواني في عمل مشاهدة أولا لصفحتي، بل وأحيانا لا تنتظرين أن تأتيك منشوراتى بل تدخلين انت إلى الصفحة باحثة عنها!

والآن: ما هو الشيء الذي أعاد تقييمى ورفع أهميتى عندك؟ لا بد أنها المصلحة، وكلما أعطيتك من مصالح تعلقتى بى أكثر فأكثر.. صحيح؟ صرت براقًا كنجمة تتمنى لقاءها والتعامل معها من قريب، وبالفعل تقابلنا، فصدمتك في أول الأمر ملامح وجهى العادية، البريق جعلك تتخيلينى عمرو دياب!

ثم صدمتى في عصييتى وحدتى في الحديث، ثم إنى انشغلت عنك بإجراء مكالمة أو مكالمات، ثم لم أعطيك من الأهمية ما توقعتى ثم وثم وثم، رجعتى إلى البيت فحذفتى الصداقة!

ما الأمر؟ ماذا حدث؟! أه لابد أن التملك حين أضيف إلى المصلحة
أحدث التوازن المطلوب، ردني إلى حيث مكانتي الطبيعية في حياتك.
ممكن حد يقول مجرد مقابلة مش معناها التملك، أرد هنا وأقول إنه
نوع أو درجة من درجات التملك، **يبقى هنا في استنتاج جديد:** إن
التملك درجات، مجرد رقم في الأصدقاء يختلف عن عدم وجود صداقة
نهائي، ثم الحديث في الخاص ثم المقابلة وهكذا ، لابد أننا نملك بعضنا
البعض بدرجات متفاوتة!

انتى تملكى جزء من أصدقائك وجيرانك وسائق الأتوبيس، وأهلك
وزوجك وحائط البيت ورصيف الشارع، كلنا نملك بقدر ما جزءاً ما
من الآخرين أو من حياة الآخرين.

س- طيب انت عاوز توصل لأيه من اللي فات ده كله؟

ج- أولاً اعرف حجمك قبل ما التوازن- التملك والمصلحة- ما
يطولك ويردك لأصلك.

ثانياً: انتى تملكى حاجات كتير وفي نفس الوقت مملكة من حاجات
كتير.

ثالثاً: قانون المصلحة في صالحك لو انتى فهمتيه، وفي نفس الوقت
عرفتى حقيقة حجمك، وفي نفس الوقت اشتغلتى على إنك ترفعى من
قدرك - وده موضوع الفصل ده -.

او عوا تتصدموا من الناس الي حفيت وراكم وبعد ما امتلكوكم
رموكم وباعوكم ببلاش، اياكى تستغري من الزوج الي جه يبكي
لأبوكى، ويقعد تحت البيت في عز البرد بالساعات يستنى يشوفك،
ودفع شقى عمره ودم قلبه علشان يتجوزك، وبعد سنتين من الجواز
مبقاش يقعد معاكى، لأ وكمان بقي مش عاوز يشوفك، لأ وكمان يفكر
يطلقك ويحب مكانك - التليفون الاندرويد - فاكرا؟

هو كان محتاج يعمل مكاملة ضرورى، وفي الوقت ده كان التليفون
النوكيا أبو كشاف يقدر يقضى الغرض - انتى - وبعد ما عمل المكاملة
والدنيا هديت، بقي يحدفه على السرير - فاكرا؟ -، لما حطك على الميزان
بتاع - التملك والمصلحة - لقى إنه محتاج واحدة تقدمله حاجات تانية
أهم من مجرد إجراء مكاملة - نت وكاميرا -.
مش فاهمة لسه؟ طيب أوضح أكثر...

انتى زعلانة إن جوزك بعد ما تملكك وبقيتى في ايده وضمنك زى ما بتقولوا خلاص مبقاش مهتم، وبقى يسبيك وبيص لوحدة جربانة، صح مش انتى بتقولى كده؟ جربانة، خلىنى أقولك إنك لو اتطلقتى واتجوزتى سيد سيد سيد سيده، هيتكرر نفس الموضوع وهيسبيك وبيص لمن؟؟؟ شاطورة للجربانة.

وكل ما تطلقى ويجي سيد؛ هتتحد فى برضوا على السرير من غير ما قلبه يقع، ولا يحس بتأنيب الضمير، فين حل اللغز؟ في إنك تعرفى تسيطرى على قانون الميزان - التملك والمصلحة-، يعنى يا إما متجوزيهوش علشان تقضى على التملك، يا إما تزودى رصيدك في كفة المصلحة علشان متترميش على السرير.... وصلت؟ أتمنى.

انتى مش مطلوب منك تدخلى منافسة مع عالم النساء الكبير وتتصرى عليهن، انتى مطلوب منك تقديمه مصلحة - مصالح - يكون هو فعلا محتاجها، وعلى قد احتياجه للمصالح دى هيكون قدرك.

أيه الفائدة اللي هتعود على واحد رجله مقطوعة لما اشتريه جزمة؟
هى جزمة حلوة وغالية ومن ماركة فاخرة، تفتكرى هتعجبه؟
هختم الفصل بمثال وعكسه وانتي افهمى، **المثال الأول:**

طلق مراته ورجع البيت نام وصحى تانى يوم، قام حضر الأكل
لنفسه كالعادة وهو بيقول: طب أيه الفرق ما أنا اللي بخدم نفسى أهو
زى ما كنت متجوزها على الأقل مبقاش مطلوب منى أى مصاريف
ليها، خلص فطار وقام جاب القميص اللي على الحبل اللي هو كان غسله
- مراته كانت بتكسل تغسل - وقعد يكويه وهو بيقول، الله يحرقها
مكنتش بتحب ولا بتعرف تكوى، راح الشغل وفى طريقه وهو راجع
راح ياكل بره زى ما اتعود؛ لأن مراته - مبتعرفش تطبخ - رجع من برة
شبعان وقام عامل فنجان القهوة اللي بيعه أول ما يدخل البيت، واللى
طليقته كانت ديمًا بتنساه، ودخل السرير ومسك كتاب، وقعد يقرى فيه
وهو مستمع جدًا للهدوء اللي فى الشقة، مفيش واحدة تقوله انت فاشل،
انت علي طول بتتسرح وسايبنى، انت عمرك ما خرجتنى، بتزهق كل

ما احكيك على البت اللي غيرانه من تسريحة شعري، وجارتي اللي مستقصداني و و و، وقف بالليل يقيم الطلاق فقال لنفسه أنا مش حاسس بأى فرق سلبي من يوم ما سابت البيت، مش حاسس إن في حاجة نقصاني، الحمد لله إنى اتخلصت منها.

الهتال التانى: مراته راحت في زيارة عاجلة لبيت أهلها علشان والدتها تعبانة، هو هيقعد يومين لوحده من غيرها، صبحى الصبح لقي الساعة 10 ومعاده في الشغل 9! اضايق قوى لأنه نسي يظبط المنبه لأن ليلي كانت متعودة تصحيه، قام غسل وشه وقعد مستنى الفطار، افتكر إن ليلي عند أهلها فاضطر يقوم هو في البرد يجهز لنفسه، حاول يعمل حاجة ياكلها، بهدل المطبخ وحرق البيض وفي الآخر قعد ياكل حته جبنة، وأهو يومين يستحملهم لحد ما (ليلي) ترجع، قام يدور على هدومه لاقها مش مكوية؛ لأن ليلي مش موجودة، ولازم يتغدى من الشارع - ويدفع أكثر وأكل غير صحى وغالبًا ملوث - رجع البيت

محدث استقبله، كان مضايق عاوز يحكى لليلى عن المشكلة اللي حصلت،
حاول ينام مش عارف حاسس بوحدة، شغل التلفزيون، حس إن في
حاجة نقصاه.... شريكته ليل ونصه التانى، دلعها... كلامها...
احتوائها، حاسس إنه بقى طفل يتيم، مش عارف يستطعم الحياة،
مفكرش كثير، لبس هدومه من غير ما تتكوى ونزل جاب شوية فاكهة
وراح على أهل ليلي يطمن على أمها! لما وصل قاهم إنه كان معدى من
هنا بالصدفه فقال يطلع يطمن!



(14)

الوباشرة

من أكبر مشكلات العقل العربي اللف والدوران، نضيع وقت ومجهود وفلوس في الوصول لحاجة كان ممكن نوصلها أسرع وأقصر لو استعملنا المباشرة، في آخر مثال من الفصل اللي فات شوفنا ازاي الراجل الملهوف على مراته راحلها ومقدرش يقضى وقت كبير من غيرها، بس لو لاحظتوا هتلاقوه قاهم "إنه كان معدى من هنا بالصدفة فقال يطلع يظمن!" ده اسمه اللف والدوران، الزوجة ممكن تكون عارفة إنه جايلها مخصوص، وأكد هي كانت سعيدة جداً إن غيابها فرق معاه، لكن لو كان استعمل المباشرة وقالها بوضوح أنا جاى علشان البيت من غيرك ملهوش معنى، وانا حسيت إنى لوحدى في الدنيا بمجرد ما بعدتى عنى يوم واحد؛ كانت هتطير من الفرحة والسعادة، أكيد هو يحبها سعيدة، وأكد مقصدش إنه يقلل من فرحتها، طب ليه رغم كده استعمل اللف والدوران؟

الموضوع ده ليه أسباب كتيرة منها: التعود، الفهم المغلوطة للكرامة، الأفكار المعلبة المغلوطة، حاجات كتير بتخلينا نستعمل اللف والدوران، بس احنا لو دورنا في حياتنا وأصدقائنا المقربين والناس اللي بنحب نقعد معاهم، هنلاقى إن أكبر فرق بينهم وبين غيرهم، هو إننا مش مضطرين نتعامل معاهم بلف ودوران، بنستمتع معاهم بحرية المباشرة في الكلام وردود الفعل.

المباشرة هى الخط المستقيم بين نقطتين، وهو أسهل طريق للتواصل بينهم، أكيد أحيانا هتحتاج عدم المباشرة، بس مينفعش تبقى حياتك كلها مبنية على اللف والدوران.

في حاجة عندنا في المجتمعات العربية اسمها "صورتنا" ودى في الغالب الأعم هى عبارة عن الصنم اللي احنا بنحاول نشيِّده على مدار عمرنا، ونفضل نعتنى بيه ونخاف عليه ونرسمه، أحيانا صورتنا دى بتكون صورة مصغرة لحلمنا، أو الشكل اللي نفسنا نكون عليه، يعنى يقولك علشان صورتى متتهزش، وهى تقولك مش عاوزاه ياخذ عنى صورة وحشة، وهكذا... كلنا عمالين نجمل ونعدل الصورة.

واحدة صاحبتك تعبانة والمفروض تروحي تزوريها، وانتي مكسلة
ومش عاوزة تروحي، وبعدين تقولى أنا مضطرة أروح علشان
- صورتى - قدامها، علشان متقلش إنها كانت عيانة وأنا مسألتش،
واحد عنده حالة وفاة والعزاي في مكان بعيد، احنا معندناش وقت نروح
ومكسلين وشايفين إن اللي مات ده قريبه من بعيد مثلاً، فمينفعش يزعل
عليه قوى، فنقول خلاص احنا نكلمه في التلفون، طيب لو هو مردش؟
نتصل مرة كمان وبكدة يبقى عدانا العيب، خلاص اسمنا اتسجل عنده
مرتين في المكالمات التى لم يرد عليها، وأصبح معانا مستند إننا كنا
عاوزين نعزيه ونقف جمبه! ويمكن بعدها نقول إننا كنا عاوزين نروح
وكلمناه علشان نعرف العنوان بس هو مردش! صورتنا.

علشان كده تلاقى إن كل الحاجات دى سواء اللي راحت لزيارة
المريضة علشان صورتها أو اللي سجل بياناته في دفتر المهتمين بأداء
واجب العزاء، في الآخر كل الحاجات دى مش بتثمر!
طيب تعالى نلق المواقف علشان تتضح الصورة، لو انتى اللي عيانة
أو انت اللي عندك حالة الوفاة، بتقدر تعرف مين الي جى يثبت حضور،
ومين الي جى يقف جمبك، ومين الي جى الله؟ بتقدر صح.

طيب هل كل محاولات تحسين الصورة الزائفة بتخدعك؟

خلينا نقول إنها ملهاش ثمرة علشان هي مزروعة في الهواء مش في تربة حقيقية، وخلينا نقول إن المنطق مش ديبا بيكون مقنع، وإننا عارفين مسبقًا من خلال عشرتنا الطويلة مع الناس مين فيهم اللي بيفرح ويتألم معانا، ومين فيهم اللي بيحاول يصطنع ده.

خليني ألفت نظرك هنا لحاجة مهمة، إن المصطنع ده المفروض يكون أعلى درجة عندك من اللي نسيك تمامًا ومعبركش؛ لأنه اصطناعه ده نوع من الاهتمام برضوا حتى وإن كان أقل من المطلوب أو المأمول.

يبقى انت ليك صورة حقيقية الناس غالبًا عرفاها من تعاملها الطويل معاك، وليك صورة تانية صنم انت شغال عليها بتحاول تصنعها في عيون الناس، والصورة المصطنعة دى بتكلفك حاجات كتير أقلها إنك بتعمل حاجات مش حاسسها ولا عاوزها لمجرد الحفاظ على الصنم اللي في النهاية ملهوش أى ثمرة!

بنهتهم بصورتنا ومش بنهتهم بنقى صورتنا! عاوزاه يحس إنك واقفة جنبه؟ اقفى جنبه، عوزاها تفرح إنك بتسألني عنها في مرضها؟ أسألني

عنها في مرضها، عوزاه يشوفك مثقفة؟ خليكى مثقفة، عوزاه يشوفك
مبهرة؟ خليكى مبهرة.

تلبسوا الصورة الي انتوا عاوزين توصلوها للناس، الذهب الصيني
رغم إنه ميختلفش في- الصورة- عن الحقيقي إلا إنك أو ما بتعرفي إنه
صيني يسقط في نظرك مهما كانت- صورته - براقه، العربية الأحدث
موديل بتفقد رونقها فورًا مجرد ما نعرف إنها ماكيت ومبتقدرش تمشى
ولا خطوة واحدة... لا تضيعوا أعماركم في تجميل الصورة.

الأسهل من إنك تدينى فكرة إنك مثقفة.. كونى مثقفة فعلاً،
الأسهل من إنك تحاولى تحسسينى إنك خايفة عليا، خافى عليا فعلاً،
الأسهل من إنك تخلينى أشوفك متدينة كونى متدينة فعلاً، الحقيقة
أسهل من التقمص، خليكوا حقيقيين.

المباشرة....

لما أكون جاهل واطهر جهلى هيبقى عندى فرصة ذهبية إنى أتعلم،
لكن طول ما أنا برسم صورة عكس الحقيقة إنى مش جاهل ازاى هقدر
أتعلم؟

لما أفضل ارسـم صورة إنى متدين ازای هلاقی اللي يساعـدنى ابقي
متدين؟

لما أفضل ارسـم صورة إنى عارف، أمتى هعرف؟
خليك مباشر وسيب الناس تعرفك على حقيقتك، لو حقيقتك
مزعلاك غيرها أو حاول تغييرها، لأنك في الحالتين دول هتكون على
طريق النجاة، سبهم يعرفوا إنك متعرفش أو أعرف أو حاول تعرف.

طيب ليه احنا عمالين نلف حوالين بعض؟!
علشان خايفين الناس تعرفنا على حقيقتنا المؤلمة، علشان عاوزين
الناس تشوف الصورة مش تشوفنا احنا، طيب سبوني أقولكم إنهم
حبوا الصورة محبوناش، اتمنوا الصورة متمنوناش، حلموا وفرحوا
واتألموا مع الصورة مش معانا، عرفتوا منين بيتيجي الصدمة
والاصطدام؟

خلينا حقيقيين، وده مش معناه إننا نبقى معدومين الذوق ولا إننا
نمشى بمكرو فون في الشارع نقول أنا وحش أنا كذاب أنا خاين!

لكن معناه أعرف حجمى ومسبش حد يحطنى لا فوق حجمى ولا
تحت حجمى، مسبش حد يشيلنى مسئولية أنا مش قدها ولا إنه يسلبنى
حق أنا أستاهله، أتغير علشان أكون كويس، أحاول، مش أغير الصورة
واخلى كل همى على الصورة!

أحيانا ناس بتكلمنى وبعدين يقولولى احنا منعرفش إنك كدة!
بيقولوها بصدمة غالبا، بقولهم طيب دى فرصة جيدة إنكم تعرفونى على
حقيقتى، وتقرروا تكملوا معايا على حقيقتى أو تنسحبوا، أغلبهم قرر
يكمل معايا، أغلبهم أعجب بحقيقتى بعد كده، ممكن كل ده علشان
حس إنى حقيقي.

الكلام ده هيفيد السناجل أكثر، اظهروا حقيقتكم للناس اللي انتوا
ناويين ترتبطوا بيهم، وتكملوا معاهم حياتكم، عرفوهم انتوا مين
بالظبط، قوليله مبعرفش اطبخ وھتعلم أو بتعلم أو مش ھطبخ بعد
الجواز، قوليله أنا ھشتغل، أنا مش بحب أصحى بدرى، وانت قولھا
إنك فقير، متداينش علشان تخرجھا وتحسسھا إنك واد ابن ناس بيسھر

كل يوم في فندق شكل، متقمصش شخصية مش بتعتك؛ لأنها هتحب
واحد تانى غيرك - الصورة المزيفة اللي انت صنعتهاها - طب ترضاها
على نفسك؟!

استعملوا المباشرة في المناقشات ديا، اسألوا احنا مختلفين في آيه؟
متلفوش حوالين بعض، قولى أنا مش عاجبنى كذا بمنتهى المباشرة، قولى
أنا كنت عاوزة أوصلك كذا، اللف والدوران في كسب القلوب نوع من
الفن اللي لما يساء استعماله يتقلب لعنة.

لما أقعد ألف وأدور علشان أعرف نوع البرفان اللي بتحييه علشان
أجهولك هدية دى حاجة رائعة وأفضل بكثير من المباشرة، لكن لما
أقعد ألف وأدور علشان أعرف انتى زعلانة من آيه ده شيء مش مجدي
في الغالب، والمباشرة تخلص الموضوع وتختصر العمر والوقت.



(15)

أنت فين، أنت هترجع إمتي؟

عاوزة تعفرتي راجل وتخليه يكره الدنيا؟ اسألوه السؤال التلم ده
"انت فين؟" انت هترجع أمتي؟

الرجالة ديماً بتحب تحس بالحرية حتى لو كانت حرية زائفة، بيضايق
لما يحس إن في حد خد دور أبوه أو دور ولى أمره ويحاسبه، وعلى أى
حال السؤال نفسه مستفز وملهوش لازمة.

انت فين ممكن تتقال بطريقة حلوة ميكنش فيها أى نوع من أنواع
المساءلة، يعنى على سبيل الدردشة ممكن، وعلى أى حال هو يقدر يقولك
أى مكان غلط وبرضوا متعرفيش هو فين، مش شرط يكون بيعمل
حاجة غلط، بس مجرد الإحساس بالتسلط مزعج، هتقولى أنا خايفة
عليه، أنا ممكن أخاف عليكى اكتفك فى رجل السرير أيه رأيك؟

انت هترجع أمتي؟؟؟ بصي السؤال الكونى ده اللي هو شبه هناك
أيه بكره، مهما كان سبب السؤال ده تقدرى تبدليه بسؤال تانى أحسن،

زى اجهز الأكل ولا قدامك كثير؟ وحشتنى من الصبح مشفتكش تعالى
بقى؟ مش هترجع تستريح بقى دانت نازل من بدري، وأكيد تعبت ربنا
يعينك، وهكذا، بعيد عن الاستجواب والتحقيق.

نفسى تفهمى وتقتنعى إن جوزك مش ملكك زى ما انتى ملكه، مش
هتقدرى تتحكمى فى تصرفاته زى ما بيقدر يتحكم فى تصرفاتك، مش
هتقدرى تمنعيه زى ما بيقدر يمنعك، نفسى تفهمى ده وتعرفى حجمك
علشان ترتاحى، علشان مترهقيش نفسك وأعصابك فى حرب مش
بتاعتك، الكلام ده بيبدد طاقتك وفى الآخر مش هيعود عليكى بنتيجة.

علاقتنا بالناس علاقة معتمدة فى المقام الأول على الرصيد، يعنى لو
عملنا عندهم رصيد كبير هنقدر نسحب منه، لكن لو كان رصيدنا
عندهم صفر أكيد مش هيسمحوا بأى عمليات عشم، هي الناس بقت
ماشية عشانة على نفسها كده ليه؟!!

واحدة بتقولى جوزى بيقبل كلمة من غيرى لا يمكن يقبلها منى، أو
جوزى متجوز واحدة بتهزر معاه بإيديها أو بيتخانقوا ويشتموا بعض
ويرجعوا يتصالحوا، ومعايا أنا لو بس عليت صوتى يقلب الدنيا!!

كل ده راجع للرصيد، ممكن تكون هى بقالها معاه سنة واحدة وانتي بقالك معاه عشر سنين، بس هى عملت رصيد قد رصيدك 100 مرة في الفترة القصيرة دى، هو مش في واحد مبيسمعش كلام حد إلا واحد معين هو اللي بيقدر يقنعه ويسمع كلامه؟ الرصيد.

يعنى لو لقيتى واحدة صحبتك بتحاسب جوزها في التليفون حساب الملكين وعلى قلبه زى العسل، ارجعى الفضل ليها مش ليه، قولى إنها شاطرة وعرفت تعمل معاه رصيد يسمح لها تحاسبه، مش هو اللي كيوت ومتعاون.

أبشع الرجال وأصعبهم تلاقية ضعيف جدا قدام واحدة معينة، اللي منقدرش نحركه بالمدافع الرشاشة هى تحركة بنظرة عنيتها، ده مش عيب فيه دى ميزة فيها، ده مش علشان هو دلدول ده علشان هى ست شاطرة، مش علشان هو شخصية ضعيفة وبيريل لكن علشان هى شخصيتها مميزة وجذابة.

نرجع لمرجوعنا، متجننيهوش وتقوليله انت فين، ممكن تقوليله انت في المكان كذا؟ يرد يقولك لأ دانا في المكان كذا، طب لو اكتفى بإنه قالك

لأ؟ يبقى مش عاوز يقول أو مكسل أو مش عاوزك تقلقى أو مليون سبب في دماغه غير إنه يكون بيعمل حاجة غلط!

يبقى متعفرتيهوش وتقوليله هترجع أمتي، قوليله هتأخر؟ قدامك كثير؟ وهكذا؛ لأنه أكيد هيخلص اللي وراه وهيرجع مش هيبات في الشارع.

لما تكلميه في التليفون ديبا ناديله باسم دلح، قوليله يا كيمو يا ميدو يا حبیبى، حتى لو كان هو متعود يرد ويقولك أيوة يا حجة! اديله فرصة يَحْتَشَى على دمه ويتعلم منك.

لما تبعتيه رسالة على الواتس متقعديش جنبها تستنى يرد، ممكن ميشفهاش في ساعتها، وممكن يشوفها ويكون مشغول ودخل بس علشان يطمئن إنك بخير مش إنك بعته عاوزة حاجة ضرورية، لو مردش حتى لحد ما رجع مش لازم تتعامل مع الموضوع إنه تجاهلك ممكن تبعتيه ايموشن أو تناغشيه، يعنى متكونيش شخصية قماصة، مستتية أى حاجة علشان تزعل وتتفلق، مش غالباً لما بتزعل بتتفلقى؟ صح؟

ممکن تكونى شخصية دلوعة أو شخصية نغشة بتقدر تاخذ بدلها
أكثر من اللى هى عوزاه، مش لازم تكونى شخصية السجنان أو الشويش
عطية أو المفتش كرمبو بتاع هو انت مردتش ليه؟؟؟ مش عجبك أنا
يعنى، خلاص مشغول مش لاقى دقيقة ترد علي، على فكرة أنا مش
هبعثلك تانى ما دام مبردش، يعنى حتى مش من الحكمة الكلام ده
يتقال لواحد مردش عليكى، ما هو أكيد هيقولك يا ريت تبطلى تبعنى
يكون أحسن!

يبقى الخلاصة متعاملش بشخصية السجنان اللى بيعد المساجين
وبيتم عليهم، اتعامل بشخصية الدلوعة اللى كل الرجالة بتحب
ترضياها.



(16)

ابنك هيبقى زوج وأب

ازيك يا ست فتكات عاملة أیه؟ جوزك لسه مزعلك؟ عامل مشاكل
كثير؟ عارفة أیه أكبر سبب في المشاكل الي هو بيعملها دي؟ هاتى
ودانك "!!!!!!!!!!!!!!!!!!!!!!"مه،!!!!!!!!!!!!!!!!!!!!!!التربية".

أمه الله يكرمها كانت بتحبه قوى زى ما انتى بتحبي ولادك ويمكن
أكثر شوية، ورغم حبها ده أو يمكن بسبب حبها ده مرتبهوش،
هتقوليلي: ازای ده اتصرف عليه كثير جداً، ده معاه شهادة عالية، ده من
صغره وهو مشترك في أكبر نوادى مصر، هقولك: ومين قال إن دى
التربية؟ ده جزء من التربية مش التربية كلها.

علموه يجمع ويطرح ويضرب لكن نسيوا يعلموه ازای يتعامل مع
المرأة، أمه كانت بتسييه نايم للضهر وتصحى اخته تنصف الشقة، كانت
بتسييه يتسرمح لحد نص الليل، وتقعده تستنى علشان تحضر للمحروس

العشاء، كانت بتشيل اللقمة من بقها وتديها له، مكنتش بتقوله روح وصل اختك الدرر لحد يعاكسها، أو يضايقها في السكة، مقالتلوش اختك زعلانة ادخل صالحها، مقالتلوش هات معاك فاكهة من فلوس شغلك وانت راجع، هات ورد وشيكولاته لاختك، خدنى خرجنى عاوزة انفسح امال أنا مخلفاك ليه، تعالى معايا السوق علشان تشيل كيس الخضار، كانت بتشيل هى وتمشيه جنبها طرزان، لما كانوا بيركبوا الأتوبيس مكنتش بتقوله قوم فزاقف وقعد البنت دى أو الست دى أو الحاجة دى، لما سمعته بيزعق لاخته مكنتش بتقوله عيب على رجولتك البنات مبيتعملوش كده، لما شافته بيضرها مقعدتش معاه وعلمته إن الست مبتضربش، معلمتهوش إنه يضحى لأهم اتنين ستات في أول حياته (أمه - أخته) علمته إن هما اللي المفروض يضحوا علشانه مش المفروض هو اللي يضحى، معلمتهوش يقف في الطابور وهى تقعد، معلمتهوش يروح هو يحجزها الدكتور ولما يوصل يكلمها تيجي، مكنتش بتعمله يبقى راجل!

طيب بما إنك انتى عانيتى وتعبتى وشقيتى وزهقتى من جوزك اللي مبيحسش ومبيراعيش، بلاش الله يكرمك تنتجى لنا منه نسخ جديدة،

المجتمع مش منتظر منك كده، مصر هتزعل منك يا سعاد، ولو مش قادرة تصبحي على مصر بجنيه علشان مفلسة، ممكن تصبحي عليها بالواد ابنك المفعوص ده، ما هو بكرة هيكبر، وهيبقى زوج وأب.

علميه يعنى أيه راجل، ازرعى فيه اللي انتى اتحرمتى منه، علميه ازاي يتعامل مع الجنس اللطيف، ازاي يتكلم معاهم بشياكة، ازاي يساعدهم في المطبخ، ازاي يكون سند وحماية، متبقيش زى حماك اللي انتى بتنتقديها، مطلعيش واحد نسخة من جوزك اللي انتى بتصوتى منه، مش علشان اتظلمتى تظلمى واحدة تانية بريئة ملهاش أى ذنب غير إنها هتتجوز المحروس ابنك.

انتى اللي ظلمتك كانت أنثى، بلاش انتى كمان تظلمى أنثى تانية ونفضل في الحلقة المفرغة، يلا اكسري الدائرة واعملى منها خط مستقيم، علمى ابنك وابن اختك وكل ابن ليكى وصاية أو كلمة عليه، احكى لأصدقائك، قوليلهم حرام نخرج نموذج ذكورى تافه للمجتمع المتهالك ده.

ديما بوصي إن الأم هى اللي تهتم بتربية الولد والأب، هو اللي يهتم بتربية البنت، وده علشان نتجنب في المقام الأول اختلال الهوية الجنسية -

ده مرض انتشر بكثرة - وعلشان الرجل يزرع في البنت اللي الرجالة بتحبه، والأم تزرع في الولد اللي الستات بتحبه، تفتكرى واحد صحى يصلى الفجر فلاقى الجو ساقعة جدًا فساب عياله نايمين مرضيش يصحيههم يصلوا، ده حب ولا غباء؟ حماهم من شوية برد وسابهم للجحيم سواء في الدنيا أو الآخرة! دى رحمة ولا حماقة؟ حب ولا بلاهة؟ شفقة ولا أنانية؟ الحب والرحمة والشفقة إنه يصحيههم علشان يحميهم من نار وقودها الناس والحجارة... صح؟

طيب انتى مش عاوزة ابنك يقوم يشيل الطبق اللي أكل فيه ليه؟ سيياه يكلمك بطريقة وحشة ليه؟ مش بتبعته يشتريك الحاجة ليه؟ ليه بتطلعيه مسخ مشوة بدلحك، على فكرة مراته هتدعى عليكى، وربنا مش هيسيبك، وعياله هيتعذبوا بسببك وبسبب تربيتك دى.

سبونى أقولكم على ملحوظة صغيرة خالص في التربية وبعدين نبقى نتكلم عنها في مكانها، اوعى تشيلى اللقمة من بقك وتديها لعيالك وهما شايفين، ممكن تعملى ده من وراهم، لكن قدامهم لآ، قدامهم تخدى نصيبك من الأكل والفاكهة واللحمة، مفيش مانع لو خدتى من نصيبهم

كمان قدامهم، مفيش مانع إن كل ما تجبيلهم حاجة حلوة تقوليلهم فين نصيبي، هاتوا حته، وتخديها تاكليها، لما ابنك يديكى جزء من الحلوى بتعته خديها منه وكليها قدامه، أو اعملى نفسك بتكليها وشيلها من غير ما يشوفك لو انتى الحلويات بتتعبك، لكن في كل الأحوال علموا أولادكم إنكم ليكم حق، ليكم نصيب، ليكم حياة، علشان لما يكبروا ميستخسروش فيكم موبايل حلو في ايديكم، ميقولكيش اديني بيتك واقعدى انتى في إيجار، عرفيه إن زى ما هو لازم يلبس علشان زمايله انتى كمان لازم تلبسي علشان قرابيك، زى ما هو لازم ياكل انتى لازم تاكلى، زى ما هو لازم ينام انتى لازم تنامى، علموا أولادكم إنكم بنى آدمين ليكم حياة وخصوصية، مش خدامين رغباتهم!



(17)

زوجة لا خادمة

في فرق كبير بين الكلمتين دول، أغلب الزوجات تحولوا لمجرد خادمة في البيت، والسبب الرئيسي لتحول الزوجة الى مجرد خادمة هو إنها مش قادرة تميز بين "ما يتوجب على الزوجة القيام به" وبين "ما يتوجب على الخادمة القيام به".

بيختلط الأمر عليها ومع الاعتياد بيتدى الفارق المهم بين الكلمتين يدوب وتبدأ في الانسحاب، ويتقلص دور الزوجة لصالح دور الخادمة، الزوجة كلمة معناها أشمل.

الأول عاوز بس نشيل الكبر والطبقية من تفكيرنا علشان نقدر نستوعب الموضوع كويس، على فكرة الخدامة ست وأنثى وإنسانة، ومن حقها الحياة زى غيرها، ومش من المهن الوضيعة ولا حاجة؛ لأن في الأساس مفيش مهنة شريفة ومهنة وضيعة، ممكن تكون وزير مرتشي حقير، وممكن تكون عامل جمع قمامة شريف.

يعنى نتخلى عن الطبقيه والنظرة الدونية لمهنة الخادمة، علشان لما أقول خدامة متففس في زورك وتزعلك، بس عاوز أقول إن كتير من الستات لما بنفهمهم الفرق العميق بين الزوجة والخدامة بتختار بمنتهى القناعة إنها تكون الخدامة!

والخدامة والبيبي سيتر دورهم هو (تجهيز الطعام، غسيل الملابس، ملاحظة الاطفال،) وده نص دور الزوجة، الزوجة نص دورها خدامة والنص الثانى حاجة تانية بيضيف الرونق للنص الأول ده، أما الخدامة فدورها واضح مش محتاج للرونق، ومن هنا هنقدر نفهم ليه أغلب الزوجات بتحس إن جوزها بيعاملها على إنها مجرد خدامة! بس خلونا نتفق على إن كل زوجة خدامة لكن مش كل خدامة زوجة، يعنى متقدريش توصلى للمرتبة الأسمى في العلاقة - الزوجة - دون المرور بمرحلة الخدامة، بقول المرور، في نساء بيتتهى بيها المطاف عند المرحلة دى - الخدامة - وفي ستات فاهمة دورها كويس في الحياة وعارفة إن ليها مكان أكثر أهمية في حياة زوجها وأبنائها من مكانة الخدامة اللي ممكن استبدالها بغيرها من غير ما يحصل مشكلة كبيرة.

الزوجة هى المودة والرحمة، كل حاجة مرادف للكلمتين دول هما الزوجة، هى اللي بتستر العيب، وبتشارك الهم، هى اللي قدرت تقسم الحياة مع جوزها وتقنعه بيها وبشخصيتها ودورها الفعال في حياته، هى اللي لما يحصله مشكلة يدور عليها، مش علشان تحلها له لكن علشان يحس بالأمان، يحس إن لسه له لازمة في الحياة، لسه في حد عاوزه، اللي بيعب يحكلها عن نفسه وعن ظروفه وخططه، عن طموحه وآماله، عن اهتماماته ومخاوفه، اللي بياخد رأيها حتى في أبسط الامور، واللى بيفتخر بيها وبوجودها في حياته حتى بينه وبين نفسه، والست دى اللي جوزها بيقسم معاها روحه ونفسه، طبعا كل الستات نفسهم يوصلوا لكده، طيب ليه ما يوصلوش؟! علشان هما فاكيرين إن ده منحة من الزوج، إذا شاء جعلها زوجة وإذا شاء جعلها خادمة، طبعا مش محتاج إقول إن ده محض هراء.

أغلب الستات لما تسألها أيه دورك في حياة جوزك، تلاقيها بتكلمك عن الجزء الخاصة بالخدمة! تلاقى أكثر حاجة مصدر فخر ليها هى إنها خادمة مطيعة، خادمة براتب زهيد، خادمة نضيقة، خادمة صبورة، طب مش ملاحظة إن كله خادمة خادمة!

سببى أقولك إنك لو بتصحيه الصبح لشغله وبتحضريله فطاره
وبتغسلى هدومه، وبعد ما يرجع بتعملي الغدا وكذلك العشا، وأثناء
اليوم المشروبات اللي بيحبها، وبتعملي الحاجات دى برضوا مع أولاده،
مبروك انتى خدامة تستحق الأجر اللي هو إنه يصرف عليكى!
عوزاه يشتاقلك ويدور عليكى ويشاركك حياته؟ يبقى انتى محتاجة
ترقى درجة وتبقى زوجة، بس زى ما قولنا النجاح صعب مش سهل
وإلا كان حصل عليه كل الناس، وساعتها مكنش هيقاله أى ميزة!
ومفيش نجاح من غير خطة، ولا تعب، ولا تقييم، لازم تقيمى
وضعك الحالى، انتى زوجة ولا خادمة، وبعدين تحطى هدف أسمى،
وبعدين طريقة لتحقيق الهدف، وتنظمى وقتك ومواردك وقدراتك،
وتنفذى فتوصلى للنجاح.

في سؤال ممكن يكون خطر في بالك دلوقتي:

س- هل هو يستحق منى كل ده؟

ج- ده انتى اللي تقرريره، وبناء عليه تختارى هتكونى في حياته أيه،

بس افتكرى إن انت تستحقى، تستحقى تكونى في مكان أفضل، تتعاملى

بصورة أفضل، أتمنى الكلام تسمعه اللي لسه متجوزتش؛ لأن فرصتها في تدارك الغلط أكبر وأوضح.

الزوجة هي اللي بتخرج أجمل ما في الزوج، لذلك الاختيار الأول عليه عامل كبير، يعنى ممكن يكون أفضل ما في الزوج شيء بخس الثمن، لكن افتكرى إن الناس معادن، الصفيح بيتعمل منه دلوقتي عربيات، والفضة بيطعم بيها التحف النادرة، والقصدير بيدخل في صناعات هامة، ومهما كان المعدن نقدر بالتشكيل نزيد من قمته!

عارفين ليه بيقولوا وراء كل رجل عظيم امرأة؟ لأن المرأة في حياة الرجل تساوى شعلة النار والمطرقة الناعمة المحسوبة اللي بتشكل الذهب بدقة، اتفرجى على عامل الذهب وهو بيصنع تحفة، شوفى الصبر والدقة، شوفى ازاى بيخطط خبطات محسوبة وضعيفة ومتتابعة علشان تخرج في الآخر التحفة الذهبية النادرة.



(18)

تقسيم بغرض التحليل

عاوز أعلمك طريقة ناجحة جداً تستعملها في كل حياتك، المهمة الكبيرة قسمها لمهام صغيرة، وابتدى اشتغلى عليها واحدة ورا واحدة، بالطريقة دي اولا هتقدرى تنجزى بشكل أفضل وأسرع. ثانيا: فرص النجاح بقت متعددة، يعنى بدل ما هى مهمة واحدة كبيرة بقت عشر مهام صغيرة، يعنى لو عملتى واحدة نص نص هتقدرى تعملى الثانية ممتاز وهكذا.

جوزك عبارة عن مجموعة مهام، أمه وأبوه واخواته وشغله وأصدقائه وحاجات تانية اكتشفها انتى بنفسك، قسمى علاقتك الضخمة بيه، لعلاقات صغيرة ومتوسطة وابتدى اشتغلى عليها، أول حاجة أمه، أكيد حبها ليكي هينفعك معاه، على الأقل تدافع عنك أو حتى متكونش عدو، ده في حد ذاته مكسب، خلى هدفك في كل

العلاقات الصغيرة أو المتوسطة دى إنك تكسيبها تماما، لو مقدرتيش
تكسيبها يبقى تحيدها، يعنى تخليها لا مكسب ولا خسارة، لا توصيه
عليكي ولا تقومه ضدك.

ازاى تكسبي أمه؟

الطريقة الصحيحة لها بداية، وبدائتك مع أمه هى إنك توصليلها
إحساس إنه بتاعها، وإنك عارفة ومعترفة ومش مضايقة إنه بتاعها،
حتى لو كان ده مش حقيقي - يعنى مش عاوزك تكشفى كل قدراتك
ولا كل قوتك، افتكرى إن ده بيقلل المقاومة لحد درجة النعدام - وده
يتطلب منك إنك تفهمى إنها أنثى ووضعها أقوى منك، يبقى لا تثيرى
غيرتها، أغلب الستات بطبعهم وانتي طبعاً عارفة عندهم غيرة حمقاء لا
في وقتها ولا في محلها، ولما يجوا يواجهوا غيرة دى بيبقى غالباً من خلال
تشويه المنافس مش تحسين الذات!

لو قدرتى تتجنبى غيرتها مش هتضطربها إنها تشوهك وتفطسك في
نظره، واعرفى إن الداخل بينهم خسران - بين الرجل وأمّه - يعنى في

وجودها خليكى معاها على طول الخط، حتى لو هو اللي بيشهدك اشهدى لأمه، لو حاسه إنها غلطانة تمامًا يبقى متشهديش نهائى لكن اتكلمى معاها، وكلامك معاها في الحالة دى يبقى على صيغة سؤال وملامح حيرة واندهاش، بطريقة هو صحيح ليه يا ماما كذا وكذا؟ افتكرى مهها كان غلطها واضح وصعب.

خلى بالك التعامل قدامها وهى موجودة وشايفة وسامعة يختلف عن لو كانت مش موجودة، أو موجودة ومش شايفة ولا سامعة، يعنى يمدح طبيخك قدام أمه قولي طبيخ أمك أحلى، تقدرى تبالغى وتقولى أنا عن نفسي بحب أكل من ايديها هى، حماتك هتنشكح قوى على فكرة، وهتلاقيها بدأت تمدح فيكي وتقولك لأ بصراحة انتى أحلى والكلام التحصيل حاصل إياه.

لما تكون معزمة عندك على الغدا اسألها من وراه تحب تأكل أيه، واطبخى اللي هى بتحبه، مع الوقت افهمى ذوقها واعملى من غير ما تسألى وقوليلها أنا عملا لك كذا مخصوص علشان عارفة إنك بتحبيه.

حاولى تعملى ده بحب حقيقي واعتبريه في باب الصدقة والإحسان؛
لإن اللي بيطلع من القلب بيوصل أسهل وأسرع، والناس بتحس مين
اللي بيحبها ومين اللي لأ، جربي ممكن تحببها فعلا رغم إنها حرباية!
لازم تخلي في أحاديث خاصة بينك وبينها محدش يعرفها، حتى لو
هتخترعها اختراع، أحاديث من النوع اللي بتسكتوا لما حد يدخل
عليكوا، واللى لما تكلمها في التليفون تقوليلها إنك عاوزه تروحيلها أو
تجيلك علشان تقوليلها اللي حصل وآخر التطورات، اعملى لنفسك حياة
وعلاقة معاها هستمتعى جداً.

اوعى تبينى حبك لى هي بتكرههم، مش مطلوب منك لما تقولك
إنها بتكره فلانة إنك تتسحبي من لسانك وتقوليلها أنا بحبها وهي
معملتليش حاجة وحشة والكلام ده، الستات عموماً مبتقتنمش طالما
مضايقة، اكتفى بالسكوت أو اطلعى بأكلشيه بتاع ربنا يهدى الحال، هي
هتفهم مع الوقت إنك مش عاوزة تتكلمى في السيرة دى وهتبطل.
مهما كنتى بتعرفى تطبخى أسألها، قوليلها أعمل دى ازاي، كلميها
في التليفون خدي منها وصفات منيلة وارمى الورقة بعد ما تقفلى،
ومتنسيش تظمنها بالليل إنها طلعت تحفة زى ما قالتلك.

حسبي جوزك إنك بتشفقى على أمه، يعنى قوليله: خلى بالك لتزعل، تعالى نسأل عليها علشان صوتها كان تعبان، كلمها تيجي تخرج معانا محدش بيخرجها حرام.

لما تيجي تهادى حماتك هاديها على إنها صحبتك المراهقة، يعنى اديها قلم روج ازازة مناكير ماسك للوش، مش شال عنده تسعين سنة وست الحبايب يا حبيبة، دلعيها هتبقى المفضلة عندها.

لازم تخترعيلها اسم دلع تناديها بيه، يستحسن لو كان من ابتكارك، يعنى كل العيلة بتدلعيها وتقوليها يا سوسو تدلعيها انتى وتقوليها يا توتو، المهم شوفى دلع جميل يبقى حصرى ليكى، ومن خلاله عرفيها أمتى بتبقى راضيه وأمتى بتبقى زعلانه، من خلال انك تستعمليه أو مستعمليهوش.

مش من المنطق وانتى عند حماتك تروحي تقعدى مع جوزك! طب ما تفضلوا على بيتكوا بقى! اقعدى مع حماتك واتلمى شوية.

خليكي حسيسة، يعنى واقفة تتوشوش هي وابنها ابعدى، مش
تخترعى حاجة علشان تقربي وتسمعى يا حشرية، وطبعًا حذارى
تتكلمى معاها أو مع جوزك في أى حاجة سمعتها من خلال التصنت
عليهم، مش تقويله أو تقويلها سمعت إنكم هتخرجوا أو إنكم
هتجيبوا كذا، ولا تتذاكى وتتكلمى في الموضوع علشان توقعيها، طالما
محدث قالك يبقى انتى متعرفيش ومتحاوليش تعرفى يا حشرية.

في كلام يفتح القلب زى: الأكلة كانت نقصاكي ويا سلام لو
اتصلتى مخصوص علشان تقويلها كده، خصوصًا لما جوزك يثنى على
الأكل تقويله كان عاوز توتو تيجي تاكل معانا، اتصلى بيها قوليلها
هتحبك وهو كمان، وكذلك قوليلها: دانا شوفت شنطة قوتل إنها
هتعجبك قوى، شوفت معرفش أيه افكرتك وهكذا.

مش محتاج احذرك من المبالغة، المبالغة هي اللون الأسود اللي بيخفى
ملامح أى حاجة، حبيها واعملى ده بحب، انتى عاوزة طريق، وأنا
بدلك على الطريق، وعلى فكرة كل الأفكار اللي هتجيلك وتقولك إنك

منافقة مش صحيحة، انتى إنسانة جميلة بتعاملى الناس بجمال
وتكسبيهم، اعتبريه من جبر الخواطر، والست دى هى الي ولدت
وربت الراجل ده، هى الي تحملته لحد ما اتجوزك وهو عندها نور
عينها، اشفقى عليها وربنا هيكرمك.



(19)

لا تتحدثي عن ماضيك

دع الماضي يمضي بكل ما فيه، لو عاوزة تحكّمي على مستقبلك الجاي كله بالفشل الذريع مع شريك حياتك... احكيه الماضي!
وبالتحديد أقصد حاجات معينة في الماضي، ماضي الإنسان فيه حاجات مشرفة عملها؛ ودي مفيش أي مانع إننا نتكلم عنها ونفتخر بيها ونفتكرها ديبا، وفيه زلات وهنات وأخطاء ومصايب؛ ودي لازم تتدفن في قبر مجهول ملهوش طريق.

تقولك أنا عاوزة أبدأ حياتي معاه بصراحة ووضوح! طيب مين قال إن الماضي ملك لغير صاحبه؟ مفيش أي حد ليه حق يطّلع على ماضيك إلا إخوانا في المخابرات وأمن الدولة لو هتمسكى منصب.

غير الناس الأفاضل دول مفيش حد من حقه يعرف عن ماضيك أي شيء، الماضي يعني زمان، يعني فات، يعني مش موجود معانا دلوقتي،

بس كلنا عارفين إنه رغم عدم وجوده إلا إن أثره موجود فينا، وبناء عليه بقولك إياك ثم إياك ثم إياك تحكى أخطاء الماضي.

ليه تقولى إنك كنتى مرتبطة بعلاقة عاطفية مع رجل تانى؟ ما تتويى وتسترى على نفسك ولا تفسدى مستقبلك، خلىنا نتكلم شوية بالعقل والمنطق والواقع، انتى هتقولى أنا عاوزاه يعرف كل حاجة عنى، هقولك مش مطلوب إننا نعرف كل حاجة عن بعض، خصوصًا إن فى حاجات مش هتأثر على الطرف التانى مش محتاجين نحكيهاله، أيه اللي يخلى راجل يتقبل إنك كان ليكى عشيق؟! ما هو ارتباط بعلاقة عاطفة دون رباط رسمى يبقى اسمه "عشيق" حتى لو الكلمة بتضايقك، طب هو أيه اللي يخليه يتجوز واحده كان ليها عشيق؟ وازاى يصدق إنك توتبى فعلا؟ وازاى يصدق إن الأثر مش موجود فيكى؟!

الإنسان دايمًا بيغلب على طبعه الفضول، والفضول ده بالظبط زى النار اللي كل ما ترمي فيها حاجة تزداد توهج وتبقى عاوزة تاكل أكثر وأكتر، هتقولى كنتى بتعرفى واحد؟ هيقول: عرفتيه فىن وأمتى وازاى

وليه، أيه اللي حصل بينكم، معقول ملمسكيش، لمسك ازاي، احكيلى التفاصيل؟ طيب وبعد ما عرف التفاصيل!؟

إذا كنا بنصح المطلقة إنها متكلمش عن جوزها السابق إلا في الحدود الضيقة وللضرورة، ولما تحكى متمدحش، بل لو اضطرت تكذب تكذب! متقولش ده كان يفهمنى من النظرة، مكش مخلينى محتاجة حاجة، كان حنين، الله! طب سبتيه وجيالى ليه؟؟ هيقول لنفسه دى شكلها اتجوزتنى علشان تغيظه! (ده فقه الواقع).

طيب إذا كان الست اللي كانت في علاقة شرعية -المطلقة- بنقولها متحكيش؛ يبقى من باب أولى اللي مش في علاقة شرعية متحكيش! فطرة الرجل.. فسيولوجيته.. تركبته.. الدم اللي بيجرى في عروقه، كل ده يرفض ويأبى أن يكون له شريك في مراته بل أحياناً في عشقته! ممكن علشان بيحبك يتغافل عن اللي قولتيه؛ لكن في أول مشكلة أو في أول ريبه تظهر منك - حتى لو لسبب مش مستدعى - هينفجر البركان، ممكن ينفجر من غير ما يقول السبب، ما هو خلاص اتورط، لو قال هيبقى بيبيء لنفسه، فتلاقى انفجارات ملهاش مبرر، ملهاش تفسير!

لو قبل فيكي شريك فهو مش راجل الموضوع منتهى يعنى، يعنى
مينفعكيش أصلاً، لكن لو راجل هيقبل علشان بيكون فاهم إنه هيقدر
ينسي "كل اللي وعدوا بالنسيان مقدروش"، هيقي فاكر إن حبكم أقوى
من الماضي "كل اللي ظنوا الظن ده اتكسروا"، هيكون فاكر إن طالما
اخترتية يبقى انتى مش عاوزة غيره- وده حقيقي - لكن كل غلطة
هتقوله: انت مرحلة زى اللي قبلك!

*أسوأ منشور بيقابلنى على الفيس هو المنشور بتاع يارب ألقى اللي
يقبلنى بعيوبى قبل مميزاتي!

اللي يقبل عيوبك ده من غير ما يحاول يصلحها؛ عدو مضل ميين!
قولي يارب ساعدنى أتغلب على كل عيوبى، يا رب ارزقنى باللى
يفتح قلبى ويساعدنى اتغلب على كل عيوبى، مش اللي يقعد يطبطب
على عيوبى!!

غالباً ميطلبش الطلب ده إلا معيوب، طب طالما انت عرفت إنك
معيوب، يبقى ده وقت تصليح العيوب، مش وقت الدعاء بإن ربنا

القرآن، كنت بلم الأطفال وأعلمهم القراية وسورة الفاتحة، ده ماضى
جميل ينفع رصيد في المستقبل.

أما العيوب، إما العوار اللي انتاب الماضى، انتى في غنى عن اجتراره
أو مجرد ذكرى، مش حرام إنك متقوليش، لكن حرام إنك تقولى، ربنا
سترك متفضحيش نفسك بقى، سيبى الصفحة بيضا، مش أول حاجة
تعملها في علاقتك بجوزك إنك تحطى نقطة سودة بمساحة نص
صفحة!

وأخيراً: لما يقولك فشكلتى ليه خطوبتك قوليله متوقفناش،
مفهمناش بعض، متقوليش كان في كل حاجة كويسة ماعدا كذا، لا
اديله اللي يفهمه إن قلبك وعقلك رفضوه - مش ضرورى تعيبى في
خطبك خصوصاً لو كان من محيط البيئة - يكفيكى تقولى مكناش
متفاهمين، واوعى تحسسيه إنه كان أحسن منه، انتى في عقلك هتقولى
علشان ميخدش في نفسه مقلب ولا حاجة، لكن هو ممكن يتسلله شعور
بالنقص يطاردك انتى في كل حياتك المستقبلية معاه.

طب أنا كده بغشه؟ طالما توبتي يبقى لالالالالالالالال، متبتيش يبقى
متتجوزيهوش روحى توبي الأول وبعدين اتخطبي واتجوزى.
افتكرى إنى قولتلك متتجمكليس وخليكي حقيقية، وعلشان تبقى
حقيقية انهي العلاقة الي مكسوفة منها وتوبى، والتائب من الذنب كمن
لا ذنب له، مبروك انتى كده مبتكديش.



(20)

ياراجل كبر هحك

الجملة دى كانت من أواخر الكلمات اللي قالها حسنى مبارك قبل ما "يتخلع"، وكذلك كل مشكلة تتعاملى معاها بالمبدأ ده وتكبرى مخك هتتخلعى وهتلاقى نفسك خسرتى كثير، أنسب وقت لإطفاء الحريق يبدأ من الشرارة الأولى، وكلما تأخرتى كلما زادت نسبة الخسائر وقلت نسبة النجاح.

لما يبقى فى مشكلة لازم نبادر لحلها لأنها مجرد ما تبات هتكبر وهتتعقد، مينفعش تغلطى وتعتدرى بعد أسبوع، مينفعش تقولى كنت بهدا؛ لأن فى طرف تانى بيتحرق والشيطان بيستحوذ عليه، أنسب وقت لتصليح الغلط هو أول وقت اعترفتى فيه بغلطك، وكل دقيقة تعدى هى عقبة بتضاف للمشكلة، الراجل بعد المشكلة بيقول لنفسه: بص ولا

همها إني زعلت، مش فارق معاها زعلی، ست نكدیة،.....، مش شرط
نتصالح بعد خمس دقائق لكن شرط نحاول نتكلم بعد خمس دقائق من
المشكلة، ممكن منوصلش لحل في اللحظة دی، وممكن نكون مش
مستعدين أو الطرف التانى مش مستعد نتكلم معاه ونصالحه أو نبررله،
لكن ده مش معناه عدم المبادرة، اتكلمی واطلبی تهدی، قولى متزعلش
بس أنا متوترة دلوقتى ممكن شوية ونتكلم؛ لأنى مش عوزاك زعلان
ولا عاوزة أزعل منك، لكن لازم تبادرى للكلام، متكبريش مخك
بمعنى إنك تهملی المشكلة كأنها مش موجودة أو توهمی نفسك إنها
هتتحل لوحدها، أو إن الوقت كفیل بیها، الوقت لو حلها صدقینى
هیكون أصعب حل، الوقت قادر على إنه یمحقى أى مشكلة بس
بیمحیها ویمحى صاحبها كمان، ممكن نأجل وقتها بس لازم نطلب
التأجيل أو یطلب منا التأجيل، التجاهل غالباً في المنطقة دی مش
بیحلها، لكن بیعدها، خصوصاً إن في نوع من الرجالة بیبقى نفسه
تصالحیه ورغم كده بیبین عكس ده تماماً، لكن بمجرد ما تنكشیه هتلاقیه

انفتح واتكلم، لكن لو سبتيه بيقفل منك وبيتقوع على نفسه، وبيبدأ
يخترع اعتقادات وهمية بتبقى شبه الجبل بعد كده وبيبقى صعب
تكسيرها، أصعب بكثير عن لو كنتى بادرتى من الأول.

انتى غلطتى يبقى لازم تعتذرى، وأول خطوة فى الاعتذار المبادرة،
وسينى أقولك إن اعتذارك مش ضرورى يتقبل، ولا يتعذر، ولا يتفهم،
ولا يتقدر، لكن ضرورى تعتذرى.

ليه هتعتذرى رغم كل اللي فات ده، هقولك علشان نفسك فى المقام
الأول، علشان تبقى بتتربى وبتتعلمى وبتطورى، الاعتذار عن الخطأ ده
أمر فى غاية الرقي والروعة، ومش بيعمله إلا الصفوة من الناس (الَّذِينَ
إِذَا فَعَلُوا فَاحِشَةً أَوْ ظَلَمُوا أَنْفُسَهُمْ ذَكَرُوا اللَّهَ فَاسْتَغْفَرُوا لِذُنُوبِهِمْ) أول
ما ذكروا الله استغفروا فوراً، يبقى اعتذرى بمجرد ما تكتشفى إنك كنتى
غلطانة.

اعتذرى علشان انتى تستحقى تكونى راقية، تستحقى تكونى
منصفة، الصفات الجميلة دى مش هبة دى نتيجة تعب ومسايسة

لنفس، مع كل اعتذار هتتعلمى حاجة جديدة، مرة هتتعلمى عدم التسرع، ومرة هتتعلمى تفكرى قبل ما تتكلمى، ومرة هتتعلمى تكسري الكبر الي جواكى الي ملهوش أى معنى ومخسرك حاجات كثير، ومرة هتتعلمى تكونى حقيقية.

الإنسان الحقيقي بيعتذر حتى لو الي قدامه هيسوق فيها، بيعتذر حتى لو الناس هياكلوا وشه، بيعتذر حتى لو الي قدامه مش هيقدر، حتى لو هيمسكها عليه، بيعتذر طالما غلط، وأنسب وقت للاعتذار هو بمجرد ما تعرفى إنك غلطتى.

طيب الاعتذار ليه أشكال كثيرة، تبدأ من مجرد الكلام بعد الخصام لحد الاعتراف الكامل بالخطأ مع تصليحه، أو الوعد بتصليحه وعدم تكراره، أنا اختارلك النوع الاخير، لكن ده ميمنعش تستعملى كل الأنواع؛ لأن مش كل الأخطاء شبه بعض، ممكن من غير ما تحسي تحتدى فى الكلام، وتعلّى صوتك وده أنسب اعتذار ليه إنك توطى صوتك مع ابتسامة خجل "وده اسمه اعتذار"، ممكن تتهورى وتشتمى أو تقولى

كلمة جارحة وده يحتاج ندم ودموع "علشان يبقى اعتذار"، وعلشان كده ديا بفكركم إن السلسلة دي لواحدة مش عاوزة تطلق، السلسلة لوحدة عاوزة تعيش سعيدة رغم كل الصعاب، يعنى طالما قررتى إنك تكمل مع الراجل ده يبقى كمل بكلك مش بجزء بسيط منك، يعنى افتحى الخزائن وانفقى مش تقطرى، أكيد أنا بطالبك بإنفاق مدروس فى محله مش مجرد بعزقه وتبذير.

طيب لو مش انتى اللى غلطانة؟ يبقى تبادرى للمناقشة أو طلب المناقشة، متسمحلهوش يسيبك زعلانة وتتفلقى، متسمحلهوش يعرف ديتك، يغلط ويطنش، خليه يحمل هم زعلك، هم التبرير، أو هم الاعتذار، خلى النظام السياسى للبيت هو المناقشة مش الاستبداد، وده برضوا عاوز ذكاء منك، ودلع، وأنوثة ورقة.

مش تشديه من على السرير توقعيه على بوزه وهو نايم وتقوليله تعلالى هنا قولى انت ازاي تعمل كده!!

عاوزة تفشلى فى كل حياتك قولى الكلام ده (أصل أنا مبحبش كده -
أصل أنا متعودتش على كده- أصل أنا مش بتاعت كده- أصل
أنا.....) فى طريق النجاح بنحب اللي مبنحبهوش وبتعود على اللي
مكناش متعودين عليه وبتتعلم اللي فاتنا تعلمه من زمان.



الخاتمة

(ههسة للرجل)

عاوز أقولك كلمتين ودول لمصلحتك ولسعادتك الخاصة، مش

علشان تكون أب وزوج ناجح بس؛ لكن علشان تكون إنسان!

زمان قالوا: الإنسان حيوان ناطق، أظن إن ده ممكن يكون منطقي في

العصر الحجري، لكن النهاردا الوضع اختلف كثير، مجرد إنك بتتطق

وتتكلم ميكفيش إنك تكون إنسان، وعلشان تكون إنسان فانت محتاج

تكون صاحب رسالة.

حاول تخرج من القطيع، خليك نفسك، مش الناس بتتجوز..

فتتجوز، الناس بتعمل فاعمل، خليك إنسان مسؤول، يعنى متتجوزش

لو انت مش قد الجواز، ومتوعدش لو انت مش قد الوعد..

الستات في العصر الحالى في معاناة شديدة، سببها الأول هو تخلي

الراجل عن مكانه ومسؤوليته، ممكن الست تكون لسه معاك لمجرد إنها

مجرة؛ عشان أولادها أو لأنها ملهاش مكان تروح فيه، بس هي لما اتجوزت كانت فاهمة إنك الأمان ليها من الدنيا، ليه النهاردا هي شايقة إنك انت السبب الوحيد اللي مخليها مش قادرة تعيش في أمان؟!!

السؤال ده محتاج مننا تفكير، وتأمل، وقرار سريع وحكيم، استمرارها معاك لمجرد إنها ملهاش مكان تانى تروح فيه، ده مش بس إحساس بشع ليها؛ ده إحساس قدر في حقك، انت ممكن تكون بتديها أكثر من اللي هي محتاجاه، لكن مش بتديها اللي هي محتاجاه... ومن هنا تيجي المشكلة.

تخيل لو انت في الصحراء بقالك يومين من غير ما تشرب، وأنا جيت ادتلك بدلة شيك أو شنطة مليانة فلوس أو حتى جبل ذهب؟ كل اللي فات ده ممكن يرويك ويبعد عنك ظمأ العطش؟ طب قولى هل تبدل كل ما سبق بنصف كوب ماء؟

أنا معاك إن الستات صعب جداً نفهمهم؛ لأن كل ست مختلفة عن الثانية، لكن رغم كل الصعوبة دي، انت تقدر تريجها وتملكها وتأخذ

منها أكثر بكثير من اللي بتخده منها دلوقتى، كل ده من غير ما تفهمها
100٪.

الست اتخلقت نهر، بيجرى وبيتدفق، بيروى ويسيب مكانه الخير،
تقدر بسهولة تعرف إن المكان ده مرت منه امرأة؛ لأن الستات ليهم
بصمة حقيقة، كان ممكن تكون أقوى لو كانت لقت راجل حقيقى!

أمتى آخر مرة قعدت معاها وسمعتها؟

سمعتها بس من غير ما تقدملها أى حلول؟

ماهى الست مش زيك عملية، الست عاطفية، عوزاك تسمعها
وتحسسها إنك مهتم تسمعها، حتى لو مش هتديها أى حل فى النهاية،
اديها بس قلبك واهتمامك، أسألها عملتى أيه فى يومك النهاردا، حسسها
بقيمتها لأنها فعلا قيمتها كبيرة، وانت بنفسك تقدر تعرفها لو هى
خدت إجازة يوم واحد من شغل البيت!

أمتى اخر مرة مدحتها، وقتلتها وحشتينى، أنا آسف إنى مش بقعد
معاكى كثير؟

نفسى أكل من ايديك كذا علشان انتى شاطرة جدًا فيه، وبالمناسبة مراتك مهما كانت درجة جمالها متواضع، فهى كانت بتحاول تستقبلك بأحلى شكل ليها، بس انت ديبا مش بتاخذ بالك، هى حست باليأس إنها تعرف تلفت نظرك، واليأس ده هز ثقتها بنفسها كثير، وده سبب أغلب المشاكل اللى بتحصل منها النهاردا، هى مش لاقية نفسها، وحست إن أى ست غيرها أحلى منها، كل ده حصلها بس لإنك انت جوزها!

أمى آخر مرة جبتلها هدية؟ أو كلمتها عن ذكرياتكم أيام الخطوبة؟ أمى سبتلها جواب أو ورقة بتقولها فيها بحبك... أمى آخر مرة بوستها من ايديها أو حضنتها من غير سبب، أو حتى بصلتها وهى بتذاكر للعيال وقولتلها الله يكون في عونك؟ أمى آخر مرة سمعتك بتدعيها؟

عارف أنا النهاردا بقنعها بأيه؟ بقنعها إنها تعيش سعيدة من غيرك، بعلمها تصنع سعادتها ومتستنهاش منك، بعلمها تعيش وحيدة سعيدة.. لأن أنا وانت وكل راجل خذلها، خلاص مبقتش قادر أدافع عن نفسى ولا عنك.

احنا عاوزينها حلوة ونظيفة ومهتمة، طيب وهى؟ مش من حقها
تاخذ نفس الكلام ده؟ هو احنا بطلنا ليه نلبس ونتشيك زى ما كنا
بنعمل أيام الخطوبة؟

مش لازم في البيت تقعد بالأبيض زى الحجاج يعنى، ممكن تلبس
حاجة شيك كأنك خارج أو رايح على القهوة، ممكن نحط برفان في
البيت عادى من النوع اللي هي بتحبه.

وممكن نقف في المطبخ نغسل المواعين ونقطع السلطة، نحسسها
بالمشاركة، وأهو بالمرّة نحس ونفهم الست دى بتعمل أيه.

تعالى نلخص اللي فات ده:

• اهتم بمراتك كأنك لسه متجوزتهاش (مش عاوز أقولك اهتم
بيها كأنها عشيقتك)!.
• راعى إنها أغلب الوقت لوحدها ومحتاجة تتكلم أو تسمع بنى

آدم، وهى مش محتاجة حلول قد ما هى محتاجة قلب يسمعها ويحس
بيها.

• اعملها وقت مخصوص بعيد عن الأولاد، اقعدها معها حتى لو ربع ساعة باهتمام بالغ.

• اديها فرصة تاخذ وقت لنفسها، ويبقى ضربنا عصفورين بحجر، الأول: إنك تقعد مع أولادك ويجسوا بوجودك، **الثاني**: ادينها فرصة تشحن طاقتها وتقدر تكمل بينها معانا، في فرق بين إنها تعمل واجباتها وهي مرتاحة وإنها تعملها وهي مش طايقة نفسها.

• امدحها... كل ما تشوفها في البيت امدحها.. امدح أكلها، لبسها، تسريحة شعرها، طريقة كلامها، اغمرها بالثقة، خليها تحس إنها ملكة، هي بالفعل تستحق ده.

• هاديها كل أسبوع مرة، كل أسبوعين مرة، أقولك بلاش نتقل خليها كل شهر مرة، وكل أسبوع اكتبها جواب، أو ورقة تقولها فيها وحشتيني، بحبك، ارسملها أول حرف من اسمها، ارسملها الحاجة اللي طلبتها ومقدرتش تشتريها لها، قولها إنك عاوز تسعدها.

• بوسها، بوسها يا حنفي، بوسها من بوقها، من غير مناسبة ومن غير غرض... ده لو عاوز تملكها يعني.

• خذ إجازة من الشغل يوم واحد علشانها، عرفها إنه علشانها، وكل ما تعمل حاجة علشانها عرفها إنك عملتها علشانها هي وبس.

• ساعدها واتعامل معها بعين الرحمة، ارحمها علشان هي تستحق الرحمة.

• متحسسهاش إنها في الحياة وحيدة، إنها بتكافح لوحدها، حسسها بالأمان، حسسها إنها ساندة على حيطه تقدر تحميها وتمنع عنها.

• في بسكوت اسمه نواعم، قريب قوى من تركيبة الستات، اشترى واحد وحاول تطلع منه البسكوتة سليمة، هتعرف إن الست علشان تفضل في حالة جيدة بتعاني، وهتعرف إنك محتاج تتعامل معها بلين علشان متتكسرش منك من غير حتى ما تقصد أو تاخذ بالك.

• اتكلم عنها حلو، وخليها تشوفك وتسمعك وانت بتتكلم عنها حلو، قدام أهلك وأهلها.

• برر لها جوازك منها بطريقة هي تفهمها.

• كل اللي فات مش محتاج منك فلوس، محتاج منك تكون صادق في مساعدة الست دى على الحياة، محتاج منك رغبة حقيقية إنك تكون عاوزها تفضل على قيد الحياة.

• دعمها في الحاجة الي هي بتحبها، لو هي فاشلة ساعدها تنجح، نجاحها يضاف ليك، لو هي ناجحة طورها وشجعها، خليها تشوفك رقم واحد.

• في النهاية كل ده لمصلحتك انت، ولسعادتك انت، جرب وھتعرف الفرق بين الست لما تكون سعيدة ولما تكون بقايا امرأة.

نصيحة هامة: الست بتفهم في المشاعر أكثر من الأفعال... بتفهم التهنيدة أكثر ما بتفهم الهدية المادية، بتتأثر بالنظرة أكثر ما بتتأثر باللمسة، وبتتأثر باللمسة أكثر ما بتتأثر بالكلمة، وبتتأثر بالكلمة أكثر ما بتتأثر بالهدية، وبتتأثر بالهدية: أكثر ما بتتأثر بأنك بتصرف عليها وعلى عيالها وعلى الجيران كمان.

يا امرأة هذه المحاولة من أجلك وانتي تستحقينها، لو حاسة إنى عرفت اتكلم عنك وعن بعض رغباتك واحتياجاتك ساعدي في نشر هذا الكلام، وده يبقى اعتراف منك إنه صح، وخريطة سهلة لمن يهمله أمرك.



متابعة الكاتب

على صفحته الشخصية على الفيس بوك

#عمر_يَس



<https://www.facebook.com/amr.yassin.9277>